

947

H-564

947

H 564

КНИГА ДОЛЖНА БЫТЬ
ВОЗВРАЩЕНА НЕ ПОЗЖЕ
указанного здесь срока.

~~7/XI-37.~~

~~9/2/XII 37 НКВД~~

64

ич. предл. выдач. _____

мысль", М. Сухаревский 9. Зап. 1355

~~051055~~

6
22

~~N^o 1180~~
~~6/22 - 11 Ka. 90~~


110
„УЧЕБНАЯ БИБЛИОТЕКА“.

1180/15
ЛѢТОПИСЬ НЕСТОРА.
8K
-4

Обрѣтаемъ начальнаго лѣтословца
Кіевскаго, иже вся временнобытства
не обинуяся показываетъ.... Оного великаго
Селиверста Выдобыжскаго не украшая
пишущаго — да еще хочещи — прочти
прилежно.

(Сказан. о нашеств. Едигея).

53436
49 L.
Редакція и примѣчанія В. А. Яковлева.



11443.
947
H 504
СОТРУДНИКЪ ШКОЛЬ
МАГАЗИНЪ КНИГЪ, ФАБРИКА ГЛОБУСОВЪ
и учебныхъ пособій
— МОСКВА, —
Воскресенка, д. Архандъ.

С.-ПЕТЕРБУРГЪ.

Типографія В. С. Балашева, Екатерин. кан., № 80.

1891.

Доволено цензурою. С.-Петербургъ, 13-го февраля 1891 года.

ПРЕДИСЛОВІЕ.

Изученіе такъ называемой „Лѣтописи Нестора“ даетъ основанія предполагать, что лѣтописное дѣло началось на Руси весьма рано и при томъ почти одновременно въ различныхъ пунктахъ: на югѣ (въ Кіевѣ), на сѣверѣ (въ Новгородѣ), на сѣверо-западѣ (въ Полоцкѣ) и на сѣверо-востокѣ (въ Ростовѣ). Къ сожалѣнію, отъ этихъ памятниковъ глубокой старины ничего не сохранилось въ подлинномъ видѣ.

Древнѣйшій изъ дошедшихъ до насъ историческихъ трудовъ, который принято называть „Лѣтописью Нестора“ ¹⁾, въ значительной части своего содержанія не соотвѣтствуетъ уже точному понятію о лѣтописи, потому что представляетъ не записки современника въ хронологическомъ порядкѣ событій, но историческій сводъ, составленный изъ многихъ источниковъ, принадлежащихъ разнымъ временамъ, лицамъ и мѣстностямъ.

Для правильнаго пониманія этого памятника важны слѣдующіе вопросы: 1) въ какомъ видѣ онъ дошелъ до нашего времени; 2) изъ какихъ источниковъ составленъ; 3) когда; 4) гдѣ, и 5) на какомъ языкѣ.

¹⁾ Заглавіе подлинника („Се повѣсти времяньныхъ лѣтъ“ и пр.) должно относиться не ко всему труду, а только къ начальной его части, которая первоначально составляла отдѣльную повѣсть и вѣроятно оканчивалась походомъ Аскольда и Дира.

1) „Лѣтопись Нестора“ не дошла до насъ въ отдѣльномъ видѣ, но составляетъ начало (до 1110 года) многихъ позднѣйшихъ лѣтописныхъ сводовъ. Изъ нихъ наиболѣе замѣчательны:

а) Лаврентьевскій (до 1110 года лѣт. Нестора, далѣе—до 1305 года—лѣт. Суздальская), переписанный монахомъ Лаврентіемъ въ 1377 году.

б) Ипатьевскій (до 1110 года лѣт. Нестора, далѣе—до 1200 года—лѣт. Кіевская, наконецъ—до 1292 года—лѣт. Галицко-Волынская) найденъ въ Ипатьевскомъ костромскомъ монастырѣ и относится къ концу XIV или къ началу XV вѣка.

в) Кенигсбергскій (или Радзивилловскій)—конца XV вѣка.

г) Хлѣбниковскій и Софійскій—второй половины XVI вѣка.

е) Воскресенскій и Никоновскій—XVII вѣка.

2) Въ составъ „Лѣтописи Нестора“ вошли: а) краткія лѣтописныя замѣтки, веденныя на Руси разными лицами и въ разныхъ мѣстахъ; б) повѣсти, составленныя по преданію, по слухамъ или очевидцами событій, а также передѣланныя изъ поэтическихъ сказаній (таковы: первоначальная „повѣсть временныхъ лѣтъ“, повѣсти о походѣ Олега, о смерти Олега, о смерти Игоря и мщеніи Ольги, о крещеніи Ольги, о походахъ Святослава, о крещеніи Руси, объ убіеніи Бориса и Глѣба, печерскія сказанія, рассказы о волхвахъ, ослѣпленіе Василька); в) оффиціальныя документы (договоры князей); г) нѣкоторыя свѣдѣнія изъ византійскихъ палей (т. е. ветхозавѣтной исторіи съ толкованіями) и хроникъ.

3) Окончательная редакція „Лѣтописи Нестора“ принадлежитъ несомнѣнно началу XII вѣка, о чемъ свидѣтельствуютъ всѣ дошедшіе до насъ лѣтописные своды, приблизительно сходные до 1110 года.

4) Относительно личности составителя существуетъ нѣсколько предположеній. Во всѣхъ спискахъ (кроме Лаврентьевскаго) онъ названъ черноризцемъ Печерскаго монастыря („Повѣсть временныхъ лѣтъ черноризца Феодосьева монастыря

Печерскаго“); въ Хлѣбниковскомъ — „Несторомъ черноризцемъ“¹⁾. Тоже мнѣніе сначала утвердилось и въ наукѣ (Шлёцеръ, Карамзинъ); но при дальнѣйшемъ изученіи „Лѣтописи“ возникли основательныя сомнѣнія относительно принадлежности ея одному лицу. Противъ исключительной роли Нестора говорить, между прочимъ, приписка, сдѣланная въ Лаврентьевскомъ сводѣ подъ 1110 годомъ: „Игуменъ Сильвестръ святаго Михаила написахъ книги си, Лѣтописецъ, надѣяся отъ Бога милость прияти, при князи Володимерѣ, княжащю ему Кыевѣ, а мнѣ въ то время игуменащю у святаго Михаила, въ 6624 (1116), индикта 9 лѣто“. Всего вѣроятнѣе предполагать, что первоначальная редакція „Лѣтописи“ принадлежитъ какому-нибудь иноку Печерскаго монастыря (даже, быть можетъ, Нестору), а болѣе поздняя—игумену Сильвестру²⁾.

5) Будучи составлена изъ разнородныхъ источниковъ, „Лѣтопись Нестора“, весьма естественно, не можетъ отличаться единствомъ языка: въ однихъ мѣстахъ (преимущественно въ поученіяхъ) преобладаетъ языкъ книжный, церковно-славянскій; въ другихъ—живая народная рѣчь.

Начало научному изученію „Несторовой Лѣтописи“ положено А. В. Шлёцеромъ (1802—1809). Русскій переводъ его труда, сдѣланный Языковымъ, выходилъ въ свѣтъ съ 1809 по 1819 годъ.

¹⁾ Вѣроятно, на основаніи кievскаго патерика, гдѣ о Несторѣ сказано: „иже написахъ лѣтописецъ“.

²⁾ Единственное біографическое свѣдѣніе о Несторѣ мы находимъ въ составленномъ имъ „Житіи Θεодосія: „таже вписахъ азъ грѣшный Несторъ, мый въсѣхъ въ монастыри блаженнаго и отца всѣхъ, Θεодисія. Приять же быхъ въ нь прѣбнимъ игуменъ Стефанъ, и яко же отъ того остриженъ бывъ“. Въ виду противорѣчія съ этимъ извѣстіемъ, заключительныя слова повѣсти: „Что ради прозвася Печерскій монастырь,“ (см. 1051 г.) должны относиться къ какому-нибудь другому лицу.

О Сильвестрѣ извѣстно, что въ 1118 годѣ онъ былъ переведенъ изъ Михайловскаго монастыря епископомъ въ Переяславль, гдѣ и умеръ въ 1123 году.

Изъ послѣдующихъ трудовъ наиболѣе замѣчательны:

- 1) Погодина: „Несторъ, историко-критическое изслѣдованіе о началѣ русскихъ лѣтописей“. 1839 г.
- 2) Срезневскаго: „Чтенія о древней русской лѣтописи“.. (З. А. Н. т. III).
- 3) Костомарова: „Лекціи по русской исторіи“. Ч. I.
- 4) Бестужева-Рюмина: „Лѣтопись занятій археографической комиссіи“. 1869 г.

Примѣчаніе. Въ предлагаемой книгѣ заключаются выдержки изъ „Лѣтописи Нестора“ наиболѣе удобныя для класснаго чтенія. Изданіе сдѣлано по Лаврентьевскому списку (Изд. Арх. ком. 1872 г.), съ соблюденіемъ орфографіи подлинника. В. Я.

Несторова лѣтопись.

Се повѣсти времяньныхъ ¹⁾ лѣтъ, откуда есть пошла Руская земля, кто въ Кіевѣ нача первѣе княжити, и откуда Руская земля стала есть.

Се начнемъ повѣсть сию.

По потопѣ трие сынове Ноеви раздѣлиша землю, Симъ, Хамъ, Афетъ. И яся ²⁾ въстокъ Симови (*слѣдуетъ перечисленіе восточныхъ странъ*). Хамови же яся полуденьная страна (*перечисленіе южныхъ странъ*). Афету же яшася полунощныя страны и западныя (*перечисленіе сѣверныхъ и западныхъ странъ*).

Симъ же, и Хамъ, и Афетъ, раздѣливше землю, жребьи метавше, не преступати никому же въ жребій братень, живяху каждо въ своей части; бысть языкъ единъ. И умножившемся челоукомъ на земли ³⁾, помыслиша создати столпъ до небесе въ дни Нектана и Фалека. И собращася на мѣстѣ Сенаръ создати столпъ до небесе и градъ около его Вавилонъ; и создаша столпъ тѣ за 40 лѣтъ, и не свершенъ бысть. И сниде Господь Богъ видѣти градъ и столпъ, и рече Господь: „се родъ единъ и языкъ единъ“. И съмѣси Богъ языки, и раздѣли на 70 и 2 языка, и расъсѣя по всей земли. По размѣшенъи же языкъ Богъ вѣтромъ великимъ разруши столпъ, и есть останокъ его промежю Асюра и Вавилона; и есть въ высоту и въ ширину локоть 5433, и въ

¹⁾ Прошедшихъ.

²⁾ Отъ ятися, браться, доставаться.

³⁾ Дат. самостоятельный: „когда люди умножились“.

лѣта много хранимъ останокъ. По разрушеніи же столпа и по раздѣленіи языка приша сынове Симови вѣсточныя страны, а Хамови сынове полуденныя страны, Афетови же приша западъ и полунощныя страны. Отъ сихъ же 70 и 2 языку бысть языкъ Словѣнскъ, отъ племени Афетова, Норци, еже суть Словѣне.

По многѣхъ же времянѣхъ сѣли суть Словѣни по Дунаеви, гдѣ есть ныне Угорьска ¹⁾ земля и Болгарьска. И отъ тѣхъ Словѣнъ разидошася по землѣ и прозвашася имени своими, гдѣ сѣдше на которомъ мѣстѣ: яко пришедше сѣдоша на рѣцѣ имянемъ Марава, и прозвашася Морава, а друзии Чеси нарекошася; а се ти же Словѣни: Хорвате Бѣлии, и Серебъ, и Хорутане. Волхомъ ²⁾ бо нашедшемъ на Словѣни на Дунайскія, сѣдшемъ въ нихъ и насилящемъ имъ, Словѣни же ови пришедше сѣдоша на Вислѣ и прозвашася Ляхове ³⁾, а отъ тѣхъ Ляховъ прозвашася: друзии Лутичи, ини Мазовшане, ини Поморяне. Также и ти Словѣне пришедше и сѣдоша по Днѣпру и нарекошася Поляне, а друзии Древляне, зане сѣдоша въ лѣсѣхъ; а друзии сѣдоша межю Припетью и Двиною и нарекошася Дреговичи; инии сѣдоша на Двинѣ и нарекошася Полочане, рѣчки ради, яже втечетъ въ Двину, имянемъ Полота, отъ сея прозвашася Полочане. Словѣни же сѣдоша около езера Илмеря и прозвашася своимъ имянемъ ⁴⁾ и сдѣлаша градъ и нарекоша ѿ Новѣгородъ; а друзии сѣдоша по Деснѣ, и по Семи, и по Сулѣ, и нарекошася Сѣверъ. И тако разидеся Словѣньскій языкъ, тѣмже и грамота прозвася Словѣньская.

Поляномъ же жившимъ особѣ по горамъ симъ, бѣ путь изъ Варягъ въ Греки и изъ Грекъ по Днѣпру, и верхъ Днѣпра волокъ до Ловоти и по Ловотивнѣти въ Илмерь озеро великое, изъ него же озера потечетъ Волховъ и втечетъ въ озеро великое Нѣво, и того озера внидетъ устье въ море Варяжское, и по тому морю ити до Рима, а отъ Рима прити по тому же морю ко Царюгороду, а отъ Царюгорода прити въ Понтъ море, въ неже втечетъ Днѣпръ рѣка. Днѣпръ бо потече изъ Волковскаго лѣса и поте-

¹⁾ Венгерская.

²⁾ Неизвѣстно, кого лѣтописецъ называетъ „Волохами“. Впослѣдствіи этимъ именемъ называли у насъ всѣхъ народовъ романскаго происхожденія и преимущественно румыновъ.

³⁾ „А отъ тѣхъ Ляховъ прозвашася Поляне, Ляхове друзии Лутичи“.

⁴⁾ Т. е. Славянами.

четь на полъдне, а Двина изъ того же лѣса потечеть, а идеть на полунощье и внидеть въ море Варяжское; изъ того лѣса потече Волга на вѣстокъ, и вѣтечеть семьюдесять жерель ¹⁾ въ море Хвалисьское. Тѣмже и изъ Руси можетъ ити по Волзѣ въ Болгары и въ Хвалисы, и на вѣстокъ дойти въ жребий Симовъ, а по Двинѣ въ Варяги, изъ Варягъ до Рима, отъ Рима же и до племени Хамова. А Днѣпръ втечеть въ Понетское море жереломъ, еже море словоеть Руское, по нему же училъ святой Онѣдрѣй, братъ Петровъ, яко же рѣша ²⁾.

Х Онѣдрѣю учащу въ Синопии ³⁾ и пришедшу ему въ Корсунь ⁴⁾ увѣдѣ, яко изъ Корсуны близъ устья Днѣпрское, и вѣсхотѣ поити въ Римъ, и проиде въ вустье Днѣпрское, и оттоле поиде по Днѣпру горѣ ⁵⁾, и по приключаяу приде и ста подъ горами на бѣрезѣ. И заутра вѣставъ и рече къ сущимъ съ нимъ ученикомъ: „видите ли горы сия? яко на сихъ горахъ восияеть благодать Божья; имать градъ великъ быти и церкви многи Богъ вѣздвигнути имать“ ⁶⁾. И вѣшедъ на горы сия, благослови я ⁷⁾, и постави крестъ, и помоливъся Богу, и сълѣзъ съ горы сея, идеже послѣже бысть Киевъ, и поиде по Днѣпру горѣ. И приде въ Словѣни, идеже нынѣ Новъгородъ, и видѣ ту люди сущая, како есть обычай имъ, и како се мыють и хвоцются ⁸⁾, и удивися имъ. И иде въ Варяги, и приде въ Римъ, и исповѣда, елико научи и елико виде ⁹⁾, и рече имъ: „дивно видѣхъ въ землѣ Словеньстѣ идущю ми сѣмо; видѣхъ бани древены, и пережъгутъ я рамяно ¹⁰⁾, и совлокуться, и будутъ нази, и облѣются квасомъ уснианомъ ¹¹⁾, и возмутъ на ея прутье младое, и бьютъ ся сами,

¹⁾ Жерло (горло, гирло) устья рѣки.

²⁾ Какъ говоритъ преданіе.

³⁾ На южномъ берегу Чернаго моря.

⁴⁾ Греческая колонія въ Крыму.

⁵⁾ Вверхъ.

⁶⁾ Будущее время.

⁷⁾ Ихъ.

⁸⁾ Стегаютъ себя прутьями.

⁹⁾ Сколько научилъ и сколько видѣлъ.

¹⁰⁾ Очень сильно.

¹¹⁾ „Уснианъ“ значитъ „кажанный“. „Квасъ уснианъ“ вѣроятно кислота, помощью которой дубятъ кожи, т. е. дубильная кислота, добываемая изъ древесной коры.

и того ся добьютъ, едва слѣзутъ лѣ живи, и облѣются водою студеною, и тако оживутъ; и то творять по вся дни, не мучими никимже, но сами ся мучать, и то творять мовеніе собѣ, а не мученье“. Слышащей же се дивляхуся. Онѣдрѣй же, бывъ въ Римѣ, приде въ Синопию.

✕ Поляномъ же жившемъ особѣ и володѣющемъ роды своими, быша 3 брата: единому имя Кий, а другому Щекъ, а третьему Хоривъ, и сестра ихъ Лыбедь. Сѣдѣше Кий на горѣ, идѣже нынѣ оувозъ ¹⁾ Бори́чевъ, а Щекъ сѣдѣше на горѣ, идѣже ныне зовется Щековица, а Хоривъ на третьей горѣ, отъ него же прозвася Хоривица; и створиша градъ во имя брата своего старѣйшаго, и нарекоша имя ему Киевъ. И бяше около града лѣсъ и боръ великъ, и бяху ловяща звѣрь, бяху мужи мудри и смыслени, и нарицахуся Поляне, отъ нихже суть Поляне въ Киевѣ и до сего дне.

✕ Ини же не свѣдуще рекоша, яко Кий есть перевозникъ былъ; у Киева бо бяше перевозъ тогда съ оной стороны Днѣпра, тѣмъ глаголаху ²⁾: „на перевозъ на Киевъ“. Аще бо былъ перевозникъ Кий, то не бы ходилъ Царюгороду ³⁾; но се Кий княжаше въ родѣ своемъ; и приходившю ему ко царю, якоже говорятъ, велику честь приялъ есть отъ царя, при которомъ приходивъ цари; идущю же ему вспять, приде къ Дунаеви, и възлюби мѣсто, и сруби градокъ малъ, и хотѣше сѣсти съ родомъ своимъ, и не даша ему ту близъ живущии; еже и до нынѣ наричють Дунайци „городище Киевецъ“. Киеви же пришедшю въ свой градъ Киевъ, ту животъ свой сконча; и братъ его Щекъ и Хоривъ и сестра ихъ Лыбедь ту скончашася.

И по сихъ брати держати почаша родъ ихъ княженъе въ Поляхъ, а въ Деревляхъ свое, а Дреговичи свое. А Словѣни свое въ Новѣгородѣ, а другое на Полотѣ, иже Полочане; отъ нихъ же ⁴⁾ Кривичи, иже сѣдѣтъ на верхъ Волги и на верхъ Двины и на верхъ Днѣпра, ихже градъ есть Смоленскъ; тоже Сѣверъ отъ нихъ. На Бѣлѣозерѣ сѣдѣтъ Весь, а на Ростовскомъ

¹⁾ Спускъ къ рѣкѣ.

²⁾ И потому говорили.

³⁾ Дат. мѣста.

⁴⁾ Изъ ихъ же племени.

озерѣ Меря, а Клещинѣ озерѣ Меря же. А по Оцѣ рѣцѣ, гдѣ втечетъ въ Волгу, Муромъ языкъ свой, и Черемиси свой языкъ, Морьдва свой языкъ. Се бо токмо Словѣнскъ языкъ въ Руси: Поляне, Деревляне, Ноугородьци, Полочане, Дреговичи, Сѣверь, Бужане (зане сѣдоша по Бугу), послѣ же Велыняне. А се суть инии языци, иже дань даютъ Руси: Чодь, Меря, Весь, Муромъ, Черемись, Морьдва, Пермь, Печера, Ямь ¹⁾, Литва, Зимигола, Корсь, Норова, Либь ²⁾; си суть свой языкъ имуще, отъ колена Афетова, иже живутъ въ странахъ полунощныхъ.

Словѣнску же языку, якоже рекохомъ, живуцю на Дунаи, придоша отъ Скуфѣ, рекше ³⁾ отъ Козарь рекомии ⁴⁾ Болгаре и сѣдоша по Дунаеви, и населници ⁵⁾. Словѣномъ быша. Посемъ придоша Угри Бѣлии и наслѣдиша землю Словѣнску; си бо Угри почаша быти при Ираклии цари, иже ходише на Хоздроя царя Перьскаго. Въ си же времяна быша и Обри ⁶⁾, иже ходиша на Ираклия царя и мало его не яша. Си же Обри воеваху на Словѣнѣхъ, и примучиша Дулѣбы, сущая Словѣны, и насилье творяху женамъ Дулѣбскимъ: аще поѣхати будяше Обрину, не дадѣше въпрячи коня ни вола, но велѣше въпрячи 3-ли, 4-ли, 5-ли женъ въ телѣгу и повести Обърѣна, и тако мучаху Дулѣбы. Быша бо Обърѣ тѣломъ велици ⁷⁾ и умомъ горды, и Богъ потреби ѧ, и помроша вси, и не остана ни единъ Объринъ и есть притѣча въ Руси и до сего дне: погибоша аки Обрѣ; ихже нѣсть племени ни наслѣдка. По сихъ же придоша Печенѣзи; паки идоша Угри Чернии мимо Киевъ, послѣ же при Олзѣ.

Поляномъ же живущимъ особѣ, якоже рекохомъ, бѣста 2 брата въ Лясѣхъ: Радимъ, а другой Вятко. И пришедъша сѣдоста Радимъ на Сою, и прозвашася Радимичи, а Вятко сѣде съ родомъ своимъ по Оцѣ, отъ него же прозвашася Вятичи. Дулѣби живяху по Бугу, гдѣ ныне Велыняне; а Угличи и Тиверьци сѣ-

¹⁾ Племена финскія.

²⁾ Племена литовскія.

³⁾ То есть.

⁴⁾ Племя называемое болгарами.

⁵⁾ Поселились въ землѣ славянской.

⁶⁾ Авары.

⁷⁾ У поляковъ это имя сдѣлалось нарицательнымъ: olbrzym-великанъ.

дяху по Днѣстру, присѣдяху къ Дунаевѣ, бѣ бо множество ихъ, сѣдяху бо по Днѣстру оли до моря, и суть гради ихъ до сего дне, да то ся зваху отъ Грекъ Великая Скуфь.

Имяху бо обычаи свои, и законъ отецъ своихъ, и преданья, кождо свой нравъ. Поляне бо своихъ отецъ обычаи имуть кротокъ и тихъ, и обычаи брачный имяху. А Древляне живяху звѣриньскимъ образомъ, живуще скотьски: убиваху другъ друга, ядяху все нечисто, и брака у нихъ не бываше, но умыкиваху у воды дѣвица. И Радимичи, и Вятичи, и Сѣверъ одинъ обычаи имяху: живяху въ лѣсѣхъ, якоже и всякій звѣрь, ядуще все нечисто; браци не бываху въ нихъ, но игрища межю селы; схожахуся на игрища, на плясанье и на вся бѣсовская игрища, и ту умыкаху жены собѣ, съ нею же кто съвѣщашеся; имяху же по двѣ и по три жены. И аще кто умряше, творяху тризну надъ нимъ, и по семь творяху кладу ¹⁾ велику, и възложашуть ѳ на кладу; мертвеца сожъжаху, и посемь собравше кости вложашу въ судину ²⁾ малу и поставляху на столпѣ на путехъ,—еже творять Вятичи и нынѣ. Си же творяху обычая Кривичи и прочии погании ³⁾, не вѣдуще закона Божия, но творяще сами собѣ законъ. Глаголетъ Георгій (Амартолъ) въ лѣтописаніи: ибо коемуждо языку овѣмъ исписанъ законъ есть, другимъ же обычаи. Мы же хрестіане, елико земль, иже вѣрують въ святую Троицу, въ едино крещенье, въ едину вѣру, законъ имаѣмъ единъ, елико во Христа крестихомся и во Христа облекохомся.

По сихъ же лѣтѣхъ, по смерти братьѣ сея ⁴⁾, быша обидимы Древлями и инѣми околними, и наидоша ѳ Козарѣ, сѣдящая ⁵⁾ на горахъ сихъ въ лѣсѣхъ, и рѣша Козари: „платите намъ дань“. Съдумавше же Поляне и вдаша отъ дыма ⁶⁾ мечь, и несоша Козари ко князю своему и къ старѣйшинамъ своимъ, и рѣша имъ: „се налѣзохомъ ⁷⁾ дань нову“. Они же рѣша имъ: „откуда?“ Они же рѣша: „въ лѣсѣ на горахъ надъ рѣкою Днѣпрьскою“.

¹⁾ Костеръ.

²⁾ Сосудъ.

³⁾ Язычники.

⁴⁾ Т. е. Кія, Щека и Хорива.

⁵⁾ Относится къ Полянамъ.

⁶⁾ Отъ жилья.

⁷⁾ Нашли.

Они же рѣша: „что суть вдали?“ Они же показаша мечь. И рѣша старци Козарьстии: „не добра дань, княже! мы ся доискахомъ оружьемъ одною стороною остроумъ (рекше саблями), а сихъ оружье обоюдоостро (рекше мечь), си имуть имати дань на насъ и на инѣхъ странахъ“. Се же сбысться все; не отъ своея воля рекоша, но отъ Божья повелѣнья. Вододѣють Козары ¹⁾ Русьскіи князи и до днешняго дне.

Въ лѣто 6360 (852), индикта ²⁾ 15 день, наченшю Михаилу царствовати, нача ся прозывати Руская земля. О семъ бо увѣдахомъ, яко при семъ цари приходиша Русь на Царьгородъ, яко же пишется въ лѣтописаньи Грейстѣмъ. Тѣмже отселе почнемъ и числа положимъ ³⁾.

859. Имаху дань Варязи изъ заморья на Чюди и на Словѣнѣхъ, на Мери и на Всѣхъ ⁴⁾, и на Кривичѣхъ, а Козари имаху на Полянѣхъ, и на Сѣверѣхъ, и на Вятичѣхъ.

862. Изгнаша Варяги за море, и не даша имъ дани, и почаша сами въ собѣ володѣти, и не бѣ въ нихъ правды, и вѣстародъ на родъ, и быша въ нихъ усобицѣ, и воевати почаша сами на ся. И рѣша сами въ себѣ: „поищемъ собѣ князя, иже бы володѣлъ нами и судилъ по праву“. И идоша за море къ Варягомъ, къ Руси: сиде бо тии звахуся Варязи Русь, яко се друзии зовутся Свие, друзии же Урмане, Анѣгляне, друзии Гѣте, тако и си. Рѣша Руси Чудь, и Словѣни, и Кривичи и Вси: „земля наша велика и обилна, а наряда въ ней нѣтъ; да поидѣте княжитъ и володѣти нами“. И избрашася 3 брата съ роды своими, и пояша по собѣ всю Русь, и придоша: старѣйшій, Рюрикъ, сѣде Новѣгородѣ, а другой, Синеусъ, на Бѣлѣозерѣ, а третий, Труворъ, Изборѣстѣ. И отъ тѣхъ Варягъ прозвася Руская земля. По двою же лѣту Синеусъ умре, и братъ его Труворъ; и прия власть Рюрикъ, и раздая мужемъ своимъ грады: овому Полотескъ, овому Ростовъ, другому Бѣлоозеро. И бяста у него 2 мужа, не племени его, но боярина, и та испросистася ко Царюгороду съ родомъ своимъ. И поидоста

¹⁾ Твор. падежъ.

²⁾ Индиктъ—періодъ въ 15 лѣтъ.

³⁾ Къ 852 году лѣтописецъ ошибочно относитъ походъ Аскольда и Дира, совершенный (по греческимъ извѣстіямъ) въ 865 году.

⁴⁾ Весь, финское племя, жившее у Бѣлоозера.

по Днѣпру и идуче мимо и узрѣста на горѣ градокъ, и упрошаста и рѣста: „чий се градокъ?“ Они же рѣша: „была суть 3 братья, Кий, Щекъ, Хоривъ, иже сдѣлаша градокъ съ, и изгибоша, и мы сѣдимъ, платяче дань Козаромъ“. Асколдъ же и Диръ остаа въ градѣ семь, и многи Варяги съвокуписта, и на часта владѣти Польскою землею, — Рюрику же княжашу въ Новѣгородѣ.

866. Иде Асколдъ и Диръ на Греки и приидоша въ 14 лѣто Михаила цесаря, Цесарю же отшедшю на Огаряны ¹⁾, и дошедшю ему Черные рѣки, вѣсть епархъ посла къ нему, яко Русь на Царьгородъ идетъ, и вратися царь. Си же внутри Суду ²⁾ вшедше, много убийство крестьяномъ створиша, и въ двою сту корабль Царьградъ оступиша. Цесарь же едва въ градъ вниде, и съ патрехомъ съ Фотьемъ приде къ сущей церкви святѣй Богородицѣ Влахѣрнѣ, и всю ночь молитву створиша, таже божественую святыя Богородица ризу съ пѣсньми изнесъше въ рѣку омочиша. Тишинѣ сущи и морю укротившюся, абѣ буря вѣста съ вѣтромъ и, волнамъ вельямъ вѣставшимъ, безбожныхъ Руси корабля смяте и къ берегу приверже, и изби ѣ, яко мало ихъ отъ таковыя бѣды избѣгнуша и въ свояси възвратишася.

879. Умершю Рюрикови, предасть княженъе свое Олгови, отъ рода ему сущю, въдавъ ему сынъ свой на руцѣ, Игоря, — бѣ бо дѣтескъ вельми.

882. Поиде Олегъ, поимъ воя многи: Варяги, Чюдъ, Словѣни, Мерю, Весъ, Кривичи, и приде къ Смоленску и прия градъ, и посади мужъ свой; оттуда поиде внизъ, и взя Любець, и посади мужъ свой. И приде къ горамъ къ Киевскимъ, и увѣда Олегъ, яко Асколдъ и Диръ княжита, и похорони вои въ лодьяхъ, а другия назади остави, а самъ приде, нося Игоря дѣтска. И приплу подъ Угорское, и посла ко Асколду и Диру, глаголя: „Яко гость ³⁾ есмь, и идемъ въ Греки отъ Олга и отъ Игоря княжича; да придѣта къ намъ, къ родомъ своимъ“. Асколдъ же и Диръ придоста, и выскакаша вси прочи изъ лодья, и рече Олегъ Асколду и Дирови: „вы нѣста князя, ни рода князя, но

¹⁾ Арабы.

²⁾ Гавань Константинополя.

³⁾ Купецъ.

азъ есмь роду княжа“, и вынесоша Игоря: „а се есть сынъ Рюриковъ“. И убиша Асколда и Дира, и несоша на гору, и погребоша ѿ на горѣ, еже ся ныне зоветъ Угорьское, кде ныне Ольминъ дворъ; на той могилѣ поставиша церковь святаго Николу; а Дирова могила за святою Ориною. И сѣде Олегъ княжа въ Киевѣ, и рече Олегъ: „се буди мати градомъ Русьскимъ“. И бѣша у него Варязи, и Словѣни и прочи прозвашася Русью. Се же Олегъ нача города ставити, и устави дани Словѣномъ, Кривичемъ и Мери, и устави Варягомъ дань даяти отъ Новгорода гривень ¹⁾ 300 на лѣто, мира дѣля, еже до смерти Ярославѣ даяше Варягомъ.

883. Поча Олегъ воевати Деревляны и прилучивъ ѿ, имаше на нихъ дань по чернѣ кунѣ.

884. Иде Олегъ на Сѣверяне, и побѣди Сѣверяны, и возложи на нь дань легъку, и не дасть имъ Козаромъ дани платити, рекъ: „азъ имъ противенъ, а вамъ нечему“.

885. Посла къ Радимичемъ рька ²⁾: „кому дань даете?“ Они же рѣша: „Козаромъ“. И рече имъ Олегъ: „не дайте Козаромъ, но мнѣ дайте“. И вдаша Ольгови по щялягу ³⁾, яко же и Козаромъ даяху. И бѣ обладая Олегъ Поляны, и Деревляны, и Сѣверены, и Радимичи, а съ Угличи и Тѣверци имяше дань.

898. Идоша Угри мимо Киевъ горою, еже ся зоветъ нынѣ Угорьское, и пришедъше къ Днѣпру стаха вежами ⁴⁾; бѣша бо ходяще аки се Половци. Пришедше отъ вѣстока и устремишася чересь горы великия, яже прозвашася горы Угорьския, и почаша воевати на живущая ту Волохи и Словѣни. Сѣдяху бо ту прежде Словѣни, и Волохове прияша землю Словеньску; посемъ же Угри погнаша Волъхи, и наслѣдиша землю ту, и сѣдоша съ Словѣны, покоривше ѿ подъ ся, и оттоле прозвася земля Угорьска. И начаша възвати Угри на Мораву и на Чехи. Симъ бо первое предложены книги Моравѣ, яже прозвася грамота Словѣньская, яже грамота есть въ Руси и въ Болгарѣхъ Дунайскихъ. Словѣномъ живущимъ крещенымъ и княземъ ихъ, Ростиславъ, и Свято-

¹⁾ Гривна равнялась приблизительно полуфунту серебра.

²⁾ Вм. рькы — (говоря).

³⁾ Монета

⁴⁾ Палатки.

пѣлкѣ, и Коцелѣ послаша ко царю Михаилу глаголюще: „земля наша крещена, и нѣсть у насъ учителя, иже бы ны наказалъ, и поучалъ насъ, и протолковалъ святыя книги; не разумѣмъ бо ни Гречьску языку, ни Латыньску; ѡни бо ны инако учать, а ѡни и инако; тѣмже не разумѣмъ книжнаго образа ни силы ихъ. И послѣте ны учителя, иже ны могутъ сказати книжная словеса и разумъ ихъ“. Се слышавъ царь Михаилъ, и созва философы вся, и сказа имъ рѣчи вся Словѣнскихъ князь. И рѣша философи: „есть мужъ въ Селуни, именемъ Левъ, и суть у него сынове разумиви языку Словѣнску, хитра 2 сына у него философа“. Се слышавъ царь, посла по ня въ Селунь ко Львови, глаголя: „посли къ намъ въскорѣ сына своя, Мефодія и Костянтина“. Се слышавъ Левъ, въскорѣ посла ѱ, и придоста ко цареви и рече има: „се прислалася ко мнѣ Словѣнська земля, просящи учителя собѣ, иже бы моглъ имъ протолковати святыя книги; сего бо желаютъ“. И умолена быста царемъ, и посла ѱ въ Словѣнскую землю къ Ростиславу, и Святополку, и Къцелови. Сима же пришедъшема, начаста съставляти писмена азбукѣвная Словѣнски, и преложиша Апостолъ и Еуангелъе; и ради быша Словѣни, яко слышаша величѣя Божия своимъ языкомъ. Посемъ же преложиша Псалтырь, и Охтайкъ, и прочая книги. И всташа нѣдци на ня, ропщуще и глаголюще: „яко не достоитъ ни которому же языку имѣти буквѣвъ своихъ, развѣ Еврѣи и Грекъ, и Латинъ, по Пилатову писанью, еже на крестѣ Господни написа“. Се же слышавъ папѣжъ Римскій, похули тѣхъ, иже ропщутъ на книги Словѣнския, река: „да ся исполнить книжное слово, яко въсхвалять Бога вси языци; другое же: вси възглаголютъ языки величѣя Божья, якоже дастъ имъ Святый Духъ отвѣщевати; да аще кто хулитъ Словѣнскую грамоту, да будетъ отлученъ отъ церкви, донде ся исправитъ; ти бо суть волци, а а не овца, яже достоитъ отъ плода знати ѱ и хранитися ихъ. Вы же, чада Божья, послушайте ученѣя и не отрините наказанѣя ¹⁾ церковнаго, яко же вы наказалъ Мефодій, учитель вашъ“. Константинъ же възвратися въспять, и иде учить Болгарьскаго языка, а Мефодій оста въ Моравѣ. Посемъ же Коцелъ князь

¹⁾ Наставленіа.

постави Мефодья епископа въ Пании ¹⁾, на столѣ святаго Ондроника апостола, единого отъ 70, ученика святаго апостола Павла. Мефодий же посади 2 попа скорописца зѣло и преложи вся книги исполнь ²⁾ отъ Гречьска языка въ Словѣнескъ. А Словѣньскый языкъ и Рускый одно есть: отъ Варягъ бо прозвашася Русью, а первое бѣша Словене.

903. Игоревѣ же възрастѣшю, и хожаше по Олзѣ, и слушаше его; и приведоша ему жену отъ Пьскова, именемъ Олгу.

907. Иде Олегъ на Греки, Игоря оставивъ Киевѣ; поя же множество Варягъ, и Словенъ, и Чюдъ, и Кривичи, и Мерю, и Деревляны, и Радимичи, и Поляны, и Сѣверъ, и Вятичи, и Хорваты, и Дулѣбы, и Тиверцы, яже суть толковины ³⁾. Си вси звахуться отъ Грекъ Великая Скуѣ. И съ сими со всѣми поиде Олегъ на конехъ и на кораблехъ, и бѣ числомъ кораблей 2000 и прииде къ Царюгороду, и Греки замкоша Судъ, а градъ затвориша. И выиде Олегъ на брегъ, и воевати нача, и много убийство сотвори около града Грекомъ, и разбиша многы полаты, и пожгоша церкви; а ихже имаху плѣнники, овѣхъ посекаху, другия же мучаху, иныя же растреляху, а другыя въ море вметаху, и ина много зла творяху Русь Грекомъ, елико же ратники творять. И повелѣ Олегъ воемъ своимъ колеса издѣлати и воставити на колеса корабля; и бывшую покосну ⁴⁾ вѣтру, въспяша парусы съ поля, и идяше къ граду. И видѣвше Греци и убояшася, и рѣша выславше ко Олгови: „не погубляй града, имемъся по дань, яко же хочещи“. И устави Олегъ воя, и вынесоша ему брашно и вино, и не прия его; бѣ бо устроено со отравою. И убояшася Греци, и рѣша: „нѣсть се Олегъ, но святой Дмитрей, посланъ на ны отъ Бога“. — И заповѣда Олегъ дань даяти на 2000 корабль, по 12 гривень на человѣкъ, а въ корабли по 40 мужъ; и яшася Греки по се. — И почаша Греци мира просити, дабы не воевалъ Грецкыя земли. Олегъ же мало отступивъ отъ града, нача миръ творити съ царьма Грецкима, со Леономъ и Александромъ, посла къ нима въ градъ Карла, Фарлоа, Вельмуда, Рулава и Стемида, глаголя: „имите ми ся по дань“. И рѣша

¹⁾ Паннонія.

²⁾ Сполна.

³⁾ Слово неизвѣстнаго значенія.

⁴⁾ Попутный.

Греци; „чего хочещи дамы ти“. И заповѣда Олегъ дати воемъ на 2000 корабль по 12 гривенъ на ключь ¹⁾, и потомъ даяти уклады на Русьскыя грады: первое на Киевъ, таже на Черниговъ, на Переяславль, на Полтѣскъ, на Ростовъ, на Любечъ и на прочая города, по тѣмъ бо городомъ сядяху велиции князи, подъ Олгомъ суще.—„Да приходячи изъ Руси съли слѣбное ²⁾ емлють елико хотячи, а иже придуть гости да емлють мѣсячину на 6 мѣсяць: хлѣбъ, и вино, и мясо, и рыбы, и овощь; и да творять имъ мовъ, елико хотять; поидучи же домовъ въ Русь, да емлють у царя вашего на путь брашно, и якори, и ужа ³⁾, и парусы, и елико имъ надобе“. И яшася Греци и рѣста царя и боярьство все: „аще приидуть Русь безъ купли, да не взимають мѣсячины; да запрѣтитъ князь словомъ своимъ приходящимъ Руси здѣ, да не творять пакости въ селѣхъ въ странѣ нашей. Приходяще Русь да витають у святаго Мамы, и послеть царьство наше, и да испишють имена ихъ, и тогда возмутъ мѣсячное свое,—первое отъ города Кіева, и паки изъ Чернигова и изъ Переяславля, и прочии гради; и да входятъ въ градъ одними ворота со царевымъ мужемъ, безъ оружья, мужъ 50, и да творять куплю, якоже имъ надобе, не платяче мыта ⁴⁾ ни въ чемъ же“. Царь же Леонъ съ Олександромъ миръ сотвориста съ Олгомъ, имшеся по дань и ротѣ ⁵⁾ заходивше межы собою, целовавше сами крестъ, а Ольга водивше на роту, и мужи его по Рускому закону кляшася оружьемъ своимъ, и Перуномъ, богомъ своимъ, и Волосомъ, скотьемъ богомъ, и утвердиша миръ.—И рече Олегъ: „исшійте парусы паволочиты ⁶⁾ Руси, а Словеномъ кропиньныя“ ⁷⁾, и бысть тако; и повѣси щитъ свой на вратехъ, показуя побѣду, и поиде отъ Царяграда. И воспяша Русь парусы паволочиты, а Словене кропиньны, и раздрая вѣтръ; и рѣша Словени: „имемся своимъ толстинамъ ⁸⁾, не

¹⁾ На корабль. „Ключомъ“ назывался багоръ, которымъ привлекали лодки къ берегу (Солов. I, 344).

²⁾ Посольское (что слѣдуетъ послу).

³⁾ Веревка.

⁴⁾ Пошлина.

⁵⁾ Присяга

⁶⁾ Шелковые.

⁷⁾ Полотняные.

⁸⁾ Холстинные.

даны суть Словѣномъ прѣ ¹⁾ кропинныя“. И приде Олегъ къ Киеву, неся злато, и паволоки, и овощи, и вина и всякое узорочье ²⁾. И прозваша Олга „вѣщій“ ³⁾: бяху бо людие погани и невѣ-голоси ⁴⁾.

912. Посла мужи свои Олегъ построити мира и положити рядъ межю Русью и Греки. *(Слѣдуетъ текстъ договора, переведенный съ греческаго)* ⁵⁾. Царь же Леонъ почти послы Рускые дарми, златомъ, и паволоками, и фюфудьями ⁶⁾, и пристави къ нимъ мужи свои показати имъ церковную красоту, и полаты златыя и въ нихъ сущая богатество, злато много и паволоки и каменье драгое, и страсти Господня, и венець, и гвоздие и хламиду багряную, и мощи святыхъ, учаще я къ вѣре своей и показующе имъ истинную вѣру, и тако отпусти я въ свою землю съ честию великою.—И живяше Олегъ миръ имѣя ко всѣмъ странамъ, княжа въ Киевѣ. И прispѣ осень, и помяну Олегъ конь свой, иже бѣ поставилъ кормити я не вседати на нь, бѣ бо въпрашалъ волъхвовъ и кудесникъ: „отъ чего ми есть умерети?“ И рече ему кудесникъ одинъ „княже! конь, его же любиши и ѣздиши на немъ, отъ того ти умерети“. Олегъ же примъ въ умъ, си рече: „николи же всяду на нь, ни вижу его боле того“. И повелѣ кормити ѣ и не водити его къ нему, и пребы нѣколико лѣтъ не видѣ его, дондеже на Греки иде. И пришедшю ему къ Киеву и пребывшю 4 лѣта, на пятое лѣто помяну конь, отъ него же бяхуть рекли волсви умерети, и призва старейшину конюхомъ, рече: „где есть конь мѣй, его же бѣхъ поставилъ кормити и бюсти его?“ Онъ же рече: „умерлъ есть“. Олегъ же посмѣяся и укори кудесника, река: „то ти неправо глаголють волсви, но все лжа есть: конь умерлъ есть, а я живъ“. И повелѣ оседлати конь: „а то вижу кости его“. И прииде на мѣсто, идѣже бѣ

¹⁾ Паруса.

²⁾ Всякаго рода дорогая утварь.

³⁾ Чародѣй.

⁴⁾ Язычники и невѣжды.

⁵⁾ Мирныя условія съ Греками приведены лѣтописью въ четырехъ редакціяхъ. а) Первая: „И заповѣда Олегъ.... и яшася Греци по се“. б) Вторая: „И почаша Греци мира просити.... подъ Олгомъ суще“. с) Третья: „Да приходячи.... и утвердиша миръ“. д) Четвертая—подлинный договоръ.

⁶⁾ Одежды.

лежаще кости его голы и лобъ голъ, и ссѣде съ коня, и посмеяся рече: „отъ сего ли лба смърть было взяти мнѣ?“ И вѣступи ногою на лобъ; и выникнувши змия изо лба и уклюну въ ногу, и съ того разболѣся и умре. И плакашася людие вси плачемъ великимъ, и несоша, и погребоша его на горѣ, еже глаголется Щековица; есть же могила его и до сего дни, словоѣть могила Ольгова. И бысть всѣхъ лѣтъ княжения его 33.—Се же дивно, яко отъ волхвованья собывается чародѣйство. *(Слѣдуетъ разсказъ о чародѣѣ Аполлоніи Тіанскомъ и о людяхъ, пророчествовавшихъ «именемъ Господнимъ».)*

913. Поча княжити Игорь по Олзѣ. И Деревляне затворишася отъ Игоря по Олговѣ смерти.

914. Иде Игорь на Деревляны, и побѣдивъ ѿ, и возложи на ня дань болши Олговы.

915. Приидоша Печенѣзи первое на Рускую землю, и сотворивше миръ съ Игоремъ и приидоша къ Дунаю.

941. Иде Игорь на Греки, и послаша Болгаре вѣсть ко царю, яко идуѣ Русь на Царьградъ, скѣдїи ¹⁾ 10 тысящъ. Иже придоша, и приплуша, и почаша воевати и Судъ весь пожгоша. Ихже емше, овѣхъ растинаху, другия аки странъ ²⁾ поставляюще и стрѣляху въ ня, гвозди желѣзныи посреди главы вѣбивахуть имъ; много же святыхъ церквей огневи предаша, монастырѣ и села пожгоша, и имѣнья немало отъ обою ³⁾ страну взяша. Потомъ же пришедъшемъ воемъ отъ вѣстока, обидоша Русь около. Сѣвѣщаша Русь, изидоша въоружившеся на Греки, и брани межю ими бывши зѣли, одва одолѣша Гръци; Русь же вѣзвратишася къ дружинѣ своей къ вечеру и на ночь влѣзоша въ лодыи и отбѣгоша. Феофанъ ⁴⁾ же сустрѣте ѿ въ олядехъ со огнемъ, и пущати нача трубами огнь на лодѣ Руския, и бысть видѣти страшно чюдо. Русь же видящи пламянь, вѣѣтахуся въ воду морскую, хотяще убрести; и тако прочии вѣзвратишася вѣсвосяси. Тѣмже пришедшимъ въ землю свою, и повѣдаху кожде своимъ о бывшемъ и о ляднѣмъ огни: „якоже молонья, рече, иже на небесѣхъ, Гръци имуть у собе, и се пущающе жежагаху насъ, сего ради не одолѣхомъ

¹⁾ Лодка.

²⁾ Цѣль.

³⁾ Отъ европейской и азіатской.

⁴⁾ Полководецъ.

имъ". Игорь же пришедъ нача совокупляти воѣ многи, и посла по Варяги многи за море, вабя¹⁾ ѧ на Греки, паки хотя поити на ня.

944. Игорь совокупивъ вои многи: Варяги, и Русь, и Поляны, и Словѣни, и Кривичи, и Тѣверьцѣ, и Печенѣги ная, и тали²⁾ у нихъ поя, поиде на Греки въ лодьяхъ и на конихъ, хотя мѣстити себе. Се слышавше Корсунци, послаша къ Роману, глаголюще: „се идуть Русь бещисла корабль, покрыли суть море корабли“. Также и Болгаре послаша вѣсть глаголюще: „идуть Русь, и наяли суть къ собѣ Печенѣги“. Се слышавъ царь, посла къ Игорю лучиѣ боляре, моля и глаголя: „не ходи, но возьми дань, юже ималъ Олегъ, придамъ и еще къ той дани“. Также и къ Печенѣгомъ посла паволоки и злато много. Игорь же дошедъ Дуная созва дружину, и нача думати, и повѣда имъ рѣчь цареву. Рѣша же дружина Игорева: „да аще сиче³⁾ глаголетъ царь, то что хотимъ боле того,—не бившеся имати злато, и сребро, и паволоки? еда кто вѣсть, кто одолѣеть, мы ли, онѣ ли? ли съ моремъ кто свѣтенъ?⁴⁾ се бо не по земли ходимъ, но по глубинѣ морьстѣй; обьча смерть всѣмъ“. Послуша ихъ Игорь, и повелѣ Печенѣгомъ воевати Болъгарьску землю; а самъ возьмъ у Грекъ злато и паволоки и на вся воя, и възвратися въспясть, и приде къ Киеву въсвося.

945. Присла Романъ, и Костянтинъ и Степанъ слы къ Игореву построити мира; Игорь же глагола съ ними о мирѣ. Посла Игорь мужѣ своя къ Роману, Романъ же созва боляре и сановники. Приведоша Руския слы, и велѣша глаголати и писати обоихъ рѣчи на харатьѣ. (*Слѣдуетъ текстъ договора*).

Послании же слы Игъремъ придоша къ Игореву со слы Гречьскими, и повѣдаша вся рѣчи царя Рамана. Игорь же призва слы Гречьския, рече имъ: „глаголите, что вы казалъ царь?“ И рѣша слы цареви: „се посла ны царь, радъ есть миру, хочетъ миръ имѣти со княземъ Рускимъ и любѣве; твои слы водили суть царѣ наши ротѣ, и насъ послаша ротѣ водить тебе и мужъ твоихъ“.

1) Приглашать.

2) Заложникъ.

3) Такъ.

4) Можетъ ли кто съ моремъ сговориться.

Обѣщася Игорь сие створити. Заутра призва Игорь слы, и приде на холмъ, кде стояше Перунъ, и покладоша оружье свое, и щиты и золото, и ходи Игорь ротъ и люди его, елико поганныхъ Руси; а хрестеяную Русь водиша ротъ въ церкви святаго Ильи, яже есть надъ ручаемъ: се бо бѣ сборная церви, мнози бо бѣша Варязи хрестеяни. Игорь же утвердивъ миръ съ Греки, отпусти слы, одаривъ скорою ¹⁾, и чалядью ²⁾, и воскомъ, и отпусти я; сли же придоша ко цареви и повѣдаша вся рѣчи Игоревы и любовь къ Грекомъ Игорь же нача княжити въ Киевѣ, миръ имѣя ко всѣмъ странамъ. И приспѣ осень, и нача мыслити на Деревляны, хотя промыслити большюю дань.

Въ се же лѣто рекоша дружина Игоревы: „отроки Свѣнльжи ³⁾ изодѣлися суть оружиемъ и порты ⁴⁾, а мы нази; поиди, княже, съ нами въ дань, да и ты добудеши и мы“. И послуша ихъ Игорь, иде въ Дерева въ дань, и примышляше къ первой дани, и насиляше имъ мужи его; возъемавъ дань, поиде въ градъ свой. Идущу же ему въспять, размысливъ рече дружинѣ своей: „идѣте съ данью домови, а я возъвращюся, похожю и еще“. Пусти дружину свою домови, съ маломъ ⁵⁾ же дружины возъвратися, желая больша имѣнья. Слышавше же Деревляне, яко опять идетъ, сдумавше со княземъ своимъ Маломъ: „аще ся въвадитъ ⁶⁾ волкъ въ овцѣ то выносить все стадо, аще не убьютъ его; тако и се: аще не убьемъ его, то вся ны погубить“. И послаша къ нему глаголюще: „почто идеши опять? поималъ еси всю дань“. И не послуша ихъ Игорь, и вышедши изъ града Изъкорѣстѣня Деревлене убиша Игоря и дружину его; бѣ бо ихъ мало. И погребенъ бысть Игорь, и есть могила его у Искорѣстѣня града въ Деревѣхъ и до сего дне. Вольга же бѣше въ Киевѣ съ сыномъ своимъ съ дѣтскомъ Святославомъ, и кормилецъ ⁷⁾ его Асмудъ,

¹⁾ Мѣха (шкуры).

²⁾ Рабы.

³⁾ Свѣнельдъ-воевода Игоревъ, имѣвшій—какъ видно изъ этого мѣста—и свою дружину.

⁴⁾ Богаты оружіемъ и одеждами.

⁵⁾ Т. е. числомъ.

⁶⁾ Повадится.

⁷⁾ Воспитатель.

и воевода бѣ Свѣнелдъ, отецъ Мистишинъ. Рѣша же Деревляне: „се князя убихомъ Рускаго; поимемъ жену его Вольгу за князь свой Малъ и Святослава, и створимъ ему, яко же хотимъ“. И послаша Деревляне лучьшии мужи, числомъ 20, въ лоды къ Ользѣ, и присташа подъ Боричевымъ въ лоды. Бѣ бо тогда вода текущи въздолѣ горы Киевския, и на подолы не сѣдаху людье, но на горѣ. И повѣдаша Ользѣ, яко Деревляне придоша, и возва я Ольга къ собѣ и рече имъ: „добри гостье придоша“; и рѣша Деревляне: „приходомъ, княгине“. И рече имъ Ольга: „да глаголете, что ради придосте сѣмо?“ Рѣша же Деревляне: „посла ны Дервьска земля, рекущи сице: „мужа твоего убихомъ, баше бо мужъ твой аки волкъ восхищая и грабя, а наши князи добри суть, иже распасли суть ¹⁾ Деревьску землю, да поиде за князь нашъ за Малъ“. (Бѣ бо имя ему Малъ, князю Деревьску). Рече же имъ Ольга: „люба ми есть рѣчь ваша,—уже мнѣ мужа своего не крѣсити; но хочу вы почтити наутрия предъ людymi своими, а ныне идѣте въ лодью свою, и лязите въ лоды величающесе, и азъ утро послю по вы, вы же рѣцѣте: не едемъ на конѣхъ, ни пѣши идемъ, но понесѣте ны въ лодѣ; и възнесутъ вы въ лоды“. И отпусти я въ лодью. Ольга же поелѣ ископати яму велику и глубоку на дворѣ теремьстѣмъ, внѣ града. И заутра Волга, сѣдящи въ теремѣ, посла по гости, и придоша къ нимъ глаголюще: „зоветь вы Ольга на честь велику“. Они же рѣша: „не едемъ на конѣхъ, ни на возѣхъ, ни пѣши идемъ, понесѣте ны въ лоды“. Рѣша же Кияне: „намъ неволя; князь нашъ убьенъ, а княгини наша хочетъ за вашъ князь“. И понесоша я въ лоды. Они же сѣдаху гордящесе; и принесоша я на дворъ къ Ользѣ и, несъше, вринуша я въ яму и съ лодьею. Приникъши Ольга и рече имъ: „добра ли вы честь?“ Они же рѣша: „пущены Игоревы смерти“. И повелѣ засыпати я живы, и посыпаша я. И пославши Ольга къ Деревлянѣмъ, рече имъ: „да аще мя просите право, то пришлите мужа нарочиты ²⁾, да въ велицѣ чти приду за вашъ князь,—еда ³⁾ не пустятъ мене людье Киевьстии“. Се слышавше Деревляне, избраша лучьшии мужи, иже дерьжаху Деревьску землю, и послаша по ню. Деревлянѣмъ же пришедъ-

¹⁾ Привели въ порядокъ.

²⁾ Именитыхъ.

³⁾ А то пожалуй.

шимъ, повелѣ Олега мовѣ створити, рѣкуще сиче: „измывшесѣ придите ко мнѣ“. Они же пережыгоша истопку ¹⁾, и влѣзоша. Деревляне, начаша сѣ мыти; и запроша о нихъ истобѣку, и повелѣ зажещи ю отъ дверей, ту изгорѣша вси. И посла къ Деревлянѣмъ, рѣкущи сиче: „се уже иду къ вамъ, да пристроите меды многи въ градѣ, идеже убисте мужа моего, да поплачусѣ надъ гробомъ его и створю трызну мужю своему“. Они же то слышавше, съвезоша меды многи зѣло и възвариша. Ольга же, поимши мало дружины, легѣко идущи приде къ гробу его, и плакася по мужи своемъ; и повелѣ людемъ своимъ съсуги ²⁾ могилу велику, и яко соспоша, и повелѣ трызну творити. Посемъ сѣдоша Деревляне пити, и повелѣ Ольга отрокомъ своимъ служити предъ ними, и рѣша Деревляне къ Ользѣ: „кдѣ сугѣ дружина наша, ихъ же послахомъ по тя?“ она же рече: „идутъ по мнѣ съ дружиною мужа моего“. И яко упишасѣ Деревляне, повелѣ отрокомъ своимъ пити на ня ³⁾, а сама отъиде кромѣ ⁴⁾, и повелѣ дружинѣ своей сѣчи Деревляны; и исѣкоша ихъ 5000. А Ольга возъвратися Киеву и пристрои вои на прокъ ихъ.

946. Ольга съ сыномъ своимъ Святославомъ собра вои многи и храбры, и иде на Девельску землю. И изидоша Деревляне противу, и сънемъшемасѣ обѣма полкома на сугѣ ⁵⁾, сугу копьемъ Святославъ на Деревляны, и копье летѣ сквозѣ уши коневи ⁶⁾, и удари въ ноги коневи: бѣ бо дѣтескъ. И рече Свѣнелдъ и Асмолдъ: „князь уже почалъ; потягнѣте, дружина, по князѣ“. И побѣдиша Деревляны; Деревляне же побѣгоша и затворишасѣ въ градѣхъ своихъ. Ольга же устремися съ сыномъ своимъ на Искоростѣнь градъ, яко тѣе бяху убили мужа ея, и ста около града съ сыномъ своимъ; а Деревляне затворишасѣ въ градѣ и боряхусѣ крѣпко изъ града,—вѣдѣху бо, яко сами убили князя и на что сѣ предати ⁷⁾. И стоя Ольга лѣто, и не можаше взяти града, и умысли сиче: посла

¹⁾ Истопивши: избу.

²⁾ Насыпать.

³⁾ Питъ за ихъ здоровье. Ср. подъ 1066 годомъ: „княже! хочу на тя пити“.

⁴⁾ Въ сторону.

⁵⁾ Когда оба полка сошлись вмѣстѣ.

⁶⁾ Промежъ ушей.

⁷⁾ Что съ ними будетъ, если сдадутся.

ко граду глаголющи: „что хотите досѣдѣти? а вси гради ваши предашася мнѣ, и ялися по дань, и дѣлають нивы своя и землѣ своя; а вы хотите измѣрети гладомъ, не имучеся по дань“. Деревляне же рекоша: „ради ся быхомъ яли по дань, но хоцещи мѣщати мужа своего“. Рече же имъ Ольга: „яко азъ мстила уже обиду мужа своего, когда придоша Киеву, и второе, и третье, когда творихъ трызну мужеву своему; а уже не хоцю мѣщати, но хоцю дань имати помалу, и смирившися съ вами пойду опять“. Рекоша же Деревляне: „што хоцещи у насъ? ради даемъ медомъ и скорою“. Она же рече имъ: „нынѣ у васъ нѣсть меду, ни скоры, но мало у васъ прошю: дадите ми отъ двора по 3 голуби да по 3 воробьи; азъ бо не хоцю тяжьки дани възложить, якоже мужъ мой, сего прошю у васъ мало, вы бо есте изънемогли въ осадѣ, да сего у васъ прошю мало“. Деревляне же ради бывше, и собраша отъ двора по 3 голуби и по 3 воробьи, и послаша къ Ользѣ съ поклономъ. Вольга же рече имъ: „се уже есте покорилися мнѣ и моему дѣтяти, а идѣте въ градъ, а я завтра отступлю отъ града и пойду въ градъ свой“. Деревляне же ради, бывше внидоша въ градъ, и повѣдаша людемъ, и обрадовашася людье въ градѣ. Волга же раздая воемъ по голуби комуждо, а другимъ по воробьеви и повелѣ къ коемуждо голуби и къ воробьи привязывати цѣрь ¹⁾, оберты-
 вающе въ платки малы, нитькою поверзываютъ къ коемуждо ихъ; и повелѣ Ольга, яко смерчеся, пустити голуби и воробьи воемъ своимъ. Голуби же и воробьеви полетѣша въ гнѣзда своя, голуби въ голубьники, воробьеви же подъ стрѣхи; и тако възгарахуся голубьници, ово клѣти, ово вежѣ, ово ли одрины ²⁾. и не бѣ двора, идеже не горяше, и не бѣ лѣзѣ гасити, вси бо двори възгорѣшася. И побѣгоша людье изъ града, и повелѣ Ольга воемъ своимъ имати я: старѣйшины же града изънима, и прочая люди овыхъ изби, а другия работѣ ³⁾ предасть мужемъ своимъ, а прокъ ⁴⁾ ихъ остави платити дань. И възложи на ня дань тяжьку: 2 части дани идета Киеву, а третья Вышегороду къ Ользѣ: бѣ бо Вышегородъ градъ Вольвинъ. И иде Вольга по

¹⁾ Сѣра.

²⁾ Вѣжа-палатка, шатерь, чердакъ; Одрина-спальня.

³⁾ Рабство.

⁴⁾ Остатокъ.

Деревьстѣй земли съ сыномъ своимъ и съ дружиною, уставляющи уставы и уроки; и суть стоновища ея и ловища (и до сего дне). И приде въ градъ свой Киевъ съ сыномъ своимъ Святославомъ, и пребывши лѣто едино,

947, иде Вольга Новугороду, и устави по Мьстѣ повосты ¹⁾ и дани и по Лузѣ оброки и дани; и ловища ея суть по всей земли, знамянья, и мѣста, и повосты, и сани ея стоятъ въ Плесковѣ и до сего дне, и по Днѣпру перевѣсища ²⁾ и по Деснѣ, и есть село ея Ольжичи и доселе.

955. Иде Ольга въ Греки, и приде Царюгороду. Бѣ тогда царь Костянтинъ, сынъ Леоновъ; и приде къ нему Ольга, и видѣвъ ю добру сущю зѣло лицомъ и смыслену, удививъся царь разуму ея, бесѣдова къ ней и рекъ ей: „подобна еси царствовати въ градѣ съ нами“. Она же разумѣвши рече ко царю: „азъ пагана есмь, да аще мя хоцещи крестити, то крести мя самъ; аще ли ни, то не крещюся“. И крести ю царь съ патреархомъ. Просвѣщена же бывъши, радовашеся душею и тѣломъ; и поучи ю патреархъ о вѣрѣ. Бѣ же речено имя ей во крещенъи Олена, якоже и древняя царица, мати Великаго Костянтина. И благовослови ю патреархъ, и отпусти ю. И по крещенъи возва ю царь и рече ей: „хоцю тя пояти собѣ женѣ“. Она же рече: „како хочещи мя пояти, крестивъ мя самъ и нарекъ мя дщерею? а въ хрестянехъ того нѣсть закона, а ты самъ вѣси“. И рече царь: „переклюкала ³⁾ мя еси Ольга“. И дасть ей дары многи, злато и сребро, паволоки и съсуды различныя, и отпусти ю, нарекъ ю дщерею собѣ.—Си же Ольга приде Киеву, и присла къ ней царь Гречьскій, глаголя: „яко много дарихъ тя; ты бо глаголаше ко мнѣ, яко аще возъвращюся въ Русь, многи дары прислю ти: челядь, воскъ, и скъру и вои въ помощь“. Отвѣщавши Ольга и рече къ словъ: „аще ты, рьци, такоже постоиши у мене въ Почайнѣ, яко же азъ въ Суду, то тогда ти дамъ“; и отпусти слы, съ рекъши. Живяше же Ольга съ сыномъ своимъ Святославомъ, и учашеть ѿ мати креститися; и небрежаше того ни во уши приимати; но аще кто хотяше креститися, не браняху, но ругахуся ⁴⁾ тому: невѣрнымъ бо вѣра хрестыанска уродство есть.

¹⁾ По другому чтенію: погосты.

²⁾ Вѣроятно рыболовныя тони.

³⁾ Перехитрила.

⁴⁾ Не препятствовали, но издѣвались.

964. Князю Святославу възрастѣю и възмужавшю, нача вои совокупляти многи и храбры, и легъко ходя аки пардусъ, ¹⁾ войны многи творяше. Ходя возъ по собѣ не возяше, ни котъла, ни мясъ варя, но потонку изрѣзавъ конину ли, звѣрину ли, или говядину, на углехъ испекъ ядыше; ни шатра имяше, но подѣкладъ постлавъ и сѣдло въ головахъ; также и прочии вои его вси бяху. И посылаше къ странамъ, глаголя: „хочю на вы ити“. И иде на Оку и на Волгу, и налѣзе Вятичи, и рече Вятичемъ: „кому дань даете?“ Они же рѣша: „Козаромъ по щялягу отъ рала ²⁾ даемъ“.

965. Иде Святославъ на Козары; слышавше же Козари, изидоша противу съ княземъ своимъ Каганомъ, и съступишася битися, и бывши брани, одолѣ Святославъ Козаромъ, и градъ ихъ Бѣлу Вежю ³⁾ взя. Ясы побѣди и Касоги ⁴⁾.

966. Вятичи побѣди Святославъ, и дань на нихъ възложи.

967. Иде Святославъ на Дунай на Болгары. И бившемся обоимъ, одолѣ Святославъ Болгаромъ, и взя городъ 80 по Дунаеву, и сѣде княжа ту въ Переяславци, емля дань на Гръцѣхъ.

968. Придоша Печенѣзи на Руску землю первое, а Святославъ бѣше Переяславци, и затворися Волга въ градъ съ унуки своими: Ярополкомъ, и Ольгомъ и Володимеромъ. И оступиша Печенѣзи градъ въ силѣ велицѣ, бещислено множество около града, и не бѣ лѣзѣ изъ града вылѣсти, ни вѣсти послати; изнемогаху же людѣ голодомъ и водою. Собравшеся людѣ оной страны Днѣпра въ лодьяхъ, обѣ ону страну стояху, и не бѣ лѣзѣ внити въ Киевъ ни единому ихъ, ни изъ града къ онѣмъ. И въстужиша людѣ въ градъ и рѣша: „нѣсть ли кого, иже бы моглъ на ону страну дойти и рещи имъ: аще не подступите заутра, предатися имамы Печенѣгомъ?“ И рече единъ отрокъ: „азъ преиду“; и рѣша: „иди“. Онъ же изиде изъ града съ уздою, и ристаше сквозѣ Печенѣги, глаголя: „не видѣ ли коня никтоже?“ бѣ бо умѣя печенѣжски, и мняхуть ѣ своего. И яко приближися къ рѣцѣ, сунуся въ Днѣпръ и побреде; видѣвъше же Печенѣзи, устремишася на нь, стрѣляюще его, и не могоша ему ничто же створити. Они же видѣвъше съ оной страны, и приѣхаша въ лодыи противу ему, и

¹⁾ Рысь, барсъ.

²⁾ Плугъ.

³⁾ На Дону.

⁴⁾ Кавказскіе народы.

взяша ѿ въ лодью и привезоша ѿ къ дружинѣ; и рече имъ: „аще не подступите заутра къ городу, предатися хотять людье Печенѣгомъ“. Рече же воевода ихъ, имянемъ Прѣтичъ: „подступимъ заутра въ лодяхъ, и попадше княгиню и княжичѣ умчимъ на сю страну; аще ли сего не створимъ, погубити ны иматъ Святославъ“. Яко бысть заутра, всѣдъше въ лодьи противу свѣту ¹⁾ и въструбиша вельми, и людье въ градѣ кликнуша; Печенѣзи же мнѣша князя пришедша, побѣгоша разнѣ отъ града; и изиде Ольга съ унуки и съ людьми къ лодьямъ. Видѣвъ же се князь Печенѣжскій, възвратися единъ къ воеводѣ Прѣтичу и рече: „кто се приде?“ и рече ему: „людье оная страны“. И рече князь Печенѣжскій: „а ты князь ли еси?“ онъ же рече: „азъ есмь мужъ его, и пришелъ есмь въ сторожѣхъ, и по мнѣ идетъ полкъ съ княземъ безъ числа множество;“ се же рече грозя имъ. Рече же князь Печенѣжскій къ Прѣтичу: „буди ми другъ;“ онъ же рече: „такѣ створю“. И подаста руку межю собою, и въдасть Печенѣжскій князь Прѣтичу конь, саблю, стрѣлы; онъ же дасть ему бронѣ, щитъ, мечъ. И отступиша Печенѣзи отъ града, и не быше лѣзѣ коня напоити: на Лыбеди Печенѣзи. И послаша Кияне къ Святославу, глаголюще: „ты, княже, чюжея земли ищещи и блюдеши, а своя ся охабивъ; малымъ бо насъ не взяша Печенѣзи, и мать твою, и дѣти твои; аще не поидеши, не обраниши насъ, да пакы ны возмутъ, аще ти не жаль отчины своя, ни матере, стары суца, и дѣтий своихъ“. То слышавъ Святославъ, вбѣрзѣ всѣде на конѣ съ дружиною своею, и приде Киеву, цѣлова мать свою и дѣти своя, и съжалися о бывшемъ отъ Печенѣгъ; и собра вои, и прогна Печенѣги въ поле, и бысть миръ.

960. Рече Святославъ къ матери своей и къ боляромъ своимъ: „не любо ми есть въ Киевѣ быти, хочю жити въ Переяславци на Дунаи, яко то есть середѣ земли моеи, яко ту вся благая сходятся: отъ Грекъ злато, паволоки, вина и оwoщеве различныхъ, изъ Чехъ же, изъ Угоръ сребро и комони, изъ Руси же скоро и воскъ, медъ и челядь“. Рече ему Волга: „видиши мя болну сущю; камо хоцещи отъ мене ити? бѣ бо разболѣлася уже; рече же ему: „погребъ мя иди, яможе хоцещи“. По трехъ днехъ умре

¹⁾ На разсвѣтѣ.

Ольга, и плакася по ней сынъ ея, и внуци ея и людье вси плачемъ великомъ; и несоша и погребоша ю на мѣстѣ; и бѣ заповѣдала Ольга не твори трызны надъ собою, бѣ бо имущи презвутерь, сей похорони блаженую Ольгу. Си бысть предътекущая крестьянѣй земли аки деньница ¹⁾ предъ солнцемъ и аки заря предъ свѣтомъ, си бо сияше аки луна въ нощи, тако и си въ невѣрныхъ челоуѣцѣхъ свѣтящися.

970. Святославъ посади Ярополка въ Киевѣ, а Ольга въ Деревѣхъ. Въ се же время придоша людье Ноугородьстии, просяще князя собѣ: „аще не поидете къ намъ, то налѣземъ князя собѣ“; и рече къ нимъ Святославъ: „а бы пошелъ кто къ вамъ“. И отпръся Ярополкъ и Олегъ; и рече Добрыня: „просите Володимера“. Володимеръ бо бѣ отъ Малуши, ключницѣ Ользины; сестра же бѣ Добрыни, отецъ же бѣ има Малъкъ Любечанинъ. И рѣша Ноугородьци Святославу: „въдай ны Володимера;“ онъ же рече имъ: „вотъ вы есть“. И пояша Ноугородьци Володимера къ собѣ, и иде Володимиръ съ Добрынею Ноугороду, а Святославъ Переяславъцю.

971. Приде Святославъ въ Переяславецъ, и затворишася Болгаре въ градѣ. И излѣзоша Болгаре на сѣчу противу Святославу, и бысть сѣча велика, и одоляху Болгаре; и рече Святославъ воемъ своимъ: „уже намъ сде пасти; потягнемъ мужьски, братья и дружино!“ И къ вечеру одолѣ Святославъ, и взя градъ копьемъ, и посла къ Грекомъ, глаголя: „хочю на вы ити и взяти градъ вашъ, яко и сей“. И рѣша Греци: „мы недужи противу вамъ стати, но возми дань себѣ и на дружину свою, и повѣжьте ны, сколько васъ, да вѣдамы по числу на главы“. Се же рѣша Греци лстыче ²⁾ подъ Русью; (суть бо Греци лстивы и до сего дни). И рече имъ Святославъ: „есть насъ 20 тысящъ“, и прирече 10 тысящъ, бѣ бо Руси 10 тысящъ толко. И пристроиша Гръци 100 тысящъ на Святослава, и не даша дани; и поиде Святославъ на Греки, и изидоша противу Руси. Видѣвше же Русь убояшася зѣло множества вой, и рече Святославъ: „уже намъ нѣкамо ся дѣти, волею и неволею стати противу; да не посраимъ землѣ Рускиѣ, но ляжемъ костью ту, мертвыи бо срама не имамъ; аще ли побѣгнемъ, срамъ имамъ, и не имамъ убѣжати; но ста-

¹⁾ Утренняя звѣзда.

²⁾ Обманывающа.

немъ крѣпко, азъ же предъ вами поиду: аще моя голова ляжетъ, то промыслите собою“. И рѣша вои: „иде же глава твоя, ту и свои главы сложимъ“. И исполчашася Русь, и бысть сѣча велика, и одолѣ Святославъ, и бѣжаша Грьци; и поиде Святославъ ко граду, воюя и грады разбивая, яже стоятъ и до днешняго дне пусты. И созва царь боляре своя въ полату, и рече имъ: „что створимъ, яко не можемъ противу ему стати?“ И рѣша ему боляре: „посли къ нему дары, искусимъ ѿ, любъзнивъ ли есть злату, ли паволокамъ“. И посла къ нему злато, и паволоки и мужа мудра; рѣша ему: „глядай взора его и лица его, и смысла его;“ онъ же возьмъ дары, приде къ Святославу. И повѣдаша Святославу, яко придоша Грьци съ поклономъ, и рече: „въведѣте ѿ сѣмо“. Придоша и поклонилася ему, и положиша предъ нимъ злато и паволоки; и рече Святославъ, кромѣ зря ¹⁾, отрокомъ своимъ: „схороните“. Они же придоша ко царю, и созва царь боляры, рѣша же послании: „яко придохомъ къ нему, и вдахомъ дары, и не возрѣ на ны, и повелѣ сѣхоронити“. И рече единъ: „искуси ѿ еще, посли ему оружье“. Они же послушаша его, и послаша ему мечъ и ино оружье, и принесоша къ нему; онъ же примъ, нача хвалити, и любити, и целовати ²⁾ царя. Придоша опять ко царю, и повѣдаша ему вся бывшая, и рѣша боляре: „лютъ се мужъ хочеть быти, яко имѣнья не брежетъ, а оружье емлетъ; имися по дань“. И посла царь глаголя сиче: „не ходи къ граду, возми дань, еже хоцещи“; за маломъ бо бѣ не дошелъ Царяграда. И даша ему дань; имашеть же и за убьенныя, глаголя: „яко родъ его возметь“. Взя же и дары многы, и възвратися въ Переяславецъ съ похвалою великою. Видѣвъ же мало дружины своея, рече въ собѣ: „еда како прельстивше избьютъ дружину мою и мене“; бѣша бо мнози погибли въ полку ³⁾; и рече: „поиду въ Русь, приведу боле дружины“. И посла слы ко цареви въ Деревьстръ ⁴⁾, бо бѣ ту царь, рѣка сиче: „хочю имѣти миръ съ тобою твердъ и любовь“. Се же слышавъ царь, радъ бысть и посла къ нему дары больша первыхъ. Святославъ же прия дары, и поча думати съ дружиною своею, рѣка сиче: „аще не створимъ мира

¹⁾ Смотря въ сторону.

²⁾ Благодарить.

³⁾ Походъ.

⁴⁾ Нынѣшняя Силистрія.

со царемъ, а увѣсть царь, яко мало насъ есть, пришедше оступать ны въ градъ; а Руска земля далеча, а Печенѣзи съ нами ратьни, а кто ны поможетъ? но створимъ миръ со царемъ, се бо нынѣ ся по дань яли, и то буди довольно намъ; аще ли почнетъ не управляти дани, да изнова изъ Руси, совокупивше вои многжайша, поидемъ Царюгороду“. Люба бысть рѣчь си дружинѣ, и послаша лѣпшиѣ мужи ко цареви, и придоша въ Деревѣстръ, и повѣдаша цареви. Царь же наутрия призва ѣ, и рече царь: „да глаголють сли Рустии“. Они же рѣша: „такъ глаголетъ князь нашъ: хочу имѣти любовь со царемъ Гречьскимъ свершеную прочая вся лѣта“. Царь же радъ бысть и повелѣ писцю писати вся рѣчи Святослава на харатью ¹⁾; нача глаголати солъ вси рѣчи, и нача писецъ писати. Глагола сиче:

„Азъ Святославъ, князь Руский, яко же кляхъся, и утвержаю на свѣщанѣ семь роту свою: хочу имѣти миръ и свершену любовь съ великимъ царемъ Гречьскимъ до конца вѣка. Яко николи же помышлю на страну вашу, ни собираю вой, ни языка иного приведу на страну вашу и елико есть подъ властью Гречьскою, ни на власть Корсуньскую и елико есть городовъ ихъ, ни на страну Болгарьску; да аще инъ кто помыслить на страну вашу, да и азъ буду противенъ ему и борюся съ нимъ. Аще ли отъ тѣхъ самѣхъ прежереченыхъ не съхранимъ ²⁾, азъ же и со мною и подо мною, да имѣемъ клятву отъ Бога, въ него же вѣруемъ, въ Перуна и въ Волоса, скотья Бога, и да будемъ золоты ³⁾ яко золото, и своимъ оружьемъ да исѣчени будемъ. Се же имѣйте въ истину, яко же сотворихомъ нынѣ къ вамъ, и папихомъ на харатьи сей и своими печатями запечатахомъ“.

Створивъ же миръ Святославъ съ Греки, поиде въ лодьяхъ къ порогомъ, и рече ему воевода отень ⁴⁾ Свѣналдъ: „поиде, княже, на конихъ около, стоятъ бо Печенѣзи въ порозѣхъ“. И не послуша его, и поиде въ лодьяхъ, и послаша Переяславци къ Печенѣгомъ, глаголюще: „се идетъ Святославъ въ Русь, возьмъ имѣнье много у Грекъ и полонъ бещисленъ, съ маломъ дружины“. Слы-

¹⁾ Пергаментъ.

²⁾ Т. е. если не соблюдемъ вышесказанное.

³⁾ Желты.

⁴⁾ Отцовскій.

шавше же се Печенѣзи, заступиша пороги; и приде Святославъ къ порогомъ, и не бѣ лѣзѣ проити порогъ; и ста зимовати въ Бѣлобережьи ¹⁾, и не бѣ у нихъ брашна уже, и бѣ гладъ великъ, яко по полугривнѣ глава коняча, и зимова Святославъ ту. Веснѣ же приспѣвши,

972, поиде Святославъ въ пороги, и нападе на нь Куря, князь Печенѣжскій; и убиша Святослава, и взяша главу его, и во лѣбъ его сдѣлаша чашю, оковавше лѣбъ его, и пяху изъ него. Свѣналдъ же приде Киеву къ Ярополку. И всѣхъ лѣтъ княженья Святослава 20 и 8.

973. Нача княжити Ярополкъ.

975. Ловъ дѣющею Свѣналдицю ²⁾, именемъ Лють, ишедъ бо изъ Киева гна по звѣри въ лѣсѣ; и узрѣ ѿ Олегъ, и рече: „кто се есть?“ И рѣша ему: „Свѣналдичъ“ и заѣхавъ уби ѿ, бѣ бо ловы дѣя Олегъ. И о томъ бысть межи има ненависть, Ярополку на Ольга, и молвяше всегда Ярополку Свѣналдъ: „пойди на братъ свой и приими волость его“, хотя отмстити сыну своему.

977. Поиде Ярополкъ на Олга, брата своего, на Деревьску землю, и изиде противу его Олегъ, и ополчистася; ратившемася полкома, побѣди Ярополкъ Ольга. Побѣгъшю же Ольгу съ вои своими въ градъ, рекомый Вручай ³⁾ бѣше чересь гроблю ⁴⁾ мостъ ко вратомъ граднымъ, тѣсняячеся другъ друга пихаху въ гроблю; и спехнуша Ольга съ мосту въ дебрь. Падаху людье мнози и удавиша кони челоуѣци. И въшедъ Ярополкъ въ градъ Ольговъ, я пере власть его, и посла искать брата своего; и искавъше его не обрѣтоша; и рече единъ Деревлянинъ: „азъ видѣхъ, яко вчера спехнуша съ мосту“. И посла Ярополкъ искать брата, и влачиша трупья изъ гробли отъ утра и до полудне, и налѣзоша Ольга высподи ⁵⁾ трупья, вынесоша ѿ, и положиша ѿ на коврѣ. И приде Ярополкъ, надъ немъ плакася и рече Свѣналду: „вижь, сего ты еси хотѣлъ?“ И погребоша Ольга на мѣстѣ у города Вручего, и есть могила его и до сего дне у Вручего. И прия власть его Ярополкъ. У Ярополка же жена Грекини бѣ, и

¹⁾ При устьѣ Дуная.

²⁾ Сынъ Свѣнелда.

³⁾ Овручъ.

⁴⁾ Ровъ.

⁵⁾ Внизу.

бѣше была черницею; бѣ бо привесѣ ю отецъ его Святославъ, и вда ю за Ярополка, красоты ради лица ея. Слышавъ же Володимеръ въ Новѣгородѣ, яко Ярополкъ уби Ольга, убоявся бѣжа за море; а Ярополкъ посадники своя посади въ Новѣгородѣ, и бѣ володѣя единъ въ Руси.

980. Приде Володимеръ съ Варяги Ноугороду, и рече посадникомъ Ярополчимъ: „идѣте къ брату моему и рцѣте ему: Володимеръ идетъ на тя, пристроивайся противу битъся“. И сѣде Новѣгородѣ. И посла къ Рогѣволоду Полотъску, глаголя: „хочю пояти дщерь твою собѣ женѣ“. Онъ же рече дщери своей: „хощеши ли за Володимера?“ она же рече: „не хочю розути робичича ¹⁾, но Ярополка хочю“ (Бѣ бо Рогѣволодъ пришелъ изъ заморья, имяше власть свою въ Полотъскѣ, а Туры Туровѣ, отъ него же и Туровци прозвашася). И придоша отроки Володимерови и повѣдаша ему всю рѣчь Рогѣнѣдину, дщери Рогѣволождѣ, князя Полотъскаго; Володимеръ же собра вои многи, Варяги и Словѣни, Чюдъ и Кривичи, и поиде на Рогѣволода. Въ се же время хотяху Рогѣнѣдъ вести за Ярополка; и приде Володимеръ на Полотескъ, и уби Рогѣволода и сына его два, и дѣщерь его поя женѣ, и поиде на Ярополка. И приде Володимеръ Киеву съ вои многи и не може Ярополкъ стати противу, и затворися Киевѣ съ людьми своими и съ Блудомъ; и стояше Володимеръ обрывся на Дорожичи, межю Дорожичемъ и Капичемъ, и есть ровъ его и до сего дне.

Володимеръ же посла къ Блуду, воеводѣ Ярополчю, съ лестью глаголя: „попрійай ми; аще убью брата своего, имѣти тя хочю во отца мѣсто, и многу честь возьмешъ отъ мене; не язъ бо почалъ братью бити, но онъ; азъ же того убоявѣся придохъ на нь“. И рече Блудъ къ посломъ Володимеремъ: „азъ буду тобѣ въ сердце и въ приязньство“. И рече Блудъ Ярополку: „Кияне слются къ Володимеру, глаголюще: приступай къ граду, яко предамы ти Ярополка; побѣгни за градъ“. И послуша его Ярополкъ, и избѣгъ предъ нимъ затворися въ градѣ Родѣни на усть Рси рѣки, а Володимеръ вниде въ Киевъ, и осѣде Ярополка въ Роднѣ, и бѣ гладъ великъ въ немъ, и есть притча до сего дне: „бѣда аки въ Роднѣ“. И рече Блудъ Ярополку: „видиши, колько вой

¹⁾ Мать Владиміра была прислужницею.

у брата твоего? нама ихъ не перебороти; твори миръ съ братомъ своимъ"; лѣстя подъ нимъ се рече. И рече Ярополкъ: „такъ буди“. И посла Блудъ къ Володимеру, сиче глаголя: „яко сбытсѣя мысль твоя; яко приведу къ тебѣ Ярополка, и пристрой убити ѿ“. Володимеръ же то слышавъ, въшедъ въ дворъ теремный отень, сѣде ту съ вои и съ дружиною своею; и рече Блудъ Ярополку: „пойди къ брату своему и рѣчи ему: что ми ни вдаси, то язъ прииму“. Поиде же Ярополкъ, и рече ему Варяжко: „не ходи, княже, убьютъ тя; побѣгни въ Печенѣги и приведеша вои“; и не послуша его. И приде Ярополкъ къ Володимеру; яко полѣзе въ двери, и подъяста ѿ два Варяга мечьми подъ пазусѣ, Блудъ же затвори двери и не да по немъ ити своимъ; и тако убьенъ бысть Ярополкъ. Варяшко же видѣвъ, яко убьенъ бысть Ярополкъ, бѣжа съ двора въ Печенѣги, и много воева Володимера со Печенѣгы, одва приваби ѿ, заходивъ къ нему ротѣ. Володимеръ же поя жену братьню Грекиню, отъ нея же родися Святополкъ. — Посемъ рѣша Варязи Володимеру: „се градъ нашъ; мы прияхомъ ѿ, да хотимъ имати окупъ на нихъ, по 2 гривнѣ отъ человѣка“. И рече имъ Володимеръ: „пождѣте, да вы куны ²⁾ сберутъ, за мѣсяць“. И ждаша за мѣсяць, и не дасть имъ, и рѣша Варязи: „сольстилъ еси намъ, да покажи намъ путь въ Греки“; онъ же рече имъ: „идѣте“. И избра отъ нихъ мужи добры, смыслены и храбры, и раздая имъ грады; прочии же идоша Царюграду въ Греки. И посла предъ ними слы, глаголя сиче царю: „се идутъ къ тебѣ Варязи, не мози ихъ держати въ градѣ, оли то створять ти зло, яко и сде, но расточи ѿ разно, а сѣмо не пущай ни единого“. — И нача княжити Володимеръ въ Киевѣ единъ, и постави кумиры на холму внѣ двора теремнаго: Перуна древяна, а главу его сребрену, а усъ златъ, и Хърса, Дажьбога и Стрибога, и Симарыгла, и Мокошь. И жряху имъ, нарищюче ѿ богы, и привожаху сыны своя и дѣщери, и жряху бѣсомъ, и оскверняху землю требами своими, и осквернися кровьюми земля Руска и холмо-тъ. Но прилагий Богъ не хотя смерти грѣшникомъ, на томъ холмѣ ныне церки стоитъ, святаго Василия есть. — Володимеръ же посади Добрыну въ Новѣгородѣ; и пришедъ Добрына

¹⁾ Едва заманилъ.

²⁾ Въ буквальныймъ смыслѣ—куны мѣха; въ переносномъ—деньги.

Ноугороду, постави кумира надъ рѣкою Волховомъ, и жряху ему людье Ноугородьстии аки Богу.

Въ лѣто 981. Иде Володимеръ къ Ляхомъ и зая грады ихъ, Перемышль, Червенъ и ины грады, иже суть и до сего дне подъ Русью. Въ семже лѣтѣ и Вятичи побѣди, и възложи на ня дань отъ плуга, яко же и отецъ его имаше.

982. Заратишася Вятичи, и иде на ня Володимеръ и побѣди ѿ второе.

983. Иде Володимеръ на Ятвягы ¹⁾, и побѣди Ятвягы, и взя землю ихъ. И иде Клеву, и творяше потребу кумиромъ съ людьми своими; и рѣша старци и боляре: „мечемъ жребий на отрока и дѣвицю; на него же падеть, того зарѣжемъ богомъ“. Бяше Варягъ единъ, и бѣ дворъ его, идеже есть церкви святая Богородица, юже сдѣла Володимеръ; бѣ же Варягъ той пришелъ изъ Грекъ, и держаше вѣру хрестяньску, и бѣ у него сынъ красенъ лицомъ и душею; на сего паде жребий по зависти дьяволи. И рѣша пришедше послании къ нему: „яко паде жребий на сынъ твой, изволиша бо ѿ бози собѣ; да створимъ потребу богомъ“. И рече Варягъ: „не суть то бози, но древо; днесъ есть, а утро изъгнеетъ; не ядятъ бо, ни пьютъ, ни молвятъ, но суть дѣлани руками въ деревѣ; а Богъ есть единъ, ему же служать Грьци. Не дамъ сына своего бѣсомъ“. Они же шедше поведаша людемъ; они же, взявше оружье, поидоша на нь и розъяша дворъ около его; онъ же стояше на сѣнехъ съ сыномъ своимъ. Рѣша ему: „вдай сына своего, да вдамы богомъ его“. Онъ же рече: „аще суть бози, то единого собе послють бога, да имуть сынъ мой; а вы чему претребуете?“ И кликнуша, и посѣкоша сѣни подъ нима, и тако побиша ѿ; и не свѣсть никто же, гдѣ положиша ѿ. Бяху бо тогда чловѣци невѣголоси и погани. Дьяволъ радовашеся сему, не вѣдый, яко близъ погибель хотяше быти ему.

984. Иде Володимеръ на Радимичи. Бѣ у него воевода Волъчий Хвостъ, и посла ѿ Володимеръ передъ собою, Волъчья Хвоста; сѣрѣте ѿ на рѣцѣ Пищанѣ, и побѣди Радимичѣ Волъчий Хвостъ; тѣмъ и Русь корятся Радимичемъ, глаголюще: „Пищаньци волъчья хвоста бѣгають“. Быша же Радимичи отъ рода Ляховъ; при-

¹⁾ Литовское племя.

шедъше ту ся вселиша, и платять дань Руси, повозъ везуть и до сего дне.

985. Иде Володимеръ на Болгары съ Добрынею въ лодяхъ, а Торъки берегомъ приведе на конихъ; и побѣди Болгары. Рече Добрыня Володимеру: „сѣглядахъ колодникъ, и суть вси въ сопозѣхъ; симъ дани намъ не даяти, поидемъ искать лапотниковъ“. И створи миръ Володимеръ съ Болгары, и ротѣ заходиша межю собѣ, и рѣша Болгаре: „толи не будетъ межю нами мира, оли камень начнетъ плавати, а хмель почнетъ тонути“. И приде Володимеръ Киеву.

986. Придоша Болъгары вѣры Бохъмичѣ¹⁾, глаголюще: „яко ты князь еси мудръ и смысленъ, не вѣси закона; но вѣруй въ законъ нашъ и поклонися Бохъмиту“. И рече Володимеръ: „како есть вѣра ваша?“ Они же рѣша: „вѣруемъ Богу, а Бохмиту ны учить, глаголя: свинины не ясти, вина не пити“. Рече же Володимеръ: „Руси есть веселье питье, не можемъ безъ того быти“. Потомъ же придоша Нѣмци, глаголюще: „придохомъ послании отъ папежа; реклъ ти тако папезъ: земля твоя яко и земля наша, а вѣра ваша не яко вѣра наша; вѣра бо наша свѣтъ есть, кланяемся Богу, иже створилъ небо и землю, звѣзды, мѣсяць и всяко дыханье, а бози ваши древо суть“. Володимеръ же рече: „кака заповѣдь ваша?“ Они же рѣша: „пощенье по силѣ; аще кто пьетъ и ясть, то все въ славу Божью, рече учитель нашъ Павелъ“. Рече же Володимеръ Нѣмцемъ: „идѣте опять²⁾, яко отци наши сего не прияли суть“. Се слышавше Жидове Козарьстии придоша, рекуще: „слышахомъ, яко приходиша Болгаре и хрестеяне, учаще тя каждо вѣрѣ своей; хрестеяне бо вѣрують, его же мы распяхомъ, а мы вѣруемъ единому Богу Аврамову, Исакову, Яковлю“. И рече Володимеръ: „что есть законъ вашъ?“ Они же рѣша: „свинины не ясти, ни заячины, субботу хранити“. Онъ же рече: „то гдѣ есть земля ваша?“ Они же рѣша: „въ Ерусалимѣ“. Онъ же рече: „то тамо ли есте?“ Они же рѣша: „разъгнѣвася Богъ на отци наши, и расточи ны по странамъ грѣхъ ради нашихъ, и предана бысть земля наша хрестеяномъ“. Онъ же рече: „то како вы инѣхъ учите, а сами отвержени отъ Бога и расточени? аще бы Богъ любилъ васъ и законъ вашъ, то не бысте

¹⁾ Болгары камскіе, магометанской вѣры.

²⁾ Вспять, назадъ.

расточени по чюжимъ землямъ; еда намъ тоже мыслите прияти?“ ¹⁾. Посемъ же прислаша Грьци къ Володимеру философа, глаголюще сие. (*Слѣдуетъ краткое изложене Ветхаго и Новаго Завета*). И се рекъ показа Володимеру законъ ²⁾, на ней же бѣ написано судище Господне, показываше ему о десну преведныхъ въ весельи предъидуша въ рай, а о шююю грѣшники идуща въ муку. Володимеръ же вздохнувъ рече: „добро симъ о десную, горе же симъ о шююю“. Онъ же рече: „аще хоцещи о десную съ праведными стати, то крестися“. Володимеръ же положи на сердци своемъ, рекъ: „пожду еще мало“, хотя испытати о всѣхъ вѣрахъ.

987. Созва Володимеръ бояры своя и старци градъскіѣ ³⁾, и рече имъ: „се приходиша ко мнѣ Болгаре, рькуще: приими законъ нашъ; посемъ же приходиша Нѣмци, и ти хваляху законъ свой; по сихъ придоша Жидове. Се же послѣ же придоша Грьци, хуляще вси закони, свой же хваляще. Да что ума придасте? что отвѣщаете?“ И рѣша бояре и старци: „вѣси, княже, яко своего никто же не хулить, но хвалить; аще хоцещи испытати гораздо, то имаши у собе мужи; пославъ испытай кождо ихъ службу, и и кто како служить Богу“. И бысть любя рѣчь князю и всѣмъ людемъ; избраша мужи добры и смыслены, числомъ 10, и рѣша имъ: „идѣте первое въ Болгары и испытайте вѣру ихъ“. Они же идоша, и пришедше видѣша скверная дѣла и кланянье въ ропати ⁴⁾; придоша во землю свою. И рече имъ Володимеръ: „идѣте паки во Нѣмци, съглядайте такожде, и оттудѣ идѣте въ Греки“. Они же придоша въ Нѣмци, и сглядавшѣ церковную службу ихъ, придоша Царюгороду, и внидоша ко царю; царь же испытъ, коея ради вины придоша; они же сповѣдаша ему вся бывшая. Се слышавъ царь, радъ бывъ, и честь велику створи имъ въ той же день. Наутрия посла къ патреарху, глаголя сие: „придоша Русь, пытающе вѣры нашея, да пристрой церковь и крилось, и самъ причинися въ святительскія ризы, да видятъ славу Бога нашего“. Си слышавъ патреархъ, повелѣ созвати крилось, по обычаю створиша праздникъ, и кадила возжгоша, пѣнья

¹⁾ Развѣ вы хотите, чтобы и съ нами случилось то же.

²⁾ Заветъ.

³⁾ Городскіе старѣйшины.

⁴⁾ Мечеть.

и лики съставиша. И иде съ ними въ церковь, и поставиша ѿ на пространньѣ мѣстѣ, показующе красоту церковную, пѣнья и службы архиерѣйски, престоанье дьяконъ, сказующе имъ служенье Бога своего; они же во изумѣньи бывше, удивившеся, похвалиша службу ихъ. И призваша ѿ царя Василий и Костянтинъ, рѣста имъ: „идѣте въ землю вашу“, и отпустиша ѿ съ дары велики и съ честию. Они же придоша въ землю свою. И созва князь боляры своя и старца, рече Володимеръ: „се придоша послании нами мужи, да слышимъ отъ нихъ бывшее“, и рече: „скажите предъ дружиною“. Они же рѣша: „яко ходихомъ въ Болгары, смотрихомъ, како ся покланяють въ храмѣ, рекше въ ропати, стояще безъ пояса; поклонився сядеть и глядитъ сѣмо и онамо, яко бѣшенъ, и нѣсть веселья въ нихъ, но печаль и смрадъ великъ; нѣсть добръ законъ ихъ. И придохомъ въ Нѣмци и видѣхомъ въ храмѣхъ многи службы творяща, а красоты не видѣхомъ никоеяже. И придохомъ же въ Греки, и ведоша ны, идеже служатъ Богу своему, и не свѣмы, на небѣ ли есмы были, ли на земли: нѣсть бо на земли такого вида ли красоты такая, и недоумѣемъ бо сказати; токмо то вѣмы, яко онѣдѣ ¹⁾ Богъ съ челоуѣки пребываетъ, и есть служба ихъ паче всѣхъ странъ. Мы убо не можемъ забыти красоты тоя; всякъ бо челоуѣкъ, аще вкусить сладка, послѣди горести не принимаетъ, тако и мы не имамы сде быти ²⁾. Отвѣщавше же боляре рекоша: „аще бы лихъ законъ Гречьскій, то не бы баба твоя прияла, Ольга, яже бѣ мудрѣйши всѣхъ челоуѣкъ“. Отвѣщавъ же Володимеръ, рече: „гдѣ крещенье приемемъ?“ Они же рекоша: „гдѣ ти любо“. И минувшю лѣту, (988), иде Володимеръ съ|вои на Корсунъ, градъ Гречьскій, и затворишася Корсуняне въ градъ; и ста Володимеръ обѣ онѣ полъ города въ лимени, дали града стрѣлице едино ³⁾, и боряхуся крѣпко изъ града; Володимеръ же обѣстоя градъ. Изнемогаху въ градъ людье, и рече Володимеръ къ гражаномъ: „аще ся не вдасте, имамъ стояти и за 3 лѣта“. Они же не послушаша того. Володимеръ же изряди воя своя и повелѣ приспу сыпати къ граду. Симъ же спущимъ ⁴⁾, Корсуняне, подъкопавше

¹⁾ Тамъ.

²⁾ Не останемся здѣсь.

³⁾ По ту сторону города въ заливѣ, на полетъ стрѣлы отъ города.

⁴⁾ Когда они сыпали.

стѣну градъскую, крадуще сыплемую перьсть ¹⁾, и ношаху къ собѣ въ градъ, сыплюще посредѣ града; воины же присыпаху боле, а Володимеръ стояше. И се мужъ Корсунянинъ, имянемъ Настасъ, стрѣли, напсавъ сиче на стрѣлѣ: „кладязи, яже суть за тобою отъ вѣстока, изъ того вода идетъ по трубѣ, конавъ перейми“. Володимеръ же се слышавъ, възрѣвъ на небо, рече: „аще се ся сбудеть, самъ ся крещю“. И ту абѣ повелѣ копати преки ²⁾ трубамъ, и прѣяша воду; людѣе изнемогоша водною жажею и предашася. Вниде Володимеръ въ градъ и дружина его, и посла Володимеръ ко царема Василью и Костянтину, глаголя сиче: „се градъ ваю славный взяхъ; слышю же се, яко сестру имата дѣвою, да аще еѣ не вдаста за мя, створю граду вашему, яко же и сему створихъ“. И слышаста царя, быста печальна, и въздаста вѣсть, сиче глаголюща: „не достоить хрестеяномъ за поганя даяти; аще ся крестиши, то и се получишь, и царство небесное приимеши, и съ нами единовѣрникъ будеши; аще ли сего не хочеши створити, не можемъ дати сестры своее за тя“. Си слышавъ Володимеръ, рече посланымъ отъ царю: „глаголите царема тако: яко азъ крещюся, яко испытахъ прежде сихъ дний законъ вашъ, и есть ми любя вѣра ваша и служенье, еже ми сповѣдаша послании нами мужи“. И си слышавша царя рада быста, и умолиста сестру свою, имянемъ Аньну, и посласта ко Володимеру, глаголюща: „крестися и тогда послевѣ сестру свою къ тобѣ“. Рече же Володимеръ: „да пришедъше съ сестрою вашею крестятъ мя“. И послушаста царя, и посласта сестру свою, сановники нѣкия и прозвутеры; она же не хотяше ити: „яко въ полонъ“, рече, „иду, лучше бы ми сде умерети“. И рѣста ей брата: „еда како обратить Богъ тобою Рускую землю въ покаянье, а Гречьскую землю избавишь отъ лютыя рати; видиши ли, колько зла створиша Русь Грекомъ? и нынѣ, аще не идеши, тоже имуть створити намъ“; и одва ю принудиша. Она же сѣдъши въ кубару, цѣловавши ужики ³⁾ своя съ плачемъ, поиде чресъ море; и приде къ Корсуню, и изидоша Корсуняне съ поклономъ, и въведоша ю въ градъ, и посадиша ю въ полатѣ. По Божью же устрою въ се время разболѣся Володимеръ очима и не видяше ничтоже, и

¹⁾ Земля.

²⁾ Поперекъ.

³⁾ Родственники.

тужаше ¹⁾ вѣлми, и не домышляшеться ²⁾ что сотворити; и посла къ нему царица, рекущи: „аще хоцещи избыти болѣзни сея, то въскорѣ крестися; аще ли ни, то не имаши избыти недуга сего“. Си слышавъ Володимеръ, рече: „да [аще [истина будетъ, то по истинѣ великъ Богъ будетъ хрестеянескъ“, и повелѣ хрестити ся. Епископъ же Корсунскій съ попы царицины, огласивъ, крести Володимира; и яко възложи руку на нь, абѣ прозрѣ. Видѣвъ же се Володимеръ напрасное ³⁾ изцѣленье, и прослави Бога, рекъ: „топерво ⁴⁾ уведѣхъ Бога истиннаго“. Се же видѣвше дружина его, мнози кресташася. Крести же ся въ церкви святаго Василья, и есть церкви та стоящи въ Корсунѣ градѣ на мѣстѣ посреди града, идѣже торгъ дѣють Корсуняне; полата же Володимеря съ края церкви стоитъ и до сего дне, а царицина полата за олтаремъ. По крещеньи же приведе царицю на браченье. Се же не свѣдуще право, глаголють, яко крестился есть въ Киевѣ; инии же рѣша: въ Василеве; друзии же инако скажутъ. Крещену же Володимеру, предаша ему вѣру крестьянскую, рекуще сиче: „да не прельстятъ тебе нѣции отъ еретикъ, но вѣруй, сиче глаголя“: *(слѣдуетъ исповѣданіе православной вѣры)*. Володимеръ же посемъ поемъ ⁵⁾ царицю и Настаса и попы Корсунски, съ мощми святаго Климента и Фифа, ученика его, поима съсуды церковныя и иконы на благословенье себѣ. Постави же церковь въ Корсунѣ на горѣ, идѣже съсыпаша средѣ града, крадуще приспу,—яже церкви стоитъ и до сего дне. Взя же ида ⁶⁾ мѣдянѣ двѣ капищи ⁷⁾ и 4 кони мѣдяны, иже и нынѣ стоятъ за святою Богородицею, якоже невѣдуще мнѣть ѿ мрамаряны суца ⁸⁾. Вдасть же за вѣно ⁹⁾ Грекомъ Корсунъ царицѣ дѣля ¹⁰⁾ а самъ приде Киеву. Яко приде, повелѣ кумиры испроврещи, овы исѣщи, а другия огневи предати; Перуна же повелѣ привязати коневѣ къ

¹⁾ Скорбѣль.

²⁾ Imperfectum съ сохраненіемъ личнаго окончанія.

³⁾ Внезапное.

⁴⁾ Теперь.

⁵⁾ Взявъ (причас. прош. отъ полти).

⁶⁾ Вм. иды (идя).

⁷⁾ Статуя.

⁸⁾ Незнающіе думаютъ, что они мраморныя.

⁹⁾ Выкупъ за невѣсту.

¹⁰⁾ Р дп, за.

хвосту и влещи съ горы по Боричеву на Ручай, 12 мужа пристави тети жезлемъ ¹⁾. Се же не яко древу чююще, но на поруганье бѣсу, иже прелщаше симъ образомъ чловѣкы, да възмездье приметъ отъ чловѣкѣ. Велий еси, Господи, чюдна дѣла твоя! вчера чтимъ отъ чловѣкѣ, а днесъ поругаемъ. Влекому же ему по Ручаю къ Днѣпру, плакахуся его невѣрнии людье, еще бо не бяху прияли святаго крещенья; и привлекше, вринуша ѿ въ Днѣпрѣ. И пристави Володимеръ, рекъ: „аще кде пристанеть, вы отрѣвайте его отъ берега, дондеже пороги пройдетъ; то тогда охабитесь его“ ²⁾ Они же повелѣная створиша. Яко пустиша ѿ, пройде сквозѣ пороги, изверже ѿ вѣтрѣ на рѣнь ³⁾, и оттолѣ прослу Перуня Рѣнь, якоже и до сего дне словеть. Посемъ же Володимеръ посла по всему граду, глаголя: „аще не обрящеться кто заутра на рѣцѣ, богатъ ли, ли убогъ, или нищъ, ли работникъ, противенъ мнѣ да будетъ“. Се слышавше людье съ радостью идяху, радующеся и глаголюще: „аще бы се не добро было, не бы сего князь и боляре прияли“. Наутрия же изиде Володимеръ съ попы царицины и съ Корсуньскими на Днѣпрѣ, и снидеса безъ числа людей: влѣзоша въ воду, и стояху овы по шие, а друзии до персий, младенци же отъ берега, друзии же младенци держаще, свершении же ⁴⁾ бродяху, попове же стояще молитвы творяху. Крестившимъ же ся людемъ, идоша каждо въ дома своя. Володимеръ же радъ бывъ, яко позна Бога самъ и людье его, и повелѣ рубити церкви и поставляти по мѣстомъ идеже стояху кумиры; и постави церковь святаго Василья на холмѣ, идеже стояше кумиръ Перунъ и прочии, идеже творяху potreby князь и людье; и нача ставити по градомъ церкви и попы, и люди на крещенье приводити по всѣмъ градомъ и селомъ. Пославъ нача поимати у нарочитые чади ⁵⁾ дѣти, и даяти нача на ученье книжное; матере же чадѣ сихъ плакахуся по

¹⁾ Бить палками.

²⁾ Оставьте.

³⁾ Вѣроятно отмель.

⁴⁾ „Несовершеннолѣтніе стояли у берега, возрастные держали въ рукахъ младенцевъ, а крещенные уже бродили по рѣкѣ, вѣроятно уча некрещенныхъ, а также и занимая мѣсто ихъ восприемниковъ“. (Соловьевъ).

⁵⁾ У именитыхъ людей.

нихъ, еще бо не бяху ся утвердили вѣрою, но акы по мертвыхъ плакахуся.

989. Посемъ же Володимеръ живяше въ законѣ хрестыянствѣ, помысли создати церковь пресвятыя Богородица, и пославъ приведе мастера отъ Грекъ. И наченшю же здати, и яко скончавъ, украси ю иконами, и поручи ю Настасу Корсунянину, и попы Корсуньскыя пристави служити въ ней, взявъ ту все, еже бѣ възлѣвъ въ Корсунѣ: иконы, и съсуды, и кресты.

Въ лѣто 991. Володимеръ заложи Бѣльгородъ и наруби въ нь отъ инѣхъ городовъ, и много людей сведе во нь; бѣ бо любя градъ съ.

992. Иде Володимеръ на Хорваты. Пришедшю ему съ войны Хорватьскыя, се Печенѣзи придоша по оной сторонѣ отъ Сулы; Володимеръ же поиде противу имъ, и сретѣ я на Трубежи на бродѣ, кде нынѣ Переяславль. И ста Володимеръ на сей сторонѣ, а Печенѣзи на оной, и не смяху си на ону страну, ни они на сю страну. И приѣха князь Печенѣжскый къ рѣкѣ, возва Володимера и рече ему: „выпусти ты свой мужъ, а я свой, да ся борета; да еще твой мужъ ударить моимъ, да не воюемъ за три лѣта; аще ли нашъ мужъ ударить, да воюемъ за три лѣта“; и разидостася разно. Володимеръ же приде въ товары ¹⁾, посла биричи ²⁾ по товаромъ, глаголя: „нѣту ли такого мужа, иже бы ся ялъ съ Печенѣжиномъ?“ и не обрѣтѣся никдѣже. Заутра приѣхаша Печенѣзи и свой мужъ приведоша, а у нашихъ не бысть. И поча тужити Володимеръ, сля по всѣмъ воемъ, и приде единъ старъ мужъ ко князю и рече ему: „княже! есть у мене единъ сынъ меншей дома, а съ четырьми есмь вышелъ, а онъ дома; отъ дѣтства его нѣсть кто имъ ударилъ: единою бо ми ѿ сварящю, и оному мнущю уение, разгнѣвавъся на мя, преторже череву руками“ ³⁾. Князь же се слышавъ радъ бысть, и посла по нь, и приведоша ѿ ко князю, и князь повѣда ему вся; сей же рече: „княже! не вѣмъ, могу ли со нь (боротися); но да искусятъ мя: нѣту ли быка велика и силна?“ И налѣзоша быкъ великъ и силенъ, и повелѣ раздражити быка; возложиша на нь желѣза горяча, и

¹⁾ Таборъ, лагерь.

²⁾ Княжескіе слуги.

³⁾ Однажды, когда я его бранилъ, а онъ мѣлъ кожу, разсердившись на меня, онъ разорвалъ кожу руками.

быка пустиша, и побѣже быкъ мимо ѿ, и похвати быка рукою за бокъ, и выня кожу съ мясы, елико ему рука зая ¹⁾; и рече ему Володимеръ: „можеша ся съ нимъ бороти“. И наутрия придоша Печенѣзи, почаша звати: „нѣ ли мужа? се нашъ dospѣлъ“. Володимеръ же повелѣ той ноци обещися въ оружье, и приступиша ту обои. Выпустиша Печенѣзи мужъ свой, бѣ бо превеликъ зѣло и страшенъ; и выступи мужъ Володимеръ ²⁾, и узрѣ ѿ Печенѣзинъ и посмѣяся, бѣ бо середний тѣломъ. И размѣривше межи обѣма полкома, пустиша ѿ къ собѣ, и яста ся и почаста ся крѣпко держати, и удави Печенѣзина въ рукахъ до смерти, и удари имъ о землю; и кликнуша, и Печенѣзи побѣгоша, и Русь погнаша по нихъ сѣкуще, и прогнаша ѿ. Володимеръ же радъ бывъ, заложи городъ на бродѣ томъ, и нарече ѿ Переяславль, зане перея славу отроко-тъ. Володимеръ же великимъ мужемъ створи того и отца его.

996. Володимеръ видѣвъ церковь свершену, вшедъ въ ню и помолися Богу, и рекъ сие: „даю церкви сей святѣй Богородицѣ отъ имѣнья моего и отъ градъ моихъ десятую часть“. И положи написавъ клятву въ церкви сей, рекъ: „аще кто сего посудить, да будетъ проклятъ“. И вдасть десятину Настасу Корсунянину, и створи праздникъ великъ въ тѣ день боляромъ и старцемъ градскимъ, и убогимъ раздая имѣнье много.

По сихже придоша Печенѣзи къ Василеву, и Володимеръ съ малою дружиною изыде противу, и съступившимся, и не могъ стерпѣти противу, подбѣгъ ста подъ мостомъ, одва укрыся противныхъ, и тогда обѣщася Володимеръ поставити церковь Василевъ святаго Преображенья, бѣ бо въ тѣ день Преображение Господне, егда си бысть сѣча. Избывъ же Володимеръ сего ³⁾, постави церковь, и створи праздникъ великъ, варя 300 проваръ ⁴⁾ меду, и съзываше боляры своя, и посадники, старѣйшины по всѣмъ градомъ, и люди многы, и раздая убогимъ 300 гривенъ. Праздновавъ князь дний 8, и възвращашеться Къеву на Успенье святыя Богородица, и ту пакы сотворяше праздникъ великъ

¹⁾ Сколько захватила рука.

²⁾ Прилаг. притяжательное.

³⁾ Избавившись отъ этой опасности.

⁴⁾ Заторъ.

сзывая бесчисленное множество народа. Видя же люди хрестьяны суща, радовашеся душею и тѣломъ, и тако по вся лѣта творяше. Бѣ бо любя словеса книжная; слыша бо единою еуангелъе чтомо: блажени милостивии, яко ти помиловани будутъ; и пакы: продайте имѣнья ваша и дадите нищимъ; и пакы: не скрывайте собѣ скровищъ на земли, идеже тля тлить и татѣ подъкопываютъ, но скрывайте собѣ скровище на небесѣхъ, идеже ни тля тлить, ни татѣ крадутъ, — повелѣ всякому нищему и убогому приходить на дворъ княжъ и взимати всяку потребу, питье и яденъе, и отъ скотъницъ кунами ¹⁾. Устрой же и се, рекъ: „яко немощнии и болнии не могутъ долѣсти двора моего“; повелѣ пристроити кола ²⁾, и въскладше хлѣбы, мяса, рыбы, овощъ различныхъ, медъ въ бчелкахъ, а въ другихъ квасъ, возити по городу, въпрашающе: „где больний и нищъ, не могы ходити?“ тѣмъ раздаваху на потребу. Се же пакы творяше людемъ своимъ, по вся недѣля устави на дворѣ въ гридьницѣ пиръ творити и приходить боляромъ, и гридемъ ³⁾, и съцьскимъ и десятицкимъ, и нарочитымъ мужемъ, при князи и безъ князя; бываше множество отъ мясъ, отъ скота и отъ звѣрины, бѣше по изобилъю отъ всего. Егда же подъпъяхуться, начъняхуть роптати на князь, глаголюще: „зло есть нашимъ главамъ, да намъ ясти деревянными лѣжицами, а не сребряными“. Се же слышавъ Володимеръ, повела исковати лжицѣ сребрены ясти дружинѣ, сиче рекъ: „яко серебромъ и златомъ не имамъ налѣсти ⁴⁾ дружины, а дружиною налѣзу сребро и злато, яко же дѣдъ мой и отецъ мой доискася дружиною злата и сребра“. Бѣ бо Володимеръ любя дружину, и съ ними думая о строи земленѣмъ, и о ратехъ, и о уставѣ земленѣмъ. И бѣ живя съ князи околними миромъ, съ Болеславомъ Лядьскимъ, и съ Стефаномъ Угръскимъ, и съ Андрихомъ Чешьскимъ, и бѣ миръ межю ими и любы. Живяше же Володимеръ въ страсѣ Божьи, и умножишася зело разбоеве, и рѣша епископи Володимеру: „се умножишася разбойници; почто не казниши ихъ?“ Онъ же рече имъ: „боюся грѣха“. Они же рѣша ему: „ты поста-

¹⁾ Скотница--казнохранилище.

²⁾ Телѣга.

³⁾ Тѣлохранители.

⁴⁾ Не добуду.

вленъ еси отъ Бога на казнь злымъ, а добрымъ на милованье; достойтъ ти казнити разбойника, но съ испытѡмъ“. Володимеръ же отвергъ виры ¹⁾, нача казнити разбойники, и рѣша епископи и старци: „ратъ многа; оже вира, то на оружьи и на конихъ буди“. И рече Володимеръ: „такѡ буди“. И живяше Володимеръ по устроенью отню и дѣдню.

997. Володимеру же шедшу Новугороду по верховьниѣ воѣ ²⁾ на Печенѣгы, бѣ бо ратъ велика безъ перестани, въ се же время увѣдѣша Печенѣзи, яко князя нѣ ту, и придоша и сташа около Бѣлагорода. И не дадаху вылѣсти изъ города, и бысть гладъ великъ въ городѣ, и не бѣ лѣзѣ Володимеру помочи, не бѣ бо вой у него, Печенѣгъ же множество много. И бѣ гладъ великъ, и створиша вѣче въ городѣ, и рѣша: „се уже хотимъ померети отъ глада, а отъ князя помочи нѣту; да лучше ли ны померети, дадимъся Печенѣгомъ, да кого живять, кого ли умертвять; уже помираемъ отъ глада“; и тако совѣтъ створиша. Бѣ же единъ старецъ не былъ на вѣчи томъ, и въпраша: „что ради вѣче было?“ И людье повѣдаша ему, яко утро хотять ся людье передати Печенѣгомъ. Се слышавъ, посла по старѣйшины градскыя, и рече имъ: „слысахъ, яко хотите ся передати Печенѣгомъ“. Они же рѣша: „не стерпять людье глада“. И рече имъ: „послушайте мене, не предайтесь за 3 дни, а я вы что велю, створите“. Они же ради обѣщашася послушати, и рече имъ: „сберѣте аче и ³⁾ по горсти овса, или пшеницѣ, ли отрубей“; они же шедше ради снискаша. И повелѣ женамъ створити цѣжъ ⁴⁾, въ немъ же варять кисель, и повелѣ ископати колодязь, и вставити тамо кадъ, и нальяти цѣжа кадъ. И повелѣ другой колодязь ископати, и вставити тамо кадъ, и повелѣ искати меду; они же шедше взяша меду лукно, бѣ бо погребено въ княжи медуши; и повелѣ росытити велми и вълѣяти въ кадъ въ друзѣмъ колодязи. Утро же повелѣ послати по Печенѣгы; и горожане же рѣша, шедше къ Печенѣгомъ: „поимѣте къ собѣ таль нашъ, а вы поидѣте до 10 мужъ въ градъ, да видите, что ся дѣеть въ градѣ нашемъ“. Печенѣзи же ради бывше, мняще, яко предатися хо-

¹⁾ Пеня.

²⁾ За воинами въ верхнихъ (относительно Кіева) земляхъ.

³⁾ Хотя.

⁴⁾ Растворъ.

тятъ, пояша у нихъ тали, а сами избраша лучшиѣ мужи и послаша въ градъ, да розглядають въ городѣ, что ся дѣеть. И придоша въ городъ, и рекоша имъ людье: „почто губите себе? коли можете престояти насъ? аще стоите за 10 лѣтъ, что можете створити намъ? имѣемъ бо кормлю отъ землѣ; аще ли не вѣруете, да узрите своима очима“. И приведоша ѧ къ кладязю, идѣже цѣжъ, и почерпоша вѣдромъ и льяша въ латки, и яко свариша кисель, и поимше придоша съ ними къ другому кладязю, и почерпоша сыты, и почаша ясти сами первое, потомъ же Печенѣзи. И удивишася и рекоша: „не имуть вѣры наши князи, аще не ядятъ сами“. Людье же наляша корчагу цѣжа и сыты отъ колодязя, и вдаша Печенѣгомъ; они же пришедше повѣдаша вся бывшая. И варивше яша князи Печенѣзьстии, и подивишася, и поимше тали своя и онѣхъ пустивше, вѣсташа отъ града, вѣсвоеси идоша.

1014. Ярославъ же сущю Новѣгородѣ, и урокомъ дающе Къеву двѣ тысячѣ гривенъ отъ года до года, а тысячу Новѣгородѣ гридемъ раздаваху; и тако даяху вси посадници Новѣгородьстии, а Ярославъ сего не даяще къ Къеву, отцю своему, И рече Володимеръ; „требите путь и мостите мостъ“, хотяшеть бо на Ярослава ити, на сына своего, но разболѣся.

1015. Хотящу Володимеру ити на Ярослава, Ярославъ же, пославъ за море, приведе Варягы, бояся отца своего; но Богъ не вдасть дьяволу радости. Володимеру же разболѣвшюся, въ се же время бяше у него Борисъ; Печенѣгомъ идущемъ на Русь, посла противу имъ Бориса, самъ бо боляше велми, въ ней же болести и скончася мѣсяца Иуля въ 15 день. Умре же на Берестовѣмъ, и потаиша ѧ, бѣ бо Святополкъ Къевѣ. Ночью же межю двема клѣтми проймавше помость, обертѣвше въ коверъ ѧ, ужи свѣсиша на землю; възложьше ѧ на сани, везъше поставиша ѧ въ святѣй Богородици, юже бѣ създалъ самъ ¹⁾. Се же

¹⁾ „Потантъ“ значитъ здѣсь тоже, что въ другихъ случаяхъ выражалось словомъ „спрятать“, т. е. убрать, нарядить покойника. „Обертѣвше въ коверъ“. У русскихъ употребленіе гроба является очень поздно, не раньше XVII вѣка; въ прежнее время тѣло обертывалось въ лубъ, бересту, коверъ или плащъ („корзно“) и обвязывалось веревками. Даже въ XVII вѣкѣ гробъ употреблялся иногда только для переноса тѣла до могилы, гдѣ оно вынималось изъ гроба и перекладывалось въ каменную гробницу („корста мороморяна“). „Между клѣтми проймавше помость“, т. е. ра-

увѣдѣвъше людѣе, безъ числа снидошася и плакашася по немъ, бояре аки заступника ихъ земли, убозии, аки заступника и кормителя; и вложиша ѱ въ корсту мороморяну, схраниша тѣло его съ плачемъ, блаженаго князя. Се есть новый Костянтинъ великого Рима. Дивно же есть се, колико добра створилъ Русьстѣй земли, крестивъ ю.

Святополкъ же сѣде Кыевѣ по отци своемъ, и съзва Кыяны, и нача даяти имъ имѣнье; они же приимаху, и не бѣ сердце ихъ съ нимъ, яко братья ихъ бѣша съ Борисомъ. Борису же възвратившюся съ вои, не обрѣтшю Печенѣгъ, вѣсть приде къ нему: „отецъ ти умерлъ“. И плакася по отци велми, любимъ бо бѣ отцемъ своимъ паче всѣхъ, и ста на Лѣтѣ пришедъ. Рѣша же ему дружина отня: „се дружина у тебе отня и вои; поиди сяди Кыевѣ на столѣ отни“. Онъ же рече: „не буди мнѣ възнати руки на брата своего старѣйшаго; аще и отецъ ми умре, то съ ми буди въ отца мѣсто“. И се слышавше вои, разидошася отъ него; Борисъ же стояше съ отроки своими. Святополкъ же исполнивъся безаконія, Каиновъ смыслъ примъ, посылая къ Борису, глаголаше: „яко съ тобою хочю любовь имѣти и къ отню придамъ ти“; а льстя подъ нимъ, како бо ѱ погубити. Святополкъ же приде ночью Вышегороду, отай ¹⁾ призва Путшю и Вышегородскыѣ болярьцѣ, и рече имъ: „пріяете ли ми всѣмъ сердцемъ?“ Рече же Путша и Вышегородьци: „можемъ главы своя сложити за тя“. Онъ же рече имъ: „не повѣдуче никому же, шедше убийте брата моего Бориса“. Они же вскорѣ обѣщашася ему се створити. Послании

зобравши заборъ между домами, или стѣну между двумя комнатами,—похоронный обрядъ общій многимъ народамъ. Онъ объясняется страхомъ передъ умершимъ. Готтентоты говорятъ, что выпосъ покойника не черезъ обыкновенный ходъ дѣлается для того, чтобы умершій забылъ обратный входъ и не могъ, еслибы даже захотѣлъ, опять войти въ жилище. „Сани“ употреблялись при царскихъ похоронахъ до конца XVII вѣка (такъ хоронили въ 1696 году царя Іоанна Алексѣевича),—и при томъ во всякое время года. Предпочтеніе отдавалось санямъ, какъ самому древнему, первобытному экипажу. Подобный же примѣръ переживанія можно видѣть въ каменныхъ ножахъ, которые употреблялись египтянами при бальзамированіи труповъ уже въ то время, когда оружіе вообще дѣлалось изъ металла. (См. Анучина: „Сани, лодки и кони, какъ принадлежности погребальнаго обряда“. 1890 г.).

¹⁾ Тайно.

же придоша на Лѣто ночью, и подѣступиша ближе, и слышаша блаженаго Бориса поюща заутреню; бѣ бо ему вѣсть уже, яко хотѣть погубити ѿ. И помолившюся ему, възлеже на одрѣ своемъ. И се нападоша аки звѣрье дивии около шатра, и насунуша ѿ копѣи, и прободоша Бориса, и слугу его, падша на немъ, прободоша съ нимъ. Бѣ бо сей любимъ Борисомъ; бѣше отрокъ съ родомъ сынъ Угърскъ, именемъ Георги, его же любяше повелику Борисъ, бѣ бо възложилъ на нь гривну злату велику¹⁾, въ ней же предѣстояше предѣ нимъ. Избиша же и ины отроки Борисовы многы. Георгиеви же сему не могуще вборзѣ сняти гривны съ шиѣ, усѣкнуша главу его, и тако сняша гривну, а главу отвергоша прочь; тѣмже послѣже не обрѣтоша тѣла сего въ трупѣи. Бориса же убивше оканьнии, увертѣвше въ шатеръ, възложивше на кола, повезоша ѿ, и еще дышущю ему. Увѣдѣвъ же се оканьный Святополкъ, яко еще дышетъ, посла два Варяга прикончатъ его; онѣма же пришедшема и видѣвшема, яко еще живъ есть, единъ еѿ извлекъ мечъ, пронзе ѿ къ сердцю. И тако скончася блаженный Борисъ. И положиша тѣло его, принесше отаѣ Вышегороду, у церкви святаго Василья. Оканьнии же си убийцѣ придоша къ Святополку, аки хвалу имуще, безаконьници. Суть же имена симъ законопреступникомъ: Путьша, Талець, Еловить, Ляшько, отецъ же ихъ сотона.—Святополкъ же оканьный помысли въ собѣ, рекъ: „се убихъ Бориса; како бы убити Глѣба?“ И примъ помыслъ Каиновъ, съ лестю посла къ Глѣбу, глаголя сиче: „поиди вборзѣ, отецъ тя зоветъ, не сдравить бо велми“. Глѣбъ же вборзѣ всѣдъ на конѣ, съ малою дружиною поиде, бѣ бо послушливъ отцю. И пришедшю ему на Волгу, на поли потчеса конь въ рвѣ, и наломи ему ногу мало; и приде Смоленску, и поиде отъ Смоленска, и ста на Смядинѣ въ насадѣ²⁾. Въ се же время пришла бѣ вѣсть къ Ярославу отъ Передѣславы о отни смерти, и посла Ярославъ къ Глѣбу, глаголя: „не ходи, отецъ ти умерлъ, а братъ ти убьенъ отъ Святополка“. Се слышавъ Глѣбъ възни велми съ слезами, плачася по отци, паче же по братѣ, и нача молитися съ слезами. И сиче ему молящюся, се внезапно придоша послании отъ Святополка на погубленье Глѣбу, и ту абѣ послании яша корабль

¹⁾ Ожерелье.

²⁾ Лодка.

Глѣбовъ, и обнажиша оружье; отроки Глѣбовы уныша; оканьный же посланный Горясѣръ повелѣ въорзѣ зарѣзати Глѣба; поваръ же Глѣбовъ, именемъ Торчинъ, вынезъ ножъ, зарѣза Глѣба. Глѣбу же убьену бывшую и повержену на брезѣ межи двѣма колодама, посемъ же взявше везоша ѿ, и положиша ѿ у брата своего Бориса у церкви святаго Василья. И съвкуплена тѣлома, паче же душама, у Вѣладыки Всецесаря пребывающа въ радости бесконечнѣй, въ свѣтѣ неиздреченнѣмъ, подающа цѣлебныя дары Русьстѣй земли.—Святополкъ же съ оканьный и злый уби Святослава, пославъ ко горѣ Угорьстѣй, бѣжащую ему въ Угры, и нача помышляти: „яко избыю всю братью свою, и прииму власть Русьскую единъ“. Созвавъ люди, нача даяти овѣмъ корзна ¹⁾, а другимъ кунами, и раздая множество.—Ярославу же не вѣдущю отънѣ смерти, Варяги бяху мнози у Ярослава, и насилъе творяху Новгородцемъ. Вставше Новгородци, избиша Варягы въ дворѣ Парамони, и разгнѣвася Ярославъ, и шедъ сѣде въ дворѣ; пославъ къ Новгородцемъ, рече: „уже мнѣ сихъ не крѣсити“. И позва къ собѣ нарочитѣ мужи, иже бяху иссѣкли Варягы, и обльстивъ ѿ исѣче. Въ ту же ноцъ приде ему вѣсть изъ Кыева отъ сестры его Передѣславы: „си отецъ ти умерлъ, а Святополкъ сѣдитъ ти Кыевѣ, убивъ Бориса, а на Глѣба посла, а блюдися его повелику“. Се слышавъ, печаленъ бысть о отци, и о брати и о дружинѣ; заутра же собравъ избытокъ ²⁾ Новгородецъ, Ярославъ рече: „о любя моя дружина, юже вчера избихъ, а нынѣ быша надобе“. Утерлъ слезъ, и рече имъ на вѣчи: „отецъ мой умерлъ, а Святополкъ сидитъ Кыевѣ, избивая братью свою“. И рѣша Новгородци: „аще ³⁾, княже, братья наша исѣчена суть, можемъ по тобѣ бороти“. И събра Ярославъ Варягъ тысячу, а прочихъ вой 40,000, и поиде на Святополка, нарекъ Бога, рекъ: „не я почыхъ избивати братью, но онъ“.

1016. Приде Ярославъ на Святополка, и сташа противу обѣ оба полы ⁴⁾. Днѣпра (у Любича), и не смяху на си онѣхъ, ни они сихъ начати, и стояша мѣсяцъ 3 противу собѣ. И воевода нача Святополчъ, ѣздя възлѣ берегъ, укарати Новгородцѣ, гла-

¹⁾ Одежда.

²⁾ Остатокъ.

³⁾ Хотя.

⁴⁾ Обѣ стороны.

голя: „что придосте съ хромьцемъ симъ, а вы плотници суще? а приставимъ вы хоромовъ рубити нашихъ“. Се слышавше Новгородци, рѣша Ярославу: „яко завтра перевеземъся на ня; аще кто не поидеть съ нами, сами потнемъ ¹⁾ его“. Бѣ бо уже въ заморозъ. Святополкъ стояше межи двѣма озерома, и всю ночь пилъ бѣ съ дружиною своею; Ярославъ же завтра исполчивъ дружину свою, противу свѣту перевезеся. И выседше на берегъ, отринуша лодѣѣ отъ берега, и поидоша противу собѣ, и сступишася на мѣстѣ; бысть сѣча зла, и не бѣ лзѣ озеромъ Печенѣгомъ помогати, и притиснуша Святополка съ дружиною ко озеру и въступиша на ледъ, и обломися съ ними ледъ, и одалати нача Ярославъ; видѣвъ же Святополкъ и побеже, и одолѣ Ярославъ. Святополкъ же бѣжа въ Ляхы, Ярославъ же сѣде Къевѣ на столѣ отъни и дѣдни; и бы тогда Ярославъ лѣтъ 28.

1018. Приде Болеславъ съ Святополкомъ на Ярослава съ Ляхы; Ярославъ же совокупивъ Русь, и Варягы и Словѣнѣ, поиде противу Болеславу и Святополку, и приде Волюню, и сташа оба полъ рѣкы Буга. И бѣ у Ярослава кормилецъ и воевода, именемъ Буды, нача укаряти Болеслава, глаголя: „да то ти прободемъ трѣскою ²⁾ черево твое толъстое“. Бѣ бо Болеславъ великъ и тяжекъ, яко и на кони не могли сѣдѣти, но бѣше смыслень; и рече Болеславъ къ дружинѣ своей: „аще вы сего укора не жаль ³⁾, азъ единъ погину“. Всѣдъ на конь, въбрѣде въ рѣку и по немъ вои его; Ярославъ же не утягну ⁴⁾ исполчитися, и побѣди Болеславъ Ярослава. Ярославъ же убѣжа съ 4 мужи Новугороду, Болеславъ же вниде въ Къевъ съ Святополкомъ. И рече Болеславъ: „разведѣте дружину мою по городомъ на покорѣмъ“, и бысть тако. Ярославу же прибѣгшю Новугороду, и хотяше бѣжати за море, и посадникъ Костянтинъ, сынъ Добрынь, съ Новгородьци расѣкоша лодѣѣ Ярославлѣ, рекуще: „хочемъ ся и еще бити съ Болеславомъ и съ Святополкомъ“. Начаша скотъ ⁵⁾ събирати отъ мужа по 4 куны, а отъ старость по 10 гривень, а отъ бояръ по 18 гривень; и привелоша Варягы, и вдаша имъ скотъ,

¹⁾ Убьемъ.

²⁾ Коломъ.

³⁾ Не обидно.

⁴⁾ Не успѣлъ.

⁵⁾ Деньги.

и совокупи Ярославъ воя многы. Болеславъ же бѣ Киевѣ сѣдя, оканьный же Святополкъ рече: „елико же Ляховъ по городомъ, избивайте я“; и избиша Ляхы. Болеславъ же побѣже изъ Кыева, взяма имѣнье и бояры Ярославлѣ и сестрѣ его, и Настаса пристави ко имѣнью, бѣ бо ся ему ввѣрилъ лестью, и людей множество веде съ собою, и города Червеньскыя зая собѣ, и приде въ свою землю. Святополкъ же нача княжити Киевѣ, и поиде Ярославъ на Святополка, и бѣжа Святополкъ въ Печенѣгы.

1019. Приде Святополкъ съ Печенѣгы въ силѣ тяжьцѣ, и Ярославъ собра множество вой, и изыде противу ему на Лыто. Ярославъ ста на мѣстѣ, идеже убиша Бориса, въздѣвъ руцѣ на небо, рече: „кровь брата моего вопъетъ къ Тебѣ, Владыко! мести отъ крове праведнаго сего, якоже мстилъ еси крове Авелевы, положивъ на Каинѣ стенанье и трясенье; тако положи и на сѣмь“. Помоливъся рекъ: „брата моя! аще еста и тѣломъ отошла отсюда, но молитвою помозѣта ми на противнаго сего убийцю и гордаго“. И се ему рекшю, поидоша противу собѣ, и покрыша поле Летьское обои отъ множества вой. Бѣ же пятокъ тогда, възходящую солнцю, и сступишася обои, бысть сѣча зла, яка же не была въ Руси, и за руки емлюче сечахуся, и сступашася трижды, яко по удолюемъ крови тещи; къ вечеру же одолѣ Ярославъ, а Святополкъ бѣжа. И бѣжащю ему, нападе на нь бѣсѣ, раслабѣша кости его, не можашѣ сѣдѣти на кони, и несяхуть ѿ на носилѣхъ; принесоша ѿ къ Берестю, бѣгающе съ нимъ; онъ же глаголаше: „побѣгнѣте со мною, женуть по насѣ“. Отроки же его всылаху противу: „еда кто женеть по насѣ?“ и не бѣ никого же вслѣдъ гонящаго, и бѣжаху съ нимъ; онъ же во немощи лежа, и възхопивъся глаголаше: „о, се женуть, побѣгнѣте“. Не можаше терпѣти на единомъ мѣстѣ, и пробѣжа Лядскую землю, гонимъ Божьимъ гнѣвомъ, прибѣжа въ пустыню межю Ляхы и Чехы, испроверже злѣ животъ свой.

1022. Мстиславу ¹⁾, сущю Тмуторокани, поиде на Касоги. Слышавъ же се князь Касожьскый Редедя, изиде противу тому, и ставшема обѣма полкома противу собѣ, и рече Редедя къ Мстиславу: „что ради губивѣ дружину межю собою? но снидевѣ ся сама бороть; да аще одолѣеши ты, то возмеша имѣнье мое, и

¹⁾ Братъ Ярослава.

жену мою, и дѣти моѣ, и землю мою; аще ли азъ одолѣю, то възму твое все“. И рече Мьстиславъ: „такъ буди“. И рече Редедя ко Мьстиславу: „не оружьемъ ся бьевѣ, но борьбою“. И яста ся бороти крѣпко; и надолзѣ борющемася има нача изнемагати Мьстиславъ: бѣ бо великъ и силенъ Редедя; и рече Мьстиславъ: „о, Пречистая Богородице! помози ми; аще бо одолѣю сему, съзижду церковь во имя Твое“. И се рекъ удари имъ о землю, и вынзе ножъ, и зарѣза Редедю, и шедъ въ землю его, взя все имѣнье его, и жену его и дѣти его, и дань възложи на Касогы. И пришедъ Тмутороканю, заложилъ церковь святыя Богородица, и созда ю, яже стоитъ и до сего дне Тмуторокани.

1023. Поиде Мьстиславъ на Ярослава, съ Козары и съ Касогы.

1024. Ярославу сущю Новѣгородѣ, приде Мьстиславъ изъ Тмутороканя Кыеву, и не прияша его Кыяне; онъ же шедъ сѣде на столѣ Черниговѣ, Ярославу сущю Новѣгородѣ тогда.—Въ се же лѣто вѣсташа волхвы въ Суздали, избиваху старую чадъ по дьяволу наущенью и бѣсованью, глаголюще, яко си держатъ го-бино ¹⁾. Бѣ мятежъ великъ и голодъ по всей той странѣ; идоша по Волзѣ вси людье въ Болгары, и привезоша жито, и тако ожиша. Слышавъ же Ярославъ волхвы, приде Суздалю; изъимавъ волхвы, расточи, а другыя показни, рекъ сице: „Богъ наводитъ по грѣхомъ на куюждо землю гладомъ, или моромъ, ли ведромъ, ли иною казнью, а человекъ не вѣсть ничтоже“.—И възвративъся Ярославъ, приде Новугороду, и посла за море по Варягы; и приде Якунъ съ Варягы, и бѣ Якунъ слѣпъ ²⁾, и луда ³⁾ бѣ у него золотомъ истъкана. И приде къ Ярославу; и иде Ярославъ съ Якуномъ на Мьстислава, Мьстиславъ же слышавъ взиде противу има къ Листвену. Мьстиславъ же съ вечера исполчивъ дружину, и поставилъ Сѣверъ въ чело противу Варягомъ, а самъ ста съ дружиною своею по крилома. И бывши нощи, бысть тма, мо-

¹⁾ Урожай.

²⁾ Соловьевъ видитъ въ словѣ „слѣпъ“ простой переводъ скандинавскаго Након, Накун, Нааген-одноглазый. „Ибо странно было-бы въ самомъ дѣлѣ видѣть слѣпого въ вождѣ варяжской дружины“.—Нѣкоторые вмѣсто „слѣпъ“ читаютъ „съ лѣпъ“. (I. 314).

³⁾ Верхняя одежда.

лонья, и громъ и дождь. И рече Мьстиславъ дружинѣ своей: „пойдемъ на ня“. И поиде Мьстиславъ, и Ярославъ противу ему, и сступиша чело Сѣверъ съ Варягы, и трудишася Варязи сѣкуще Сѣверъ, и посемъ наступи Мьстиславъ со дружиною своею и нача сѣщи Варягы, и бысть сѣча силна, яко по-свѣтяше молонья, блещашеться оружье, и бѣ гроза велика и сѣча силна и страшна. Видѣвъ же Ярославъ, яко побѣжаемъ есть, побѣже съ Якуномъ, княземъ Варяжьскимъ, и Якунъ ту отбѣже луды златыя; Ярославъ же приде Новугороду, а Якунъ иде за море. Мьстиславъ же, о светъ заутра ¹⁾, видѣвъ лежаща сѣчени отъ своихъ Сѣверъ и Варягы Ярославлѣ, и рече: „кто сему не радъ? се лежить Сѣверянинъ, а се Варягъ, а дружина своя цѣла“. И посла Мьстиславъ по Ярослава, глаголя: „сяди на своемъ столѣ Къевѣ, ты еси старѣйшей братъ, а мнѣ буди си сторона“; и не смяше Ярославъ ити въ Къевъ, дондеже смири-стася.

1026. Ярославъ совокупи воя многы, и приде Къеву, и створи миръ съ братомъ своимъ Мьстиславомъ у Городьця. И раздѣлиста по Днѣпръ Русьскую землю: Ярославъ прия сю сторону, а Мьстиславъ ону; и начаста жити мирно и въ братолюбьствѣ, и уста усобица и мятежъ, и бысть тишина велика въ земли.

1036. Мьстиславъ изиде на ловы, разболѣся и умре; и положиша ѱ въ церкви у святаго Спаса, юже бѣ самъ заложилъ, бѣ бо въздано ея при немъ възвыше, яко на кони стояще рукою досящи. Бѣ же Мьстиславъ дебелъ тѣломъ, чермень ²⁾ лицомъ, великыма очима, храборъ на рати, милостивъ, любяше дружину по велику, имѣнья не щадяше, ни питья, ни ѣденья браняше. Посемъ же перея власть его всю Ярославъ, и бысть самовластецъ Русьстѣй земли. Иде Ярославъ Новугороду, и посади сына своего Володимера Новѣгородѣ, епископа постави Жидяту. Ярославу же сущю Новѣгородѣ, вѣсть приде ему, яко Печенѣзи остоятъ Къевъ; Ярославъ събра воя многы, Варягы и Словѣни, приде Къеву, и вниде въ городъ свой. И бѣ Печенѣгъ безъ числа. Ярославъ выступи изъ града, и исполчи дружину, и постави Варягы по средѣ, а на правѣй сторонѣ Къяне, а на лѣвѣмъ крилѣ Новгородци; и сташа предъ градомъ. Печенѣзи приступати почаша, и

¹⁾ На разсвѣтѣ.

²⁾ Румянь.

сступишася на мѣстѣ, идеже стоитъ нынѣ святая Соѡѡя, митро-
поля Русьская; бѣ бо тогда поле внѣ града. И бысть сѣча зла,
и одва одолѣ къ вечеру Ярославъ. И побѣгоша Печенѣзи разно,
и не вѣдяхуся камо бѣжати, и овии бѣгающе тоняху въ Сѣтомли,
инѣ же въ инѣхъ рѣкахъ, а прокъ ихъ пробѣгоша и до сего дне ¹⁾.

1037. Заложи Ярославъ городъ великій Къевъ ²⁾, у него же
града суть Златая врата; заложи же и церковь святыхъ Соѡѡя,
митрополю, и посемь церковь на Золотыхъ воротѣхъ святыхъ
Богородица Благовѣщенье, посемь святаго Георгия монастырь и
святыхъ Ирины. И при семъ нача вѣра хрестыаньска плодиться
и расширяться, и черноризьци почаша множитися, и монастыреве
починаху быти. И бѣ Ярославъ любя церковныя уставы, попы
любяше по велику, излиха же ³⁾ черноризьцѣ, и книгамъ прилежа
и почитая я часто въ нощи и въ дне; и собра писцѣ многы, и
прекладаше отъ Грекъ на Словѣньское писмо, и списаша книги
многы, ими же поучащеся вѣрнии людье наслаждаются ученья
божественаго. Яко же бо се нѣкто землю разореть ⁴⁾, другой же
насѣть, ини же пожинають и ядятъ пищу бескудную, тако и
сѣ: отецъ бо его Володимеръ землю взора и умягчи, рекше
крещеньемъ просвѣтивъ; сѣ же насѣя книжными словесы сердца
вѣрныхъ людей, а мы пожинаемъ, ученье приемлюще книжное.
Велика бо бываетъ полза отъ ученья книжного; книгами бо кажеми
и учими есмы пути покаянью, мудрость бо обрѣтаемъ и въздер-
жанье отъ словесъ книжныхъ; се бо суть рѣкы, напаяющи все-
леную, се суть исходяща мудрости: книгамъ бо есть неисчетная
глубина, сами бо въ печали утѣшаеми есмы, си суть узда въздер-
жанью.

1043. Посла Ярославъ сына своего Володимера на Грькы, и
вда ему вои многы, а воеводство поручи Вышатѣ, отцю Яневи.
И поиде Володимеръ въ лодьяхъ, и придоша въ Дунай, и поидоша
ко Цесарюграду; и бысть буря велика, и разби корабли Руси,
и князь корабль разби вѣтръ, и взя князя въ корабль Иванъ
Творимиричъ, воевода Ярославль. Прочии же вои Володимери

¹⁾ Остатокъ пропалъ безслѣдно.

²⁾ Крѣпость (кремль).

³⁾ Особенно же.

⁴⁾ Отъ глагола „орати“.

вывержени быша на брегъ, числомъ 6000, и хотящемъ поити въ Русь, не идяше съ ними никто же отъ дружины княжее. И рече Вышата: „азъ пойду съ ними“; и высѣде изъ корабля къ нимъ, и рече: „аще живъ буду, то съ ними, аще погыну, то съ дружиною“. И поидоша, хотяще въ Русь. И бысть вѣсть Грькомъ, яко избило море Русь, и посла царь, именемъ Мономахъ, по Руси оладий 14; Володимеръ же видѣвъ съ дружиною, яко идутъ по немъ, въспятивъся изби оляди Гречьскыя, и възвратися въ Русь, всѣдъше въ кораблѣ своѣ. Вышату же яша съ изверженными на брегъ, и приведоша ѧ Цесарюграду, и слѣпиша Руси много; по трехъ же лѣтъхъ миру бывшую, пущенъ бысть Вышата въ Русь къ Ярославу. Въ си же времена вдасть Ярославъ сестру свою за Казимира, и вдасть Казимиръ за вѣно людей 8 сотъ, яже бѣ полонилъ Болеславъ, побѣдивъ Ярослава.

1044. Выгребоша 2 князя, Ярополка и Ольга, сына Свято-славля, и крестиша кости ею, и положиша ѧ въ церкви святыя Богородица. Въ се же лѣто умре Брячиславъ, сынъ Изяславль, внукъ Володимеръ, отецъ Всеславль, и Всеславъ, сынъ его, сѣде на столѣ его, егоже роди мати отъ вѣлхвованья; матери бо родивши его, бысть ему язвено на главѣ его, рекоша бо волсви матери его: „се язвено невяжи на нь, да носить ѧ до живота своего“, ¹⁾ еже носить Всеславъ и до сего дне на собѣ; сего ради немилостивъ есть на кровъпролитѣе.

1045. Заложи Володимеръ (Ярославичъ) святую Соѣю Новѣ-городѣ.

1051. Постави Ярославъ Лариона митрополитомъ Руси, въ святѣй Соѣи, собравъ епископы. И се да скажемъ чего ради прозвася Печерскый монастырь. Боголюбивому князю Ярославу любящую Берестовое, и церковь ту сущую Святыхъ Апостолъ, и поны многы набдящую, въ нихже бѣ презвутеръ, именемъ Ларионъ, мужъ благъ, книженъ и постникъ; и хожаше съ Берестоваго на Днѣпръ, на холмъ, кдѣ нынѣ ветхый монастырь Печерскый, и ту молитву творяше, бѣ бо ту лѣсъ великъ. Ископа печерку малу, двусажену, и приходя съ Берестоваго, отпѣваше часы и моляшеся ту Богу втайнѣ. Посемъ же Богъ князю вложи въ сердце,

¹⁾ Эту болячку (струпъ) навязи на него, и пусть онъ носить ее до смерти.

и постави ѿ митрополитомъ въ свѣтѣй Соѣби, а си печерка тако оста. И не по мнозѣхъ днехъ бѣ нѣкый человѣкъ отъ града Любча; и възложи сему Богъ въ сердце въ страны ити ¹⁾; онъ же устремися въ Святую Гору ²⁾, и видѣ ту монастыря сущая, и обиходивъ, възлюбивъ чернечьскій образъ, приде въ монастырь ту, и умоли игумена того, дабы на нь възложилъ образъ мнишьскій. Онъ же послушавъ его, постриже ѿ, нарекъ имя ему Антоний, наказавъ его и научивъ чернечьскому образу, и рече ему: „иди въ Русь опять, и буди благословенъ отъ Святыя горы, яко отъ тебе мнози чернцы быти имуть“; благослови ѿ, и отпусти его, рекъ ему: „иди съ миромъ“. Антоний же приде Кыеву и мысляше, кдѣ бы жити; и ходи по монастыремъ, и не възлюби, Богу не хотящу; и поча ходити по дебремъ и по горамъ, ища кдѣ бы ему Богъ показалъ; и приде на холмъ, идѣже бѣ Ларионъ ископалъ печерку, и възлюби мѣсто се, и вселися въ не, и нача молитися Богу со слезами, глаголя: „Господи! утверди мя въ мѣстѣ семъ, и да будетъ на мѣстѣ семъ благословенъ Святыя Горы и моего игумена, иже мя постригль“. И поча жити ту, моля Бога, ядый хлѣбъ сухъ, и то чересь день, и воды въ мѣру вкушая, копая печеру, и не да собѣ упокоя день и нощь, въ трудѣхъ пребывая, въ бдѣнии и въ молитвахъ. Посемъ же увѣдѣша добрии человѣци, и приходяху къ нему, приносяще же ему, еже на потребу бѣ, и прослу якоже великий Антоний: приходяще къ нему прошаху у него благословенья. Посемъ же преставльшюся великому князю Ярославу, прия власть сынъ его Изяславъ, и сѣде Кыевѣ. Антоний же прославленъ бысть въ Русьскѣй земли; Изяславъ же увѣдѣвъ житие его, приде съ дружиною своею, прося у него благословенья и молитвы. И увѣданъ бысть всѣми великий Антоний и чтимъ, и начаша приходити къ нему братья, и нача приимати и постригати ѿ; и собрася братьи къ нему числомъ 12 и ископаша печеру велику, и церковь, и кѣльи, яже суть и до сего дне въ печерѣ подъ ветхымъ монастыремъ. Совкупленѣ же братьи, рече имъ Антоний: „се Богъ васъ, братья, совокупи, и отъ благословенья есте Святыя Горы, имъже мене постриже игумень Святыя Горы, а язъ васъ постригалъ; да буди

¹⁾ Странствовать.

²⁾ Аѡнѣ.

благословенъе на васъ первое отъ Бога, а второе отъ Святыя Горы“; и се рекъ имъ: „живѣте же особѣ, и поставлю вы игумена, а самъ хочу въ ону гору ити единъ, якоже и прежде бяхъ обыкль, уединивъся жити“. И постави имъ игуменомъ Варлама, а самъ иде въ гору, и ископа пещеру, яже есть подъ новымъ монастыремъ, въ ней же сконча животъ свой, живъ въ добродѣтели, не выходя изъ пещеры лѣтъ 40 никудаже, въ нейже лежать мощѣ его и до сего дне. Братья же съ игуменомъ живяху въ пещерѣ, и умножившимся брати въ пещерѣ и не имущимъ ся вмѣстити, и помыслиша поставити внѣ пещеры монастырь; и приде игуменъ и братья ко Антонию, и рекоша ему: „отче! умножилось братѣ, а не можемъ ся вмѣстити въ пещеру; да бы Богъ повелѣлъ и твоя молитва, да быхомъ поставили церковьцю внѣ пещеры“, и повелѣ имъ Антоний. Они же поклонишася ему, и поставиша церковьцю малу надъ пещерою во имя Святыя Богородица Успенъе. И нача Богъ умножати черноризцѣ молитвами святыя Богородица, и съвѣтъ створиша братья со игуменомъ поставити монастырь; и идоша братья ко Антонию, и рѣша: „отче! братья умножаются, а хотѣли быхомъ поставити монастырь“. Антоний же радъ бывъ, рече: „благословенъ Богъ о всемъ, и молитва святыя Богородица и сущихъ отецъ иже въ Святѣй Горѣ да будетъ съ вами“. И се рекъ, посла единого отъ братѣ ко Изяславу князю, река тако: „княже мой! се Богъ умножаетъ братью, а мѣстыце мало; да бы ны далъ гору, яже есть надъ пещерою“; Изяславъ же слышавъ и радъ бысть, посла мужъ свой, и вда имъ гору ту. Игуменъ же и братья заложиха церковь велику, и монастырь огородиша столпеемъ, кельѣ поставиша многы, церковь свершиша и иконами украсиша. И оттолѣ почася Печерскый монастырь, имже бѣша жили чернцы прежде въ пещерѣ, а отъ того прозвася Печерскый монастырь; есть же монастырь Печерскый отъ благословенъя Святыя Горы пошелъ. Монастыреви же свершену, игуменьство держащу Варламови, Изяславъ же постави монастырь святаго Дмитрия, и выведе Варлама на игуменьство къ святому Дмитрию, хотя створити вышній сего монастыря, надѣяся богатъству. Мнози бо монастыри отъ цесарь, и отъ боярь, и отъ богатства поставлени, но не суть тацы, кацы суть поставлени слезами пощенъемъ, молитвою, бдѣньемъ; Антоний бо не имѣ злата, ни сребра, но стяжа слезами и пощенъемъ. Варламу же шедъшу къ

святому Дмитрию, совѣтъ створше братья, идоша къ старцю Антоню и рекоша: „постави намъ игумена“. Онъ же рече имъ: „кого хотите?“ Они же рѣша: „кого хочетъ Богъ и ты“. И рече имъ: „кто болий въ васъ, якоже Федосій, послушливый, кроткій, смѣренный; да съ будетъ вамъ игумень“. Братья же ради бывше, поклонишася старцю, и поставиша Феодосья игуменомъ братьѣ числомъ 20. Феодосиеви же приемшю монастырь, поча имѣти въздержанье, и велико пощенье, и молитвы съ слезами, и совокупляти нача многы черноризьци, и совокупи братьѣ числомъ 100. И нача искати правила чернечьскаго, и обрѣтеся тогда Михаилъ чернецъ монастыря Студийскаго, иже бѣ пришелъ изъ Грекъ съ митрополитомъ Георгиемъ, и нача у него искати устава чернецъ Студийскихъ; и обрѣтъ у него и списа, и устави въ монастыри своемъ. Феодосиеви же живущю въ монастыри, и правящую добродѣтельное житье и чернечьское правило, и приимающую всякого приходящаго къ нему, къ нему же и азъ придохъ худый и недостойный рабъ, и приять мя ѿлѣтъ ми сущю 17 отъ роженья моего. Се же написахъ и положихъ, въ кое лѣто почалъ быти монастырь, и что ради зовется Печерьскый. А о Феодосьевѣ житиѣ паки скажемъ.

1052. Преставися Володимерь, сынъ Ярославль.

1053. У Всеволода (сына Ярослава) родися сынъ, и нарече имя ему Володимерь ¹⁾, отъ царицѣ Гръкынѣ.

1054. Преставися великый князь Русьскый Ярославъ. И еще бо живущю ему, наряди сыны своя, рекъ имъ: „се азъ отхожю свѣта сего, сынове мои; имѣйте въ собѣ любовь, понеже вы есте братья единого отца и матере; да аще будете въ любви межю собою, Богъ будетъ въ васъ, и покорить вы противныя подъ вы, и будете мирно живуще; аще ли будете ненавидно живуще, въ распряхъ и которающеся ²⁾, то погыбнете сами и погубите землю отецъ своихъ и дѣдъ своихъ, юже налѣзоша трудомъ своимъ великимъ; но пребывайте мирно, послушающе братъ брата. Се же поручаю въ собе мѣсто столъ старѣйшему сыну моему и брату вашему Изяславу Кыевъ, сего послушайте, яко же послушасте мене, да той вы будетъ въ мене мѣсто; а Святославу даю Черни-

¹⁾ Владиміръ Мономахъ.

²⁾ Ссорясь.

говъ, а Всеволоду Переяславль, а Игорю Володимеръ ¹⁾, а Вячеславу Смолинескъ. И тако раздѣли имъ грады, заповѣдавъ имъ не преступати предѣла братня, ни сгонити, рекъ Изяславу: „аще кто хоцетъ обидѣти брата своего, то ты помагай, егоже обидятъ“; и тако уряди сыны своя пребывати въ любви. Самому же болну сущю и пришедшю Вышегороду, разболѣся велми, Изяславу тогда сущю Новгородѣ, а Святославу Володимери, Всеволоду же тогда сущю у отца, бѣ бо любимъ отцемъ паче всея брати, егоже имяше присно у собе. Ярославъ же приспѣ конецъ житъя, и предасть душу свою Богу, въ субботу 1 поста святаго Θεодора. Всеволодъ же спрята тѣло отца своего, възложыше на сани везоша ѿ Кыеву, попове поюще обычныя пѣсни, плакашася по немъ людье; и принесше положиша ѿ въ рацѣ мороморянѣ въ церкви святыя Соѡѣ. Живе же всѣхъ лѣтъ 70 и 6.

Пришедъ Изяславъ сѣде Кыевѣ, Святославъ Черниговѣ, Всеволодъ Переяславли, Игорь Володимери, Вячеславъ Смолинскѣ. Въ се же лѣто иде Всеволодъ на Торкы и побѣди Торкы. Въ семь же лѣтѣ приходи Болушь съ Половци и створи Всеволодъ миръ съ ними, и возвратишася Половци вспять, откуда же пришли.

1057. Преставися Вячеславъ, сынъ Ярославль, Смолинскѣ, и посадиша Игоря Смолинскѣ, изъ Володимеря выведше.

1060. Преставися Игорь, сынъ Ярославль. Въ семь же лѣтѣ Изяславъ, и Святославъ, и Всеволодъ, и Всеславъ совокупиша вои бещислены и поидоша на конихъ и въ лодьяхъ на Торкы. Се слышавше Торци, убояшася, пробѣгоша и до сего дне, и помроша бѣгающе Божьимъ гнѣвомъ гоними, ови отъ зимы, друзии же голодомъ, ини же моромъ и судомъ Божьимъ. Тако Богъ избави хрестьяны отъ поганныхъ.

1061. Придоша Половци первое на Русьскую землю воевать, Всеволодъ же изиде противу имъ, мѣсяца ѳевраля во 2 день; и бившимъся имъ, побѣдиша Всеволода и воевавшие отъидоша. Се бысть первое зло отъ поганныхъ и безбожныхъ врагъ.

1064. Бѣжа Ростиславъ (сынъ Владиміра Ярославича) Тмуторокаю, и съ нимъ бѣжа Порей и Вышата, сынъ Остромиръ, воеводы Новгородского; и пришедъ выгна Глѣба (Святославича) изъ Тмуторокана, а самъ сѣде въ него мѣсто.

¹⁾ Владиміръ Волыніскій.

1065. Иде Святославъ на Ростислава къ Тмутороканю; Ростиславъ же отступи кромѣ изъ града, не убоявѣся его, но не хотя противу стрыви ¹⁾ своему оружья взяти. Святославъ же пришедъ Тмуторканю, посади сына своего пакы Глѣба, и възвратися опять; Ростиславъ же пришедъ, пакы выгна Глѣба, и приде Глѣбъ къ отцю своему, Ростиславъ же сѣде Тмуторокани. Въ се же лѣто Всеславъ рать почалъ. Въ си же времена бысть знаменье на западѣ, звѣзда превелика, лучѣ имущи акы кровавы, възходящи съ вечера по заходѣ солнечнѣмъ, и пребысть за 7 дний. Се же проявляше не на добро, посемь бо быша усобицѣ многы и нашествие поганыхъ на Русьскую землю; си бо звѣзда бѣ акы кровава, проявляющи крови пролитье.

1066. Ростиславу сущю Тмуторокани и емлющю дань у Касогъ и у инѣхъ странъ, сего же убоявѣся Гръци, послаша съ лестью котопана ²⁾; оному же пришедшю къ Ростиславу и вѣрившюся ему, чтяшетъ ѿ Ростиславъ. Единою же пьющю Ростиславу съ дружиною своею, рече котопанъ: „княже! хочу на тя пити“ ³⁾; оному же рекшю: „лий“. Онъ же испивъ половину, а половину дасть князю пити, дотиснувъся пальцемъ въ чашю, бѣ бо имѣя подъ ногтемъ растворенье смертное, и вдасть князю, урекъ ⁴⁾ смерть до дне семаго. Оному же испившю, котопанъ же пришедъ Корсуню повѣдаше, яко въ сий день умереть Ростиславъ, яко же и бысть; сего же котопана побиша каменемъ Корсуньстии людье. Бѣ же Ростиславъ мужъ добль, ратенъ, возрастомъ же лѣпъ и красенъ ⁵⁾ лицомъ, и милостивъ убогымъ; и умре мѣсяца еевраля въ 3 день, и тамо положенъ бысть въ церкви святыя Богородица.

1067. Заратися Всеславъ, сынъ Брячиславль, Полоцкий, и зая Новъгородъ; Ярославичи же трие, Изяславъ, Святославъ, Всеволодъ, совокупивше вои, идоша на Всеслава, зимѣ сущи велицѣ. И придоша къ Мѣньску, и Мѣняне затворишася въ градѣ; си же братья взяша Мѣнескъ и исѣкоша мужѣ, а жены и дѣти вдаша на щиты, и поидоша къ Немизѣ, и Всеславъ поиде противу. И совокупишася обои на Немизѣ, мѣсяца Марта въ 3 день, и баше

¹⁾ Дядя по отцу.

²⁾ Чиновникъ.

³⁾ За твое здоровье (ср. годъ 945).

⁴⁾ Съ тѣмъ расчетомъ, чтобы онъ умеръ въ седьмой день.

⁵⁾ Красивъ.

снѣгъ великъ, и поидоша противу собѣ; и бысть сѣча зла, и мнози падоша, и одолѣша Изяславъ, Святославъ, Всеволодъ; Все-славъ же бѣжа. Посемъ же, мѣсяца иуля въ 10 день, Изяславъ, Святославъ и Всеволодъ цѣловаша крестъ честный къ Всеславу, рекше ему: „приди къ намъ, яко не створимъ ти зла“; онъ же надѣявсь цѣлованью креста, переѣха въ лодыи чересъ Днѣпръ. Изяславу же въ шатеръ предъидущю, и тако яша Всеслава на Рши у Смолинська, преступивше крестъ. Изяславъ же приведеъ Всеслава Кыеву, всади ѿ въ порубѣ съ двѣма сынома.

1068. Придоша иноплеменици на Русьску землю, Половци многи; Изяславъ же, и Святославъ и Всеволодъ изидоша противу имъ на Лѣто; и бывши нощи, подъидоша противу собѣ, грѣхъ же ради нашихъ пусти Богъ на ны поганья, и побѣгоша Русьскыи князи, и побѣдиша Половци. Изяславу же со Всеволодомъ Кыеву побѣгшю, а Святославу Чернигову, и людье Кыевстии при-бѣгоша Кыеву, и створиша вѣче на торговищи, и рѣша, по-славшеся ко князю: „се Половци росулися по земли; дай, княже, оружье и кони, и еще бѣмся съ ними“. Изяславъ же сего не послуша. И начаша людие говорити на воеводу на Коснячъка; идоша на гору съ вѣча, и придоша на дворъ Коснячковъ, и не обрѣтше его, сташа у двора Брячиславля и рѣша: „пойдемъ, высадимъ дружину свою изъ погреба“. И раздѣлишася надвое, половина ихъ иде къ погребу, а половина ихъ иде по мо-сту; си же придоша на княжъ дворъ. Изяславу же сѣдящю на сѣнехъ съ дружиною своею, начаша прѣтися со княземъ. Стояще долѣ ¹⁾, князю же изъ оконця зрящю и дружинѣ стоящи у князя, рече Туки, братъ Чюдинъ, Изяславу: „видиши, княже, людье възвыли; посли, ать Всеслава блюдутъ“. И се ему глаголющю, другая половина людей приде отъ погреба, отворивше погребъ; и рекоша дружина князю: „се зло есть; посли ко Всеславу, ать призвавше лестью ко оконцю, пронзуть и мечемъ“. И не послуша сего князь. Людье же кликнуша, и идоша къ порубу Всеславу; Изяславъ же се видѣвъ, со Всеволодомъ побѣгоста съ двора, людье же высѣкоша Всеслава изъ поруба и поставиша ѿ средѣ двора къ княжа; дворъ же княжъ разграбиша, бещисленное мно-жество злата и сребра, кунами и бѣлью. Изяславъ же бѣжа въ

¹⁾ Внизу.

Ляхы. Посемъ же Половцемъ воюющимъ по землѣ Русьстѣ, Святославу сущю Черниговѣ, и Половцемъ воюющимъ около Чернигова, Святославъ же собравъ дружины нѣколико, изыде на ня ко Сновьску. И узрѣша Половци идущъ полкъ, пристроишася противу; и видѣвъ Святославъ множество ихъ, и рече дружинѣ своей: „потягнѣмъ, уже намъ не лзѣ камо ся дѣти“. И удариша въ конѣ и одолѣ Святославъ въ трехъ тысячахъ, а Половецъ бѣ 12 тысячъ. Всеславъ же сѣде Кыевѣ. Се же Богъ яви силу крестную, понеже Изяславъ цѣловавъ крестъ и я ѿ ¹⁾).

1069. Поиде Изяславъ съ Болеславомъ на Всеслава, Всеславъ же поиде противу; и приде Бѣлугороду Всеславъ, и бывши нощи, утаивъся Кыянъ бѣжа изъ Бѣлагограда Полотьску. Заутра же видѣвше людье князя бѣжавша, възвратишася Кыеву, и створиша вѣче, и послашася къ Святославу и къ Всеволоду, глаголюще: „мы уже зло створили есмы, князя своего прогнавше, а се вестъ на ны Лядскую землю, а поидѣта въ градъ отца своего; аще ли не хочета, то намъ неволя: зажегше градъ свой, ступимъ въ Гречьску землю“. И рече имъ Святославъ: „вѣ ²⁾ послевѣ къ брату своему; аще поидеть на вы съ Ляхы губити васъ, то вѣ противу ему ратью, не давѣ бо погубити града отца своего; аще ли хочеть съ миромъ, то въ малѣ придетъ дружинѣ“. И утѣшиста Кыяны. Святославъ же и Всеволодъ посласта къ Изяславу, глаголюща: „Всеславъ ти бѣжалъ, а не води Ляховъ Кыеву, противна бо ти нѣту; аще ли хоцещи гнѣвъ имѣти и погубити градъ, то вѣси, яко нама жаль отня стола“. То слышавъ Изяславъ, остави Ляхы и поиде съ Болеславомъ, мало Ляховъ поимъ; посла же предъ собою сына своего Мьстислава Кыеву. И пришедъ Мьстиславъ, исѣче Кыяны, иже бѣша высѣкли Всеслава изъ поруба, числомъ 70 чади, а другыя слѣпиша, другыя же безъ вины погуби, не испытавъ. Изяславу же идущю къ граду, изидоша людье противу съ поклономъ, и прияша князь свой Кыяне, и сѣде Изяславъ на столѣ своемъ. И распуща Ляхы на покормъ, и избиваху Ляхы отай; и възвратися въ Ляхы Болеславъ, въ землю свою. Изяславъ же възгна торгъ на гору, и прогна Всеслава изъ Полотьска, посади сына своего Мьстислава

¹⁾ И захватилъ его (Всеслава).

²⁾ Дв. число перваго лица.

Полотъскѣ; онъ же вскорѣ умре ту, и посади въ его мѣсто брата его Святополка, Всеславу же бѣжавшю.

1071. Воеваша Половци у Ростовьця и у Неятина. Въ се же лѣто выгна Всеславъ Святополка изъ Полотъска. Въ се же лѣто побѣди Ярополкъ (сынъ Изяслава) Всеслава у Голотичьска. Въ си же времена приде волхвъ, прелщень бѣсомъ; пришедъ бо Къеву глаголаше, сице повѣдая людямъ: яко на пятое лѣто Днѣпру потещи вспять и землямъ преступати на ина мѣста, яко стати Гречьскы земли на Руской, а Русьскѣй на Гречьской, и прочимъ землямъ измѣнитися; егоже невѣгласи послушаху, вѣрнии же смѣяхуться, глаголюще ему: „бѣсъ тобою играетъ на пагубу тобѣ“. Се же и бысть ему: въ едину бо ночь бысть безъ вѣсти. Бѣси бо подътокше на зло вводятъ, посемъ же насмѣшаются, ввергъше ѿ въ пропасть смертнѹю, научивше глаголати, якоже се скажемъ бѣсовское наущенье и дѣйство. Бывши бо единою скудости въ Ростовьстѣй области, вѣстаста два вѣлѣхъва отъ Ярославля, глаголюща: „яко вѣ свѣвѣ ¹⁾), кто обилье держить“; и поидоста по Волзѣ, кдѣ приидуча въ погостъ, ту же нарекаста лучшиѣ жены, глаголюща, яко си жито держить, а си медъ, а си рыбы, а си скору. И привожаху къ нима сестры своя, матере и жены своя; она же въ мечтѣ прорѣзавша за плечемъ, вынимаста любо жито, любо рыбу, и убивашета многы жены, и имѣнье ихъ отъимашета собѣ. И придоша на Бѣлоозеро, и бѣ у нею людей инѣхъ 300. Въ се же время приключися прити отъ Святослава дань емлющю Яневи, сыну Вышатиноу; повѣдаша ему Бѣлозерци, яко два кудесника избила уже многы жены по Волзѣ и по Шекснѣ; и пришла еста сѣмо. Янъ же испытавъ, чья еста смерда ²⁾), и увѣдѣвъ, яко своего князя, пославъ къ нимъ, иже около ею сѹтъ, рече имъ: „выдайте волхва та сѣмо, яко смерда еста моего князя“. Они же сего не послушаша. Янъ же поиде самъ безъ оружья, и рѣша ему отроки его: „не ходи безъ оружья, осоромятъ тя“; онъ же повелѣ взяти оружья отрокомъ, и бѣста 12 отрока съ нимъ, и поиде къ нимъ къ лѣсу. Они же сташа исполчившеся противу; Яневи же идущю съ топорцемъ, выступиша отъ нихъ 3 мужи, придоша къ Яневи, рекуще

¹⁾ Мы знаемъ.

²⁾ Смердѣ—поселянинъ и горожанинъ низшаго сословія.

ему: „вида идеши на смерть, не ходи“; оному же повелѣвшю бити я, ко прочимъ же поиде. Они же сунушася на Яня, единъ грѣшися ¹⁾ Яня топоромъ, Янь же оборотя топоръ, удари я тыльемъ, повелѣ отрокомъ сѣчи я; они же бѣжаша въ лѣсъ, убиша же ту попина Янева. Янь же вшедъ въ градъ къ Бѣлозерцемъ, рече имъ: „аще не имете волхву сею, не иду отъ васъ и за лѣто“. Бѣлозерци же шедше яша я, и приведоша я къ Яневи. И рече има: „что ради погубиста толико человѣкъ?“ Онѣма же рекшема: „яко ти держать обилѣе, да аще истребивѣ сихъ, будетъ гобино; аще ли хоцещи, то предъ тобою вынемевѣ жито, ли рыбу, ли ино что“. Янь же рече: „по истинѣ лжа то; створилъ Богъ человѣка отъ землѣ, сставленъ костями и жылами отъ крове, нѣсть въ немъ ничтоже, и не вѣсть никтоже, но токѣмо единъ Богъ вѣсть“. Она же рекоста: „вѣ вѣвѣ, како есть человѣкъ створенъ“. Онъ же рече: „како“? Она же рекоста: „Богъ мывъся въ мовници и вспотивъся, отерся вѣтхемъ ²⁾, и верже съ небесе на землю; и распрѣся сотона съ Богомъ, кому въ немъ створити человѣка, и створи дьяволъ человѣка, а Богъ душу во нь вложи; тѣмже аще умреть человѣкъ, въ землю идетъ тѣло, а душа къ Богу“. Рече имъ Янь: „поистинѣ прельстилъ васъ есть бѣсъ; коему Богу вѣруета?“ Она же рекоста: „антихресту“. Онъ же рече има: „то кдѣ есть?“ Она же рекоста: „сѣдитъ въ безднѣ“. Рече има Янь: „какой то Богъ, сѣдя въ безднѣ? то есть бѣсъ, а Богъ есть на небеси, сѣдый на престолѣ“. Онѣма же рекшема: „нама бози повѣдають, не можеши нама створити ничтоже“. Онъ же рече има: „лжють вама бози“. Она же рекоста: „нама стати предъ Святославомъ, а ты не можеши створити ничтоже“. Янь же повелѣ бити я и поторгати брадѣ ею. Сима же тепенома и брадѣ ею поторганѣ проскѣпомъ ³⁾, рече има Янь: „что вама бози молвять?“ Онѣма же рекшема: „стати намъ предъ Святославомъ“. И повелѣ Янь вложить рубль ⁴⁾ въ уста има и привязати я къ упругу ⁵⁾, и пусти предъ собою въ лодѣ, и самъ

¹⁾ Промахнулся.

²⁾ Тряпка.

³⁾ Когда ихъ били и вырывали бороду клещами.

⁴⁾ Обрубокъ дерева.

⁵⁾ Мачта.

по нихъ иде. Сташа на устьи Шексны, и рече има Янь: „что вамъ бози молвять?“ Она же рѣста: „сице нама бози молвять: „не быти нама живымъ отъ тебе“. И рече има Янь: „то ти вама право повѣдали“. Она же рекоста: „но еще на ¹⁾ пустиши, многу ти добра будетъ; еще ли на погубиши, многу печаль примеш и зло“. Онъ же рече има: „еще ваю пущю, то зло ми будетъ отъ Бога“. И рече Янь певозникомъ: „ци кому васъ кто родинъ убьенъ отъ сею?“ Они же рѣша: „мнѣ мати, другому сестра, иному роженъе“. Онъ же рече имъ: „мъстите своихъ“. Они же поимше, убиша я и повѣсиша я на дубѣ. Яневи же идущю домови, въ другую ночь медвѣдь възлѣзъ, угрызъ ею и снѣсть; и тако погыбнуста наущенъемъ бѣсовьскимъ.—Бѣси не свѣдаютъ ничтоже, суть бо немощни и худи взоромъ ²⁾. Яко и се скажемъ о взорѣ ихъ и о омраченъи ихъ. Въ си бо времена приключися нѣкому Новгородцю прити въ Чюдъ, и приде къ кудеснику, хотя волхвованъя отъ него; онъ же по обычаю своему нача призывати бѣсы въ храмину свою. Новгородцю же сѣдящу на порозѣ тоя же храмины, кудесникъ же лежаше оцепѣвъ, и шибе имъ бѣсъ; кудесникъ же вставъ рече Новгородцю: „бози не смѣютъ прити, нѣчто имаши на собѣ, егоже боятся“. Онъ же помянувъ на собѣ крестъ, и отшедъ постави кромѣ храмины тое; онъ же нача опять призывати бѣсы; бѣси же метавше имъ, повѣдаша, что ради пришелъ есть. Посемъ же поча прашати его ³⁾: „чесо ради боятся его, егоже носимъ на собѣ креста?“ Онъ же рече: „то есть знаменъе небеснаго Бога, егоже наши бози боятся“. Онъ же рече: „то кади суть бози ваши, кде живутъ?“ Онъ же рече: „въ безднахъ; суть же образомъ черни, крилаты, хвосты имуще, всходятъ же и подъ небо, слушающе вашихъ боговъ; ваши бо бози на небеси суть; еще кто умреть отъ вашихъ людей, то възносимъ есть на небо; еще ли отъ нашихъ умреть, то носимъ къ нашимъ богомъ въ бездну“. Сиця есть бѣсовьская сила, и лѣпота, и немощь; тѣмже прелщаютъ человѣкъ, веляще имъ глаголати видѣнъя, являющеса имъ, несвершенымъ вѣрою, являющеса во снѣ, инѣмъ въ мечтѣ, и тако волхвуютъ наущенъемъ бѣсовьскимъ.

¹⁾ Винит. пад. 1-го лица дв. числа.

²⁾ На видѣ.

³⁾ Новгородецъ сталъ спрашивать кудесника.

Паче же женами бѣсовская волъшвеня бываютъ; но и мужи прелщени бываютъ отъ бѣсовъ невѣрнии. Сиць бѣ волхвъ всталъ при Глѣбѣ (Святославичѣ) Новѣгородѣ, глаголетъ бо людемъ, творяся акы Богъ, и многы прельсти, мало не всего града, глаголашеть бо, яко провѣде вся, и хуля вѣру хрестыанскую, глаголашеть бо: „яко перейду по Волхову предъ всѣми“. И бысть мятежъ въ градѣ, и вси яша ему вѣру, и хотяху погубити епископа; епископъ же вземъ крестъ и облекъся въ ризы, ста рекъ: „иже хочеть вѣру яту волхву, то да идетъ за нь; аще ли вѣруеть кто, то ко кресту да идетъ“. И раздѣлишася надвое: князь бо Глѣбъ и дружина его идоша и сташа у епископа, а людье вси идоша за вохва; и бысть мятежъ великъ межи ими. Глѣбъ же возма топоръ подъ скутомъ ¹⁾, приде къ волхву и рече ему: „то вѣси ли, что утро хочеть быти, и что ли до вечера“? Онъ же рече: „провѣде вся“ ²⁾. И рече Глѣбъ: „то вѣси ли, что ти хочеть быти днесъ?“ „Чюдеса велика створю“, рече. Глѣбъ же вынемъ топоръ, ростя ѿ, и паде мертвъ, и людье разидошася; онъ же погыбе тѣломъ и душею, предавъся дьяволу.

1072. Пренесоша святая страсотерпця Бориса и Глѣба. Совокупившеся Ярославичи, Изяславъ, Святославъ, Всеволодъ, митрополитъ, иже тогда бѣ Георги, епископъ Петръ Переяславскый, Θεодосий же игуменъ Печерскый, Соѳроний святаго Михаила игуменъ, Германъ игуменъ святаго Спаса, Никола игуменъ Переяславскый, и вси игумени, и створше праздникъ, праздноваша свѣтло, и преложиша ѿ въ новую церковь, юже сдѣла Изяславъ, яже стоитъ и нынѣ. И взявше первое Бориса въ древянѣ рацѣ Изяславъ, Святославъ, Всеволодъ, взявше на рама своя понесоша, предъидущемъ черноризцемъ, свеща держаще въ рукахъ, и по нихъ дьякони съ кадилы, и посемъ презвитери, и по нихъ епископи съ митрополитомъ; по сихъ съ ракою идяху. И принесли въ новую церковь, отверзоша раку, исполнися благоуханья церкы; видѣвше же се, прославиша Бога. И митрополита ужастъ обиде, бѣ бо нетвердъ вѣрою къ нима, и падъ ниць, просяше прощенья. Цѣловавше мощи его, вложише ѿ въ раку камену. Посемъ же взявше Глѣба въ рацѣ каменѣ, вставиша на

¹⁾ Подъ полою.

²⁾ Предвижу все.

сани, и еше за ужа везоша ѿ; яко быша въ дверехъ, ста рака и не иде. И повелѣша народу възвати: „Господи помилуй“, и повезоша ѿ; и положиша ѿ, мѣсяца мая 2 день. И отпѣвше литургию, обѣдаша братья на скупь, каждо съ бояры своими, съ любовью великою. Посемь же разидошася всояси.

1073. Въздвиге дьяволъ котору ¹⁾ въ брати сей Ярославичихъ. Бывши распри межи ими, поиде Святославъ со Всеволодомъ на Изяслава; изиде Изяславъ изъ Кыева, Святославъ же и Всеволодъ внидоша въ Кыевъ и сѣдоша на столѣ на Берестовомъ, преступивша заповѣдь отню. Святославъ же бѣ начало выгнанью братню, желая большее власти, Всеволода бо прелсти, глаголя: „яко Изяславъ сватится со Всеславомъ, мысля на наю; да аще его не варивѣ, ²⁾ имать на прогнати; и тако взостри Всеволода на Изяслава. Изяславъ же иде въ Ляхы со имѣньемъ многымъ, глаголя: „яко симъ налѣзу вои“. Еже все взяша Ляхове у него, показавше ему путь отъ себе. А Святославъ сѣде Кыевѣ, прогнавъ брата своего, преступивъ заповѣдь отню, паче же Божью.

1074. Θεодосий, игумень Печерскый, преставися. Скажемъ же о успеньи его мало. Θεодосий бо обычай имаше, приходящу постному времени, въ недѣлю Масленую, вечеръ, по обычаю цѣловавъ братью всю, поучати ихъ, како проводить постное время. И сице поучивъ братью, цѣлова въся по имени, и тако изидяше изъ монастыря, взимая мало коврижекъ, и вшедъ въ пещеру, и затворяше двери пещерѣ и засыпаше перстью, и не глаголаше никому же; аще ли будяше нужное орудье, то оконцемъ маломъ бесѣдоваше въ субботу ли въ недѣлю, ³⁾ а во ины дни пребываше въ постѣ и въ молитвахъ, вздержася крѣпко. И приходящу въ манастирь въ пятокъ на канунъ Лазаревъ; въ сей бо день кончается постъ 40 дний. Θεодосьеви же пришедшу по обычаю братью цѣлова, и празднова съ ними недѣлю Цвѣтную, и дошедъ велика дне Воскресенья, впаде въ болѣзнь. Разболѣвшю бо ся ему и болѣвшю дний 5, посемь бывшую вечеру, повелѣ изнести ся на дворъ; братья же взяше ѿ на сани, поставиша ѿ прямо церкви; онъ же повелѣ звати братью всю, братья же ударивше

¹⁾ Распря.

²⁾ Если не предваримъ.

³⁾ Т. е. воскресенье.

въ било, и собращася вси. Онъ же рече имъ: „братья моя, и отци мой, и чада моя! се азъ отхожю отъ васъ, якоже яви ми Господь въ постное время, въ пещерѣ сущю ми, изити отъ свѣта сего; вы же кого хотите игуменомъ имѣти собѣ, да и азъ благословеніе падалъ быхъ ему“? Они же рекоша ему: „ты еси намъ всѣмъ отецъ, да егоже изволиши самъ, то намъ буди отецъ и игумень, и послушаемъ его, яко и тебе“. Отецъ же нашъ Феодосій рече: „шедше кромѣ мене нарьцѣте, егоже хотите, отъ старѣйшихъ и до меншихъ“. Ониже послушавше его, отступиша мало къ церкви, и сдумавше послаша брата два, глаголюще сиде: „егоже изволить Богъ и твоя честная молитва, егоже тобѣ любо, того нарьци“. Феодосій же рече имъ: „да аще отъ мене хотите игумена прияти, то азъ створю вамъ не по своему изволенію, но по Божью строенію“; и нарече имъ Иякова пресвитера. Братья же нелюбо бысть, глаголюще: „яко не здѣ есть постриженъ“; бѣ бо Ияковъ пришелъ съ Летца съ братомъ своимъ Пауломъ. И начаша братья просити Стефана деместника, ¹⁾ суща тогда ученика Феодосьева, глаголюще: „яко съ взрослъ есть подъ рукою твоею, и у тебе послужилъ есть; сего ны вдай“. Рече же имъ Феодосій: „се азъ по Божью повелѣнію нареклъ быхъ Иякова; се же вы свою волю створити хотите.“ И послушавъ ихъ, предасть имъ Стефана. И посемъ взявше ѿ братья, несоша въ кѣлью и положиша на одрѣ. И шестому дни наставшю, болну сущю велми, приде къ нему Святославъ съ сыномъ своимъ Глѣбомъ; и сѣдящема има у него, рече ему Феодосій: „се отхожю свѣта сего, и се предаю ти манастирь на соблюденіе, еда будетъ кое смятеніе въ немъ; и се поручаю игуменьство Стефану, не дай его въ обиду.“ Князь же цѣловавъ его и обѣщася пещися монастыремъ, и иде отъ него. Семому же дни пришедшю, призва Стефана и братью, уже изнаемающую. И пресѣдючи братѣ ношъ ту у него, и наставшю дни осмому, въ 2-ю субботу по Пасцѣ, въ часъ 2 дне, предасть душу въ руцѣ Божии, мѣсяца мая въ 3 день. Бѣ же Феодосій заповѣдалъ положити ся въ пещерѣ, идѣже показа труды многы.

1075. Придоша сли изъ Нѣмецъ къ Святославу. Святославъ же величаяся, показа имъ богатство свое; они же видѣвше бещис-

¹⁾ Пѣвчаго.

ленное множество золота, и серебра и паволокы, и рѣша: „се ни въ что же есть, се бо лежить мертво; сего суть кметѣе ¹⁾ лучше, мужи бо ся доищють и болше сего“. Сиде ся похвали Иезекий, цесарь Иудѣйскъ, къ посломъ цесаря Асурійска, егоже вся взята быша въ Вавилонъ: тако и по сего смерти все имѣнне расыпася разнѣ.

1076. Ходи Володимеръ, сынъ Всеволожъ, и Олегъ, сынъ Святославль, Ляхомъ въ помочь на Чехы. Сего же лѣта преставися Святославъ, сынъ Ярославль, отъ рѣзанья желве ¹⁾, и положенъ въ Черниговѣ у святаго Спаса; и сѣде по немъ Всеволодъ на столѣ, мѣсяца генваря.

1077. Поиде Изяславъ съ Ляхы, Всеволодъ же поиде противу ему. Сѣде Борисъ (Вячеславичъ) Черниговѣ, и бысть княженья его 8 дний, и бѣжа Тмутороканю къ Романови. Всеволодъ же иде противу брату Изяславу на Волынь, и створиста миръ, и пришедъ Изяславъ сѣде Кыевѣ; Олегъ же, сынъ Святославль, бѣ у Всеволода Черниговѣ.

1078. Бѣжа Олегъ Тмутороканю отъ Всеволода. Въ се же лѣто убьенъ бысть Глѣбъ, сынъ Святославль, въ Заволочии; бѣ же Глѣбъ милостивъ убогымъ и страннолюбивъ, тѣанье имѣя къ церквамъ, теплъ на вѣру и кротокъ, взоромъ красенъ. Сѣдящю Святополку, сыну Изяславу, въ него мѣсто Новѣгородѣ, Ярополку сѣдящю Вышегородѣ, а Володимеру сѣдящю Смолинскѣ, приведе Олегъ и Борисъ поганья на Русьскую землю, и поидоста на Всеволода съ Половци. Всеволодъ же изиде противу има на Съжицѣ, и побѣдиша Половци Русь, и мнози убьени быша ту. Олегъ же и Борисъ придоста Чернигову, мняще одолѣвше, а землѣ Русьскѣй много зло створше, проливше кровь хрестыянску, еяже крове взищеть Богъ, отъ руку ею, и отвѣтъ дати има за погубленныя душа хрестыянскы. Всеволодъ же приде къ брату своему Изяславу Киеву, цѣловавшася и сѣдоста. Всеволодъ же исповѣда вся бывшая. И рече ему Изяславъ: „брате! не тужи; видиши ли, колико ся мнѣ склочи: первое, не выгнаша ли мене и имѣнне мое разграбиша? и пакы, кую вину вторую створилъ бѣхъ, не изгнанъ ли бѣхъ отъ ваю, брату своею? не блудилъ ли

¹⁾ Воины.

²⁾ Желвакъ.

бѣхъ по чюжимъ землямъ, имѣнья лишенъ быхъ, не створи хъ зла ничтоже? И нынѣ, брате, не тужи: еще будетъ нама причастье въ Русскѣй земли, то обѣма; еще лишена будевѣ, то оба; азъ сложю главу свою за тя“. И се рекъ, утѣши Всеволода, и повелѣ сбирати вой отъ мала до велика; и поиде Изяславъ съ Ярополкомъ, сыномъ своимъ, и Всеволодъ съ Володимеромъ, сыномъ своимъ. И поидоша къ Чернигову, и Черниговци затворишася въ градѣ; Олегъ же и Борисъ не бяста. Черниговцемъ же не отворившимся, приступиша ко граду; Володимеръ же приступи ко вратомъ восточнымъ, и отя ¹⁾ врата, и взяша градъ околний, и пожгоша ѿ, людемъ же вбѣгшимъ въ дѣнѣшній ²⁾ градъ. Изяславъ же и Всеволодъ слышаста, яко идетъ Олегъ и Борисъ, поидоста отъ града противу. Рече же Олегъ къ Борисови: „не ходивѣ противу, не можевѣ стати противу четверемъ княземъ; но посливѣ съ молбою къ стрыема своимъ“. И рече ему Борисъ: „ты готова зри, азъ имъ противенъ всѣмъ“; ³⁾ похваливѣся велми, не вѣдый, яко Богъ гордымъ противится. И поидоста противу, и бывшимъ имъ на мѣстѣ у села на Нѣжатинѣ нивѣ, и сступившимся обоимъ, бысть сѣча зла; первое убиша Бориса, сына Вячеслава, похвалившася велми; Изяславу же стоящу въ пѣшцихъ, и внезапно приѣхавъ единъ, удари ѿ копьемъ за плече; тако убьенъ бысть Изяславъ, сынъ Ярославль. Продолжени бывъши сѣчи, побѣже Олегъ въ малѣ дружинѣ, и одва утече, бѣжа Тмутороканю. Убьенъ бысть князь Изяславъ мѣсяца октямря въ 3 день; и взяше тѣло его, привезоша ѿ въ лоды, и поставиша противу Городьцю, изиде противу ему весь городъ Кыевъ, и възложивше тѣло его на сани повезоша ѿ, съ пѣснями попове и черноризци понесоша ѿ въ градъ, и не бѣ лзѣ слышати пѣнья во плачи и велицѣ вопли, плакася бо по немъ весь градъ Кыевъ; Ярополкъ же идяше по немъ, плачася съ дружиною своею: „отче, отче мой! что еси пожилъ безъ печали на свѣтѣ семь ⁴⁾, многы напасти примъ отъ людей и отъ братья своя? се же погыбе не отъ брата, но за брата своего положи главу свою“. Бѣ же Изяславъ мужъ взоромъ красенъ и тѣломъ великъ, незлобивъ

¹⁾ Отбилъ.

²⁾ Внутренній городъ, кремль.

³⁾ Ты только смотри: я пойду на всѣхъ на нихъ.

⁴⁾ Много ли ты пожилъ безъ печали.

правомъ, криваго ненавидѣ, любя правду; не бѣ бо въ немъ лсти, но простъ мужъ умомъ, не воздая зла за зло. Колико бо ему створиша Кияне: самого выгнаша, а домъ его разграбиша, и не възда противу тому зла; аще ли кто дѣеть ¹⁾ вы: Кыянъ исѣче, то не съ то створи, но сынъ его. Пакы же брата его прогнаста ѿ, и ходи въ чюжей земли, блудя; и сѣдящю ему пакы на столѣ своемъ, Всеволоду пришедшю побѣжену къ нему, не рече ему: „колико отъ васъ пряхъ?“ не вдасть зла за зло, но утѣши рекъ: „елмаже ты, брате мой, показа ко мнѣ любовь, введе мя на столъ мой и нарекъ мя старѣйшину собѣ, се азъ не помяну злобы первыя, ты ми еси братъ, а я тобѣ, и положю главу свою за тя“, еже и бысть; не рече бо ему: „колико зла створиста мнѣ, и се нонѣ тобѣ ся склучи“, не рече: „се кромѣ мене“; но на ся перея печаль братню, показая любовь велику, свершая Апостола глаголюща: утѣшайте печалныя. По истинѣ, аще что створилъ есть въ свѣтѣ семь, етеро согрѣшенъе, отдасться ему, занеже положи главу свою за брата своего, не желая болшее волости, ни имѣнья хотя болша, но за братню обиду.—Всеволодъ же сѣде Кыевѣ на столѣ отца своего и брата своего, примъ власть Русьскую всю; и посади сына своего Володимера Черниговѣ, а Ярополка Володимери, придавъ ему Туровъ.

1079. Приде Романъ съ Половци къ Воину, Всеволодъ же ста у Переяславля, и створи миръ съ Половци; и възвратися Романъ съ Половци въспяты, и убиша ѿ Половци. Суть кости его и доселѣ лежаче тамо, сына Святославля, внука Ярославля; а Олга емше Козаре поточиша ѿ за море Цесарюграду. Всеволодъ же посади посадника Ратибора Тмуторокани.

1083. Приде Олегъ изъ Грекъ Тмутороканю, и сѣде Тмуторокани, и исѣче Козары, иже бѣша свѣтници на убьенъе брата его и на самого.

1086. Приде Ярополкъ (Святославичъ) изъ Ляховъ, и створи миръ съ Володимеромъ, и иде Володимеръ вспяты Чернигову. Ярополкъ же сѣде Володимери. И пересѣдевъ мало дний, иде Звенигороду; и не дошедшю ему града, и прободенъ бысть отъ проклятаго Нерадѣця, отъ дьяволя наученъя и отъ злыхъ

¹⁾ Скажетъ вамъ.

человѣкъ. Лежащю ему ту на возѣ, саблею съ коня прободѣ ѿ мѣсяца ноямбря въ 22 день; и тогда въздвигнувъся Ярополкъ, выторгну изъ себе саблю, и возни великимъ гласомъ: „охъ, тотъ мя враже улови“. Бѣжа Нерадецъ треклятый Перемышлю къ Рюрикови (Ростиславичу).

1091. Игуменъ и черноризци съвѣтъ створше, рѣша: „не добро есть лежати отцю нашему Θεодосѣви кромѣ монастыря и церкви своя, понеже той есть основалъ церковь и черноризци совокупилъ“; совѣтъ створше, повелѣша устроити мѣсто, идѣже положити мощѣ его. И приспѣвшю празднику Успенья Богородицѣ, повелѣ игуменъ рушити, кдѣ лежать мощѣ его, отца нашего Θεодосѣя, егоже повелѣнью быхъ азъ грѣшный первое самовидецъ, еже скажу, не слухомъ бо слышавъ, но самъ о семъ начальникъ. Пришедшю же игумену ко мнѣ и рекшю ми: „пойдевъ въ пещеру къ Θεодосѣви“; азъ же пришедъ и со игуменомъ, не свѣдущю никому же, разглядавъ, кдѣ копати, и знаменовавъ мѣсто. Рече же ко мнѣ игуменъ: „не мози повѣдати никому же; но поими, егоже хочещи, да ти поможетъ“. Азъ же пристроихъ рогалие, ими же копати. И въ вторникъ, вечеръ, пояхъ съ собою 2 брата, не ведущю никому же, придохъ въ пещеру, и отпѣвъ псалмы, почыхъ копати; и утрудився вдахъ другому брату, копахомъ до полуночья, трудихомся, и не могуще ся докопати, начахъ тужити, еда како на страну копаемъ. Азъ же возьмъ рогалью, начахъ копати рамено, и другу моему опочивающю передъ пещерою, и рече ми: „удариша въ било“; и азъ въ то чинъ прокопахъ на мощѣ Θεодосѣвы, оному глаголющю ко мнѣ: „удариша въ било“; мнѣ же рекущю: „прокопахъ уже“. Егда же прокопахъ, обдержашеть мя ужастъ, и начахъ звати: Господи помилуй! Егда же прокопахъ, послахъ къ игумену: „приди да выемъ ѿ“; игуменъ же приде съ двѣма братами; и прокопавъ велми, и влѣзохомъ и видѣхомъ ѿ лежащъ мощьми, но состави не распалися бѣша, и власи главнии притяскли ¹⁾ бяху. И взложъше ѿ на вариманътью, вынесоша предъ пещеру. На другой же день собращася епископи, игумени отъ всѣхъ монастыревъ съ черноризци, придоша и людье благо-

¹⁾ Прилипли.

вѣрнии, и взяша мощѣ Ѳеодосѣевы, и положиша ѿ въ церкви своей, въ притворѣ на деснѣй странѣ.

Въ се же лѣто бысть знаменье въ солнци, яко погыбнути ему, и мало ся его оста, акы мѣсяць бысть, въ часъ 2 дне, мѣсяца мая 21 день. Въ се же лѣто Всеволоду ловы дѣящу звѣриныя за Вышегородомъ, заматавшимъ тенета и кличаномъ кликнувшимъ, спаде превеликъ змий отъ небесе, и ужасошася вси людье. Въ се же время земля стукну, яко мнози слышаша. Въ се же лѣто волхвъ явися Ростовѣ, иже вскорѣ погыбе.

1092. Предивно бысть Полотскѣ, въ мечтѣ ¹⁾ бываше въ ноци тутънѣ, ²⁾ стонаша по улици, яко челоувѣци рищюще бѣси; аще кто вылѣзаше изъ хоромины, хотя видѣти, абье уязвенъ будяше невидимо отъ бѣсовъ язвою, и съ того умираху, и не смяху излазити изъ хоромъ; посемь же начаша въ дне являтися на конихъ, и не бѣ ихъ видѣти самѣхъ, но конь ихъ видѣти копыта; и тако уязвляху люди Полотскыя; тѣмъ и челоувѣци глаголаху: яко навье ³⁾ бьютъ Полочаны. Въ си же времена бысть знаменье въ небеси, яко кругъ бысть посредѣ неба превеликъ. Въ се же лѣто ведро баше, яко изгараше земля, и мнози борове ⁴⁾ възгораху сами и болота; и многа знаменья бываху по мѣстомъ; и рать велика баше ото Половецъ и отвсюду.

1093. Преставися великый князь Всеволодъ, сынъ Ярославль, внукъ Володимерь. Сий бо благовѣрный князь Всеволодъ бѣ издѣтска боголюбивъ, любя правду, набдя убогыя, въдая честь епископомъ и презвутеромъ, излиха же любяше черноризци, и подаваше требованье имъ; бѣ же и самъ въздержася отъ пьянства и отъ похоти, тѣмъ любимъ бѣ отцемъ своимъ, яко же глаголати отцю къ нему: „сыну мой, благо тобѣ, яко слышу о тобѣ кротость, и радуюся, яко ты покоиши старость мою; аще ти подасть Богъ прияти власть стола моего, по братьи своей, съ правдою, а не съ насильемъ, то егда Богъ отведеть тя отъ житья сего, да ляжеша, идеже азъ лягу, у гроба моего, понеже люблю тя паче братьи твоее“. Се же сбысться глаголъ отца его. Разболѣвшюся ему велми, посла по

¹⁾ Казалось.

²⁾ Шумъ, гулъ.

³⁾ Мертвецы.

⁴⁾ Множ. число отъ слова боръ (лѣсъ).

сына своего Володимера Чернигову; пришедшю Володимеру, видѣвъ ѿ велики болна суща, и плакася; пресѣдящю Володимеру и Ростиславу, сыну его меньшему, пришедшю же часу, преставися тихо и кротко и приложися ко отцемъ своимъ, княживъ лѣтъ 15 Кыевѣ, а въ Переяславли лѣто, а въ Черниговѣ лѣто. Володимеръ же плакавъся съ Ростиславомъ, братомъ своимъ, спрятаста тѣло его; и взявше тѣло его положиша ѿ въ святѣй Соѣби. Володимеръ нача размышляти, река: „аще сяду на столѣ отца своего, то имамъ рать съ Святополкомъ взяти, яко есть столъ прежде отца его былъ“. И размысливъ посла по Святополку Турову, а самъ иде Чернигову, а Ростиславъ Переяславлю. И приде Святополкъ Кыеву, и изидоша противу ему Кияне съ поклономъ, и прияша ѿ съ радостью, и сѣде на столѣ отца своего и стрия своего. Въ се же время поидоша Половци на Русьскую землю; слышавше, яко умерлъ есть Всеволодъ, послаша слы къ Святополку о мирѣ. Святополкъ же, не здумавъ съ болшею дружиною отнею и стрия своего, совѣтъ створи съ пришедшими съ нимъ, и изымавъ слы, всажа ѿ въ истобѣку; слышавъ же се Половци, почаша воевати. И придоша Половци мнози, и оступиша Горцийскый градъ. Святополкъ же пусти слы Половецкыѣ, хотя мира, и не всхотѣша Половци мира, и ступиша Половци воюще. Святополкъ же поча сбирати вое, хотя на ня. И рѣша ему мужи смыслении: „не кушайся противу имъ, яко мало имаши вой.“ Онъ же рече: „имѣю отрокъ своихъ 700, иже могутъ противу имъ стати.“ Начаша же друзии несмыслении глаголати: „поиде, княже;“ смыслении же глаголаху: „аще бы ихъ пристроилъ и 8 тысячъ, не лихо ти есть ¹⁾; наша земля оскудѣла есть отъ рати и отъ продажъ; ²⁾ но послися къ брату своему Володимеру, да бы ти помоглъ“. Святополкъ же послушавъ ихъ, посла къ Володимеру, да бы помоглъ ему; Володимеръ же собра вой свои и посла по Ростислава, брата своего, Переяславлю, веля ему помагати Святополку. Володимеру же пришедшю Кыеву, совокупиастася у святаго Михаила, и взяста межи собою распря и которы, и уладившася цѣловаста крестъ межи собою. Половцемъ воющимъ по земли, и рѣша има мужи

¹⁾ Не много было бы.

²⁾ Поборы.

смыслении: „почто вы распря имата межи собою? а погании губять землю Русьскую; послѣди ся уладита, а нынѣ поидита противу поганымъ любо съ миромъ, любо съ ратью“. Володимеръ хотяше мира, Святополкъ же хотяше рати; и поиде Святополкъ, и Володимеръ и Ростиславъ къ Треполю, и придоша къ Стугнѣ. Святополкъ же, и Володимеръ и Ростиславъ созваша дружину свою на совѣтъ, хотяче поступити чересь рѣку, и начаша думати. И глаголаше Володимеръ: „яко сдѣ стояще, въ грозѣ сей, створимъ миръ съ ними;“ и пристояху совѣту сему смыслении мужи, Янь и прочии. Кияне же не всхотѣша совѣта сего, но рекоша: „хощемъ ся бити; поступимъ на ону сторону рѣки.“ И възлюбиша съвѣтъ съ, и преидоша Стугну рѣку; бѣ бо наводнилася вельми тогда. Половци же налегоса первое на Святополка, и взломиша полкъ его. Потомъ наступиша на Володимера, и бысть брань люта; побѣже Володимеръ съ Ростиславомъ. И прибѣгоша къ рѣцѣ Стугнѣ, и вбрѣде Володимеръ съ Ростиславомъ, и нача утапати Ростиславъ предъ очима Володимерима, и хотѣ похватити брата своего, и мало не утопе самъ; и утопе Ростиславъ, сынъ Всеволожъ. Володимеръ же пребредъ рѣку съ малою дружиною, мнози бо падоша отъ полка его, и боляре его ту падоша, и перешедъ на ону сторону Днѣпра, плакася по братѣ своемъ и по дружинѣ своей, и иде Чернигову, печалень зѣло. Святополкъ же вбѣже въ Треполь, и затворися ту, и бѣ ту до вечера, и на ту ночь приде Киеву. Половци же видѣвше, одолѣвше, пустишася по земли воююче, а друзии възвратишася къ Торцьскому. Си же ся злоба склучи въ день Възнесенья Господа нашего Ісуса Христа. Ростислава же искавше обрѣтоша въ рѣцѣ; и взявше принесоша ѥ Киеву, и плакася по немъ мати его, и вси людѣе пожалиша си по немъ повелику, уности его ради. Се бо на ны Богъ попусти поганья, не яко милуя ихъ, но насъ казня, да быхомъ ся востягнули отъ злыхъ дѣлъ; симъ казнить ны нахождениемъ поганныхъ: се бо есть батогъ его, да негли втягнувшеся вспоманемъся отъ злаго пути своего. Половци воеваша много, и възвратишася къ Торцьскому, и изнемогоша людѣе въ градѣ гладомъ, и предашася ратнымъ; Половци же, приимше градъ, запалиша ѥ огнемъ, и люди раздѣлиша, и ведоша въ вежѣ къ сердоболемъ своимъ и сродникомъ своимъ, мьного роду хрестьянску страждущю. Пе-

чални, мучими, зимою оцѣпляеми, въ алчи и въ жажи и въ бѣдѣ опустнѣвше лица, почернѣвши тѣлеса; незнаемою страною, языкомъ испаленымъ, нази ходяще и боси, ноги имуще сбодены тернѣемъ; со слезами отвѣщеваху другъ другу глаголюще: „азѣ бѣхъ сего города“, и другой: „а азѣ сея вѣси“; тако съупрашаются со слезами, родъ свой повѣдающе и въздыхающе, очи возводяще на небо къ Вышнему, свѣдущему тайная. Да никто же дерзнетъ рещи: яко ненавидими Богомъ есмы! Да не будетъ! Кого бо Богъ тако любить, якоже ны възлюбилъ есть? кого тако почелъ есть, яко же ны прославилъ есть и вознеслъ? Никого же. Тѣмъ же паче ярость свою воздвиже на ны, яко паче всѣхъ почтени бывше, горѣ всѣхъ сдѣяхомъ грѣхы.

1094. Створи миръ Святополкъ съ Половци, и поя собѣ жену, дщерь Тугорканю, князя Половецкаго. Томъ же лѣтѣ приде Олегъ съ Половци изъ Тьмутороканя, и приде Чернигову; Володимеръ же затворися въ градѣ, Олегъ же приде къ граду и пожже около града, и монастырѣ пожже. Володимеръ же створи миръ съ Олгомъ, и иде ѿ града на столъ отень Переяславлю; а Олегъ вниде въ градъ отца своего. Половци же начаша воевати около Чернигова, Олгови не възбраняюще, бѣ бо самъ повелѣлъ имъ воевати. Се уже третье навеле поганя на землю Русьскую, егоже грѣха дабы ѿ Богъ простилъ, занеже много хрестыанъ изгублено бысть, а друзии полонени и расточени по землямъ. Въ се же лѣто придоша пружи ¹⁾ на Русьскую землю, и поѣдоша всяку траву и многа жита; и не бѣ сего слышано въ днѣхъ первыхъ въ земли Русьстѣ, яже видѣста очи наши, за грѣхы наша.

1096. Приде Тугорканъ, тестъ Святополкъ, къ Переяславлю и ста около града, а Переяславци затворишася въ градѣ. Святополкъ же и Володимеръ поидоста на нь по сей сторонѣ Днѣпра, и придоша къ Зарубу, и ту перебродистася, и не почюша ихъ Половци, Богу схраншю ихъ, и исполчившася поидоста къ граду; гражане же узрѣвше, ради быша и поидоша къ нима, а Половци стояху на оной сторонѣ Трубежа, исполчившеся. Святополкъ же и Володимеръ вбредоста въ Трубежъ къ Половцемъ, Володимеръ же хотѣ нарядити полкъ, они же не послушаша, но удариша

¹⁾ Саранча.

въ конѣ къ противнымъ; се же видѣвше Половци побѣгоша, а наши погнаша въ слѣдъ ратныхъ, сѣкуще противныя; и князя ихъ убиша Тугоркана и сына его и ини князи; мнози вразити падоша; на заутрѣ же налѣзоша Тугоркана мертва, и взя ѿ Святополкъ акы тѣста своего, и привезше ѿ къ Къеву, погребоша ѿ на Берестовѣмъ, межю путемъ идущимъ на Берестово и другимъ въ монастырь идущимъ. И въ 20 того же мѣсяца (иулія) приде Бонякъ безбожный, шелудивый, отай, хыщникъ, къ Къеву внезапу, и мало въ градъ не вѣхаша Половци, и зажгоша болонье ¹⁾ около града, и възвратишася на монастырь, и възгоша Стефановъ монастырь. И придоша на монастырь Печерскій, намъ сущимъ по кѣльямъ почивающимъ по заутрени, и кликнуша около монастыря, и поставиша стяга два предъ враты монастырскими, намъ же бѣжащимъ задомъ монастыря, а другимъ възбѣгшимъ на полати ²⁾. Безбожныя же сынове Измаилеви высѣкоша врата монастырю, и поидоша по кельямъ, высѣкаяще двери, и изношаху аще что обрѣтаху въ кельи; посемъ възгоша домъ святыя Владычицѣ нашея Богородица. (Лѣтописецъ ведетъ родъ Половцевъ отъ Измаила. „У Измаила, говоритъ онъ, было 12 сыновей: отъ нихъ произошли Туркмены, Печенѣги, Торки, Половцы и тѣ 8 колѣнъ нечистыхъ человѣковъ, которыхъ Александръ Македонскій заклепалъ въ горѣ и которые выйдутъ оттуда при кончинѣ вѣка“. По этому поводу онъ воспоминаетъ:) Се же хочу сказати, яже слышахъ прежде сихъ 4 лѣтъ, яже сказа ми Гюрята Роговичъ Новгородецъ, глаголя сиче: „яко послахъ отрокъ свой въ Печеру, люди, иже суть дань дающе Новгороду; и пришедшу отроку моему къ нимъ, а оттуду иде въ Югру. Югра же людье есть языкъ нѣмъ, и сосѣдять съ Самоядью на полунощныхъ странахъ. Югра же рекоша отроку моему: „дивьно мы находихомъ чюдо, егоже нѣсмы слышали прежде сихъ лѣтъ, се же третье лѣто поча быти; суть горы зайдуче въ луку моря, имже высота яко до небесе, и въ горахъ тѣхъ кличъ великъ и говоръ, и сѣкутъ гору, хотяще высѣчися; и въ горѣ той просѣчено оконце мало, и тудѣ молвятъ, и есть не разумѣти языку ихъ, но кажутъ на желѣзо, и помаваютъ рукою, просяще желѣза; и аще кто

¹⁾ Мѣсто за городской стѣной.

²⁾ Хоры.

дать имъ ножъ ли, ли секиру, и они даютъ скорою противу“. Мнѣ же рекшу къ Гюратѣ; „си суть людье заклепении Александромъ, Македоньскимъ царемъ, — яко же сказаетъ о нихъ Меѳодий Патарійскій“.

1097. Придоша Святополкъ, и Володимеръ, и Давыдъ Игоревичъ, и Василко Ростиславичъ, и Давыдъ Святославичъ, и братъ его Олегъ, и сняшася Любачи на устроенье мира, и глаголаша къ собѣ, рекуще: „почто губимъ Русьскую землю, сами на ся котору дѣюще? а Половци землю нашу несутъ розно, и ради суть, оже межю нами рати; да нынѣ отселѣ имемся въ едино сердце, и блюдемъ Руськыѣ земли, каждо да держить отчину свою: Святополкъ Къевъ Изяславлю отчину, Володимеръ Всеволожью, Давыдъ и Олегъ и Ярославъ Святославлю; а имъ же роздаялъ Всеволодъ города: Давыду (Игоревичу) Володимеръ, Ростиславичема Перемышль Володареви, Теробовль Василкови“. И на томъ цѣловаша крестъ: „да аще кто отселѣ на кого будетъ, то на того будемъ вси и крестъ честный“; рекоша вси: „да будетъ на нь крестъ честный и вся земля Русьская“; и цѣловавшеся поидоша всояси. И приде Святополкъ съ Давыдомъ (Игоревичемъ) Къеву, и ради быша людье вси, но токмо дьяволъ печалень быше о любви сей; и влѣзе сотона въ сердце нѣкоторымъ мужемъ, и почаша глаголати къ Давыдови Игоревичю, рекуще сиче: „яко Володимеръ сложился есть съ Василкомъ на Святополка и на тя“. Давыдъ же, емъ вѣру лживымъ словесомъ, нача молвити на Василка, глаголя: „кто есть убилъ брата твоего ¹⁾ Ярополка? а нынѣ мыслить на мя и на тя, и сложился есть съ Володимеромъ; да помышляяй о своей головѣ“. Святополкъ же смятеся умомъ, еда се право будетъ или лжа не вѣдѣ; и рече Святополкъ къ Давыдови: „да аще право глаголеши, Богъ ти буди послухъ ²⁾; да аще ли завистью молвишь, Богъ будетъ за тѣмъ“ ³⁾. Святополкъ же сжалися по братѣ своемъ, и о собѣ нача помышляти, еда се право будетъ; и я вѣру Давыдови, и прелсти Давыдъ Святополка, и начаста думати о Василкѣ; а Василко сего не вѣдѣше, ни Володимеръ. И нача Давыдъ глаголати: „аще не имевъ Василка,

¹⁾ См. 1086 годъ.

²⁾ Свидѣтель.

³⁾ Т. е. за Василькомъ.

то ни тобѣ княженя Кыевѣ, ни мнѣ въ Володимери“; и послуша его Святополкъ. И приде Василко въ 4 ноямбря, и перевезеса на Выдобычъ, и иде поклонитя къ святому Михаилу въ монастырь, и ужина ту, а товары своя постави на Рудици; вечеру же бывшую, приде въ товаръ свой. И наутрия же бывшую, присла Святополкъ, река: „не ходи отъ именинъ моихъ“ ¹⁾. Василко же отпрѣся, река: „не могу ждати; еда будетъ рать дома“. И присла къ нему Давыдъ: „не ходи, брате, не ослушайся брата старѣйшаго“; и не всхотѣ Василко послушати. И рече Давыдъ Святополку: „видиши ли, не помнить тебе, ходя въ твоею руку; аще ти отъидеть въ свою волость, самъ узриши, аще ти не займетъ градъ твоихъ Турова, и Пиньска, и прочихъ градъ твоихъ, да помянешь мене; но призвавъ нынѣ ѿ, емъ и дажь ми“. И послуша его Святополкъ, и посла по Василка, глаголя: „да аще не хочеши ждати до именинъ моихъ, да приди нынѣ, цѣлуеши мя, и посѣдимъ вси съ Давыдомъ“. Василко же обѣщася прити, не вѣдый лсти, юже имяше на нь Давыдъ. Василко же всѣдъ на конь поѣха, и устрѣте и отрокъ его, и повѣда ему глаголя: „не ходи, княже, хотятъ тя яти“. И не послуша его, помышляя: „како мя хотятъ яти? оногды цѣловали крестъ рекуще: аще кто на кого будетъ, то на того будетъ крестъ и мивси“. И помысливъ си прекрестися, рекъ: „воля Господня да будетъ“. И приѣха въ малѣ дружинѣ на княжъ дворъ; и вылѣзе притиву его Святополкъ, и идоша въ истобку, и приде Давыдъ, и сѣдоша, и нача глаголати Святополкъ: „останися на святокъ“. И рече Василко: „не могу остати, брате; уже есмь повелѣлъ товаромъ поити переди“. Давыдъ же сѣдѣше акы нѣмъ. И рече Святополкъ: „да заутрокай, брате!“ и обѣщася Василко заутрокати. И рече Святополкъ: „посѣдита вы здѣ, а язъ лѣзу, наряжу“. И лѣзе вонъ, а Давыдъ съ Василкомъ сѣдо-ста. И нача Василко глаголати къ Давыдови, и не бѣ въ Давыдѣ гласа, ни послушанья; бѣ бо ужаслѣся и лестъ имѣя въ сердци. И посѣдѣвъ Давыдъ мало, рече „где есть братъ?“ Они же рѣша ему: „стоитъ въ сѣнехъ“. И вставъ Давыдъ рече: „азъ иду по нь, а ты, брате, посѣди“. И вставъ иде вонъ. И яко выступи Давыдъ; и запроша Василка, въ 5-й ноямбря, и оковаша ѿ въ двои оковы, и приставиша къ нему сторожѣ на ночь. Наутрия же

¹⁾ Христіанское имя Святополка было Михайлъ (8-го ноября).

Святополкъ созва боляръ и Кыянъ, и повѣда имъ, еже бѣ ему повѣдалъ Давыдъ: яко „брата ти убилъ, а на тя свѣчался съ Володимеромъ, и хоцетъ тя убити и грады твоя зяти“. И рѣша бояре и людье: „тобѣ, княже, достоить блюсти головы своее; да аще есть право молвилъ Давыдъ, да приметъ Василко казнь; аще ли неправо глагола Давыдъ, да приметъ месть отъ Бога и отвѣчаетъ предъ Богомъ“. И увѣдѣша игумени, и начаша молитися о Василкѣ Святополку; и рече имъ Святополкъ: „ото Давыдъ“. Увѣдѣвъ же се Давыдъ, нача поущати на ослѣпленье: „аще ли сего не створишь, апустишь ѿ, то ни тобѣ княжити, ни мнѣ“. Святополкъ же хотяше пустити ѿ, но Давыдъ не хотяше, блюдая его. И на ту ночь ведоша ѿ Бѣлугороду, иже градъ малъ у Києва, яко 10 верстъ въ дале, и привезоша ѿ на колѣхъ, окована суща, ссадиша ѿ съ колъ, и ведоша ѿ въ истобку малу. И сѣдящю ему, узрѣ Василко Торчина остряща ножъ и разумѣ, яко хотять ѿ слѣпити, възни къ Богу плачемъ великимъ и стенаньемъ. И се влѣзоша послании Святополкомъ и Давыдомъ, Сновидъ Изечевичъ, конюхъ Святополчъ, и Дмитръ, конюхъ Давыдовъ, и почаста простирати коверъ, и простерша яста Василка и хотяста ѿ повреши; и боряшется съ нима крѣпко, и не можа-ста его повреши. И се влѣзше друзии повергоша ѿ, и связаша и снемше доску съ печи, и возложиша на перси его; и сѣдоста оба полы Сновидъ и Дмитръ, и не можаста удержати; и приступиста ина два, и сняста другую дску съ печи, и сѣдоста, и удавиша ѿ рамяно, яко персемъ трескотати. И приступи Торчинъ, именемъ Беренди, овчюхъ Святополчъ, держа ножъ и хотя ударити въ око, и грѣшися ока и перерѣза ему лице, и есть рана та на Василкѣ и нынѣ; и посемъ удари ѿ въ око, и изъ зѣницю, и посемъ въ другое око, и изъ другую зеницю; и томъ часѣ бысть яко мертвъ. И взявше ѿ на коврѣ възложиша на кола яко мертва, повезоша ѿ Володимерю. И бысть везому ему, сташа съ нимъ, перешедше мостъ Звиженъскый, на торговищи, и сволокоша съ него сорочку, кроваву сущю, и вдаша попадѣи опрати; попадѣя же оправши възложи на нь, онѣмъ обѣдующимъ, и плакаться нача попадѣя, яко мертву сущю оному. И очюти плачь, и рече: „кдѣ се есмь?“ Они же рекоша ему: „въ Звиждени городѣ“. И вприси воды, они же даша ему, и испи воды, и вступи во нь душа, и упомянуса, и пощюпа сорочки и рече: „чему есте

сняли съ мене? да быхъ въ той сорочкѣ кровавѣ смерть приялъ и сталъ предъ Богомъ“. Онѣмъ же обѣдавшимъ, поидоша съ нимъ вскорѣ на колѣхъ, а по грудну ¹⁾ пути, бѣ бо тогда мѣсяць грудень, рекше ноябрь; и придоша съ нимъ Володимерю въ 6 день, приде же и Давыдъ съ нимъ, акы нѣкакъ уловъ уловивъ ²⁾; и посадиша ѱ въ дворѣ Вакѣевѣ, и приставиша 30 мужъ стеречи и 2 отрока княжа, Уланъ и Колчко. Володимеръ же слышавъ, яко ятъ бысть Василко и слѣпленъ, ужасеся, и всплакавъ рече: „сего не бывало есть въ Русьскѣй земли ни при дѣдѣхъ нашихъ, ни при отцѣхъ нашихъ, сякого зла“. И ту абѣ посла къ Давыду и къ Олгови Святославичема, глаголя: „пойдѣта къ Городцю, да поправимъ сего зла, еже ся створи въ Русьскѣй земли и въ насъ, въ брати, оже вверженъ въ ны ножъ; да еще сего не правимъ, то большее зло встанеть въ насъ, и начнетъ братъ брата закалати, и погыбнетъ земля Руская, и врази наши Половци пришедше возмутъ землю Русьскую“. Се слышавъ Давыдъ и Олегъ, печална быста велми и плакастася, рекуща: „яко сего не было въ родѣ нашемъ“. И ту абѣ собравша воѣ, придоста къ Володимеру, Володимеру же съ вои стоящу въ бору; Володимеръ же и Давыдъ и Олегъ послаша мужѣ свои, глаголюще къ Святополку: „что се зло створилъ еси въ Русьскѣй земли, и ввергль еси ножъ въ ны? чему еси ослѣпилъ братъ свой? аще ти бы вина кая была на нь, обличилъ бы ѱ предъ нами, и упрѣвъ бы ѱ, створилъ ему; а нынѣ яви вину его, оже ему се сотворилъ еси“. И рече Святополкъ: „яко повѣда ми Давыдъ Игоревичъ яко Василко брата ти убилъ, Ярополка, и тебѣ хочетъ убити и зяяти волость твою, Туровъ и Пинескъ, и Берестие и Погорину, а заходилъ ротѣ съ Володимеромъ, яко сѣсти Володимеру Кыевѣ, а Василкови Володимери; а неволя ми своее головы блюсти, и не ѱзъ его ослѣпилъ, но Давыдъ, и велъ ѱ къ собѣ“. И рѣша мужи Володимери и Давыдови и Олгови: „извѣта о семъ не имѣй, яко Давыдъ есть слѣпилъ ѱ; не въ Давыдовѣ городѣ ятъ, ни слѣпленъ, но въ твоємъ градѣ ятъ и слѣпленъ“; и се имъ глаголющимъ, разидошася разно. Наутрия же хотящимъ чресъ Днѣпръ на Святополка, Святополкъ же хотѣ побѣгнути изъ Кыева, и не

¹⁾ Распутица.

²⁾ Какъ бы поймавъ звѣря.

даша ему Кыяне побѣгнуги, но послаша Всеволожою ¹⁾ и митрополита Николу къ Володимеру, глаголюще: „молимся, княже, тобѣ и братома твоима, не мозѣте погубити Русьскыѣ земли; аще бо възмете рать межю собою, погании имуть радоватися, и возмутъ землю нашу, юже бѣша стяжали отци ваши и дѣди ваши трудомъ великимъ и храбрѣствомъ, побарающе по Русьскѣй земли, ины земли приискываху, а вы хотите погубити землю Русьскую. Всеволожая же и митрополитъ придоста къ Володимеру и молишася ему, и повѣдаста молбу Кыянѣ, яко творити миръ, и блюсти землѣ Русьскѣ, и бранѣ имѣти съ погаными. Се слышавъ Володимеръ, расплакавъся и рече: „по истинѣ отци наши и дѣди наши зблуди землю Русьскую, а мы хотимъ погубити“; и преклонися на молбу княгинину, чтяшетъ ю акы мать, отца ради своего, и митрополита такоже чтяше, санъ святительскыи, и не преслуша молбы его. Княгини же бывши у Володимера, приде Кыеву, и повѣда вся рѣчи Святополку и Кыяномъ, яко миръ будетъ. И начаша межю собою мужи слати, и умиришася на семь, яко рѣша Святополку: „яко се Давыдова сколота, то иди ты, Святополче, на Давыда, любо ими, любо прожени ѿ“; Святополкъ же емъся по се, и цѣловаша крестъ межю собою, миръ створше. Василькови же сущю Володимери, на прежереченѣмъ мѣстѣ, и яко приближися постъ великыи, и мнѣ ту сущю Володимери, въ едину ноцъ присла по мя князь Давыдъ. И придохъ къ нему, и сѣдяху около его дружина, и посадивъ мя и рече ми: „се молвилъ Василко си noci къ Уланови и Колчи, реклъ тако: се слышу, оже идетъ Володимеръ и Святополкъ на Давыда; да же бы мене Давыдъ послушалъ, да быхъ послалъ мужъ свой къ Володимеру воротиться; да се, Василю ²⁾, шлю ты, иди къ Василькови, тезу своему, съ сима отрокома, и молви ему тако: оже хоцещи послати мужъ свой и воротится Володимеръ, то вдамъ ти который ти городъ любъ, любо Всеволожъ, любо Шеполь, любо Перемиль“. Азъ же идохъ къ Василькови, и повѣдахъ ему вся рѣчи Давыдовы. Онъ же рече: „сего есмь не молвилъ; но надѣюся на Богъ, пошлю да быша не прольяхи мене ради крови; но сему ми дивно, даетъ ми городъ свой, а мой Тере-

¹⁾ Вдова Всеволода, мачеха Владиміра.

²⁾ Отсюда видно, что составитель этой повѣсти назывался Васильемъ.

бовль, моя волость, пождавше и ныне ¹⁾“. Мнѣ же рече: „иди къ Давыдови и рци ему: пришли ми Кульмѣя, то пошлю къ Володимеру“. И не послуша его Давыдъ, и посла мя пакы река: „нѣту Кульмѣя“. И рече ми Василко: „посѣди мало“, и повелѣ служѣ своему ити вонъ, и сѣде со мною, и нача ми глаголати: „се слышу, оже мя хочеть дати Ляхомъ Давыдъ; то се мало ся насытилъ крове моея, а се хочеть боле насытитися, оже мя вдасть имъ? азъ бо Ляхамъ много зла творихъ, и хотѣлъ есмь мстити Русьскѣй земли. И аще мя вдасть Ляхомъ, не боюся смерти; но се повѣдаю ти по истинѣ, яко на мя Богъ наведе за мое възвышенъе: яко приде ми вѣсть, яко идутъ ко мнѣ Берендичи, и Печенѣзи и Торци, и рекохъ въ умѣ своемъ: оже ми будутъ Берендичи, Печенѣзи и Торци, реку брату своему Володареву и Давыдови: дайте ми дружину свою молотшую, а сама пийта и веселитася; и помыслихъ: на землю Лядскую наступлю на зиму, и на лѣто и возму землю Лядскую и мѣщю Русьскую землю; и посемъ хотѣлъ есмь переяти Болгары Дунайскыѣ и посадити ѿ у собе; и посемъ хотѣхъ проситися у Святополка и у Володимера ити на Половци, да любо налѣзу собѣ славу, а любо голову свою сложю за Русьскую землю; ино помышленъе въ сердци моемъ не было ни на Святополка, ни на Давыда, и се кленуся Богомъ и его пришествиемъ, яко не помыслилъ есмь зла брати своей ни въ чемже, но за мое възнесенъе низложи мя Богъ и смири“. Посемъ же приходящю Велику дни, поиде Давыдъ, хотя переяти Василкову волость, и усрѣте ѿ Володарь, братъ Василковъ, у Бужьска, и не смѣ Давыдъ стати противу Василкову брату, и затворися въ Бужьскѣ, и Володарь оступи ѿ въ городѣ. И нача Володарь молвити: „почто зло створивъ и не каешися его? да уже помянися, колико еси зла створилъ“. Давыдъ же на Святополка нача извѣтъ имѣти, глаголя: „ци я се створилъ? ци ли въ моемъ городѣ? Я ся самъ боялъ, аще быша и мене яли и створили такоже; неволя ми было пристати въ совѣтъ, ходяче въ руку“ ²⁾. И рече Володарь: „Богъ свѣдѣтель тому, а нынѣ пусти братъ мой, и створю съ тобою миръ“. И радъ бывъ Давыдъ, посла по Василка, и приведъ ѿ дасть Володарю, и сътвори ста миръ и разидостася. И сѣде Василко Теробовли, а Давыдъ приде

¹⁾ И до сихъ поръ ждетъ меня.

²⁾ Бывши въ чужихъ рукахъ.

Володимерю; и наставши веснѣ, приде Володарь и Василько на Давыда, и придоста ко Всеволожю, а Давыдъ затворися Володимери. Онѣма же ставшиа около Всеволожа, и взяста копьемъ градъ и зажгоста огнемъ, и бѣгоша людье огня; и повелѣ Василько исѣчи вся, и створи мщенье на людехъ неповинныхъ, и проля кровь невинну. Посемъ же придоста къ Володимерю, и затворися Давыдъ въ Володимери, и си оступиша градъ. И посласта къ Володимерцемъ, глаголюще: „вѣ не приидоховѣ на градъ вашъ, ни на васъ, но не врагы своя, на Туряка, и на Лазаря, и на Василя, ти бо суть намолвили Давыда, и тѣхъ есть послушалъ Давыдъ и створилъ се зло; да еще хотите за сихъ битися, да се ми готови, а любо выдайте врагы наша“. Граждане же се слышавъ, созваша вѣче, и рѣша Давыдови людье: „выдай мужи сия, не бьемъся за сихъ, за ты битися можемъ; аще ли, то отворимъ врата граду, а самъ промышляй о собѣ;“ и неволя бысть выдати я. И рече Давыдъ: „нѣту ихъ здѣ“, бѣ бо я послалъ Лучьску; онѣмъ же пошедшимъ Лучьску, Турякъ бѣжа Къеву, а Лазарь и Василь воротистася Турийску. И слышаша людье, яко Турийскѣ суть, кликнуша людье на Давыда, и рекоша: „выдай, кого ти хотять; аще ли, то предаемыся“. Давыдъ же пославъ приведе Василя и Лазаря, и дастъ я; и створиша миръ въ недѣлю. А заутра, по зори, повѣсиша Василя и Лазаря и растрѣляша стрѣлами Василковичи, и идоша отъ града. Се же 2-ое мщенье створи, егоже не баше лѣпо створити, да бы Богъ отместникъ былъ, и взложити быша на Бога мщенье свое. Симъ же отъ града отшедшимъ, сею же снемше погребоша я. Святополку же обѣщавшюся прогнати Давыда, поиде къ Берестю къ Ляхомъ; се слышавъ Давыдъ, иде въ Ляхы ко Володиславу, ища помощи. Ляхове же обѣщашася ему помагати, и взяша у него злата 50 гривень, рекуще ему: „пойди съ нами Берестю, яко се вабитъ ны Святополкъ на снемъ¹⁾, и ту умиримъ ты съ Святополкомъ;“ и послушавъ ихъ Давыдъ, иде Берестю съ Володиславомъ. И ста Святополкъ въ градъ, а Ляхове на Бугу, и сослася рѣчьми Святополкъ съ Ляхы, и вдасть дары великы на Давыда; и рече Володиславъ Давыдови: „не послушаетъ мене Святополкъ, да иди опять.“ И приде Давыдъ Володимерю, и Святополкъ съвѣтъ

¹⁾ Сеймъ.

створи съ Ляхы, поиде къ Пиньску, пославъ по воѣ; и приде Дорогобужю, и дожда ту вой своихъ, и поиде на Давыда къ граду, и Давыдъ затворися въ градѣ, чая помощи въ Лясѣхъ, бѣша бо ему рекли: „яко аще придуть на тя Русскыѣ князи, то мы ти будемъ помощници;“ и солгаша ему, емлюще злато у Давыда и у Святополка. Святополкъ же оступи градъ, и стоя Святополкъ около града 7 недѣль; и поча Давыдъ молитися: „пусти мя изъ града.“ Святополкъ же обѣщася ему, и цѣловаста крестъ межи собою, и изиде Давыдъ изъ града, и приде въ Червень, а Святополкъ вниде въ градъ въ великую субботу, а Давыдъ бѣжа въ Ляхы. Святополкъ же, прогнавъ Давыда, нача думати на Володаря и на Василка, глаголя: „яко се есть волость отца моего и брата;“ и поиде на ня. Се слышавъ Володаръ и Василко, поидоста противу, взявша крестъ, егоже бѣ цѣлова къ нима на семъ: „яко на Давыда пришелъ есмь, а съ вама хочю имѣти миръ и любовь.“ И преступи Святополкъ крестъ, надѣяся на множество вой. И срѣтошася на поли на Рожни, исполчившимся обоимъ, и Василко възвыси крестъ, глаголя: „яко сего еси цѣловалъ, се первѣе взялъ еси зракъ очью моею, а се нынѣ хочещи взяти душу мою; да буди межи нами крестъ съ;“ и поидоша къ собѣ къ боеви, и сступишася полци, и мнози челоуѣци благовѣрнии видѣша крестъ надъ Василковы вой възвышѣся велми. Брани же велицѣ бывши и многѣмъ падающимъ отъ обою полку, и видѣвъ Святополкъ, яко люта брань, и побѣже, и прибѣже Володимерю; Володаръ же и Василко, побѣдивша, стаа ту, рекуща: „довлѣеть нама на межи своей стати,“ и не идоста никаможе. Святополкъ же прибѣже Володимерю, и съ нимъ сына его два, и Ярополчича два, и Святоша, сынъ Давыдовъ Святославича, и прочая дружина. (Далѣе слѣдуетъ разсказъ о борьбѣ Святополка съ Давыдомъ Игоревичемъ, при чемъ первому помогали Угры, а второму — Половцы; въ концѣ концовъ Давыдъ овладѣлъ Владиміромъ).

1100. Братья створиша миръ межи собою, Святополкъ, Володимеръ, Давыдъ, Олегъ (Святославичи) въ Увѣтичыхъ, мѣсяца августа въ 10 день. Того же мѣсяца въ 30, томъ же мѣстѣ, братья вся сняшася и приде къ нимъ Игоревичъ Давыдъ, и рече къ нимъ: „на что мя есте привабили? о се есмь; кому до мене обида?“ И отвѣща ему Володимеръ: „ты еси прислалъ къ намъ: хочю, братья, прити къ вамъ и пожаловатися своя обиды; да се

еси пришелъ и сѣдишь съ братьею своею на единомъ коврѣ: то чему не жалуешься, до кого ти насъ жалоба?“ и не отвѣща Давыдъ ничтоже. И сташа вся братья на конихъ; и ста Святополкъ съ своею дружиною, а Давыдъ и Олегъ съ своею разнo, а Давыдъ Игоревичъ сѣдѣше кромѣ, и не припустяху его къ собѣ, но особъ думаху о Давыдѣ. И сдумавше послаша къ Давыду мужи своѣ, Святополкъ Путятю, Володимеръ Огоростя и Ратибора, Давыдъ и Олегъ Торчина; послании же придоша къ Давыдови и рекоша ему: „се ти молвѣть братья: не хотимъ ти дати стола Володимерскаго, зане ввергль еси ножъ въ ны, егоже не было въ Русскѣй земли; да се мы тебе не имемъ, ни иного ти зла не створимъ, но се ти даемъ: шедъ сяди въ Бужьскѣмъ въ острогѣ, а Дубенъ и Черторыескъ то ти даетъ Святополкъ, а се ти Володимеръ 200 гривень, а Давыдъ и Олегъ 200 гривень.“ И тогда послаша слы своя къ Володареви и къ Василкови: „поими брата своего Василка къ собѣ, и буди вамъ едина власть Перемышль; да еще вамъ любо, да сѣдита, аще ли ни, да пусти Василка сѣмо, да его кормимъ сдѣ; а холопы наша выдайта и смерды;“ и не послуша сего Володарь, ни Василко. А Давыдъ сѣде Бужьскѣмъ, и посемъ вдасть Святополкъ Давыдови Дорогобужь, въ немже и умре; а Володимеръ вда сынови своему Ярославу.

1101. Преставися Всеславъ Полоцкѣй.

1103. Богъ вложи въ сердце княземъ Рускымъ Святополку и Володимиру, и снястася думати на Добольскѣ; и сѣде Святополкъ съ своею дружиною, а Володимеръ съ своею въ единомъ шатрѣ. И почаша думати и глаголати дружина Святополча: „яко негодно нынѣ веснѣ ити, хотимъ погубити смерды и ролью ихъ.“ И рече Володимеръ: „дивно ми, дружино, оже лошадей жалуете, еюже кто ореть; а сего чему не промыслите, оже то начнетъ орати смердъ, и приѣхавъ Половчинъ ударить ѣ стрѣлою, а лошадь его поиметь, а въ село его ѣхавъ иметь жену его и дѣти его, и все его имѣнье? то лошади жаль, а самого не жаль ли?“ И не могоша отвѣщати дружина Святополча. И рече Святополкъ: „се язъ готовъ уже;“ и вста Святополкъ, и рече ему Володимеръ: „то ти, брате, велико добро створиши земли Русскѣй.“ И посласта ко Олгови и Давыдови, глаголюща: „пойдита на Половци, да любо будемъ живи, любо мертви.“ И послуша Давыдъ, а Олегъ не всхотѣ сего, вину река: „не сдравлю“. Володимеръ же цѣловавъ

брата своего, и поиде Переяславлю, а Святополкъ по немъ, и Давыдъ Святославичъ; и поидоша на конихъ и въ лодьяхъ, и придоша ниже порогъ, и сташа въ протолчехъ ¹⁾ въ Хортичемъ островѣ; и вседоша на конѣ, и пѣшци изъ лодей высѣдше идоша въ поле 4 дни, и придоша на Сутѣнь. Половци же слышавше, яко идетъ Русь, собрашася безъ числа, и начаша думати. И рече Урусоба: „просимъ мира у Руси, яко крѣпко имуть битися съ нами, мы бо много зла створихомъ Русскѣй земли.“ И рѣша унѣйшии Урусобѣ: „аще ты боишися Руси, но мы ся не боимъ; сия бо избивше, поидемъ въ землю ихъ, и примемъ грады ихъ, и кто избавить ѧ отъ насъ.“ Русский же князи и вои вси моляхуть Бога, и обѣты вздаяху Богу и Матери Его. И сиде молящимся, поидоша Половци и послаша предъ собою въ сторожѣ Алтунопу, иже словяше въ нихъ мужствомъ; тако же Русский князи послаша сторожѣ своѣ. И устерегоша Русский сторожеве Алтунопу, и обступивъше ѧ, и убиша Алтунопу и сущая съ нимъ, и не избысть ни единъ, но вся избиша. И поидоша полкове, аки борове, и не бѣ презрѣти ихъ; и Русь поидоша противу имъ. И Богъ великий вложи ужастъ велику въ Половцѣ, и страхъ нападе на ня и трепеть отъ лица Русскихъ вой, и дрѣмаху сами, и конемъ ихъ не бѣ спѣха въ ногахъ; наши же съ весельемъ на конѣхъ и пѣши поидоша къ нимъ. Половци же видѣвше устремленье Руское на ся, не достигнувше побѣгоша предъ Русскими полки; наши же погнаша, сѣкуще ѧ. Дни 4-го априля мѣсяца велико спасенье Богъ створи, а на врагы наша дастъ побѣду велику. И убиша ту въ полку князии 20; а Белдюзя яша. По семъ же сѣдоша братья, побѣдивше врагы своя, и приведоша Белдюзя къ Святополку, и нача Белдюзь даяти на собѣ злато, и сребро, и конѣ, и скоть; Святополкъ же посла ѧ къ Володимеру. И пришедшю ему, нача впрашати его Володимеръ: „то вѣдѣ яла вы рота; многажды бо ходивше ротѣ, воевасте Русскую землю; то чему ты не казаше сыновъ своихъ и роду своего не преступати роты, но проливаше кровь хрестыянску? да се буди кровь твоя на главѣ твоей;“ и повелѣ убити ѧ, и тако разсѣкоша ѧ на уды. И поидоша Русь съ полбномъ великимъ, и съ побѣдою великою.


¹⁾ Протоки.

1106. Преставися Янь, старецъ добрый, живъ лѣтъ 90, въ старости маститѣ; живъ по закону Божью, не хужий бѣ первыхъ праведникъ, отъ негоже и азъ многа словеса слышахъ, еже и вписахъ въ лѣтописаньи семь.

1107. Воева Бонякъ, и зая конѣ у Переяславля. Томъ же лѣтъ приде Бонякъ и Шаруканъ старый и ини князи мнози, и сташа около Лубна; Святополкъ же, и Володимеръ, и Олегъ, Святославъ, Мстиславъ, Вячеславъ, Ярополкъ идоша на Половци къ Лубну, и въ 6-ый часъ дне бродишася чресъ Сулу, и кликнуша на нихъ. Половци же ужасошася, отъ страха не възмогоша ни стяга поставити, но побѣгоша хватаяще кони, а друзии пѣши побѣгоша; наши же почаша сѣчи, женуци я, а другыѣ руками имати, и гнаша ноли до Хорола. Убиша же Таза, Бонякова брата, а Сугра яша и брата его, а Шаруканъ едва утече; отбѣгоша же товара своего, еже взяша Русскии вои, и възвратишася всояси съ побѣдою великою.

1110. Идоша веснѣ на Половцѣ Святополкъ, и Володимеръ, и Давыдъ; и дошедше Воиня, и воротишася. Томже лѣтъ бысть знаменье въ Печерьстѣмъ монастырѣ въ 11 день февраля мѣсяца: явися столпъ огненъ отъ земли до небеси, а молнья освѣтиша всю землю, и въ небеси погремѣ въ часъ 1-й ноци; и весь миръ видѣ; сей же столпъ первѣе ста на трапезници каменѣй, яко не видѣти бысть креста, и постоявъ мало, съступи на церковь и ста надъ гробомъ Θεодосьевымъ, и потомъ ступи на верхъ акы ко востоку лицемъ, и потомъ невидимъ бысть. Се же бѣаше не огненный столпъ, но видѣ ангелескъ,—и се явленье нѣкоторое показываше, емуже бѣ быти, еже и бысть: на 2-е бо лѣто не съ ли ангелъ вожь бысть на иноплеменники и супостаты, яко же рече: ангелъ предъ тобою предъидеть, и пакы: ангелъ твой буди съ тобою?

Игуменъ Силивестръ святаго Михаила написахъ книги си Лѣтописецъ, надѣяся отъ Бога милость прияти, при князи Володимерѣ, княжащю ему Кыевѣ, а мнѣ въ то время игуменящю у св. Михаила, въ 6624 (1116), индикта 9 лѣто; а иже чтеть книги сия, то буди ми въ молитвахъ.



Владиміръ Святой † 1015.

Изяславъ Полоцкій.

Брячиславъ † 1044.

Всеславъ † 1101.

Ярославъ Мудрый † 1054.

Мстиславъ † 1036

Ярославъ Мудрый † 1504.

Владиміръ † 1052.

Изяславъ † 1078.

Святославъ † 1076.

Всеволодъ † 1093. Игорь † 1060. Вячеславъ † 1057.

Ростиславъ

Мстиславъ. Святополкъ. Ярополкъ. Глѣбъ. Романъ. Давидъ. Владимиръ. Ростиславъ. Давидъ.

Борисъ.

(†1066) (†1068) (†1113) (†1086)

(†1078)(†1079)(†1123)(†1116)

(†1125)

(†1093)

(†1113)

(†1078)

Рюрикъ. Володаръ. Василько.

(†1092) (†1124) (†1124)



MOCC

OB

TE

